

<doc doc.Title="Qızıl furtuna" doc.Originals_author="Pulatov Timur" doc.Alphabet="Cyrillic" doc.Publication_year="2020">
Къызыл фуртуна

(Чобан-заде: Тикенли ёллардан — йылдызларгъа!)

Къырымтатар миллий арекетининъ ветераны Фазыл Аметовнынъ хатырасына

Бекир Чобан-заденинъ элягъындан сонъ Баку тюрьмесининъ незаретчиси Мемед Айлисли тесадуфен тапкъан онынъ васиетнамеси:

“Эгер мен язгъанларым ич кимсеге меракълы олмаса да, эр алда, о гъайып олаяткъан, рухий тюшкюнликте булунгъан, не байрагъы, не шурети, не топрагъы къалгъан къырымтатар халкъынынъ вазиетини акс этмекте...

Мен язгъан къырымтатар тилинде лаф этеджек кимсе къалмаса биле, тилимиз эписи бир улу ве озыгъундир, чюнки онда халкъымнынъ бинъйыллыкъ теэссюри, онынъ мазун сеси янъгъырамакъта...

Ве лякин такъдир Къырымгъа юзюни чевирсе ве къырымтатар озъ къардашы — къырымтатарны къыдырмагъа башласа, меним эсерлерим мейдангъа чыкъар ве зарур олур. Ойле олмаса исе, меним бир къач сонъки думанлы, мазун ве юкъусыз геджелерим унутылса, манъа бу язгъан сатырларым да етер...”.

Биринджи къысым

I

Хабиб Гулям-заде Бухорий шанлы Баку шеэрини зияретнен кетерек, тынчыкъ, къандалай толу трен ичинде, копчеклернинъ тасырдысы ве гъыйчылдысыны динълеп, еди кунъ еди гедже кечирди.

Янъы Бухаранынъ сазлы, тузлакъ топракълы Кагъан станциясында башлангъан ёл Ташкентке алып бара, анда исе Москва тренине отурмакъ керек эди.

Трен отуз километрлик ёлны кечип, “Ермай къуллеси” деген чатмаёлгъа баргъанда, бухаралы, эвден узакълашкъаныны дуйып, енгилликнен нефес кечирди.

Эр бир сеятчы киби, йигирми дёрт яшлы, умютлер иле толу деликъанлы онынъ гонълюни сыкъкъан дургъун аятындан узюлип, сербестликке чыкъкъанына къувана эди.

Лякин сербестлик энъ-эвеля озюни иштаасы ачылгъанынен анъдырды.

Трен, “Ермай кьуллеси”нде бир дакъкъагъа токътагъан ве, этрафкъа къара тютюн чыкъарып, кене тасырдамагъа девам эткенинен Хабиб, четтеки ятакъкъа онъайтлыджа ерлешти.

О, анасы Марьям-бонунынъ чебер эллери тандырда пиширген къабакълы самсаларнынъ дадыны бакъмагъа ниетленди.

Чантасындан ёлда ашайджакъларыны чыкъарыркен, эвнинъ къынтавлы, кьорчалагъан руху джанланды.

Бу эвде, ерли институтта къырымлы профессор Бекир Чобан-заде ёлбашчылыкъ япкъан “Земаневий тильшынаслыкъ” кафедрасынынъ кучюк хадими, сонъки учъ йыл диссертация язмакънен огърашты.

Чобан-заде, башкъа студентлер имтиан бергенде баягъы зорлангъан тюрк тильшынаслыгъы киби муреккеп фен боюнджа лекцияларда тирнекли, дерске авесликнен къатнагъан Хабиб Бухорийни козьге алды.

Бакугъа къайтмаздан эвель Хабибни диссертация язмагъа исрар этти, узакътан олса да, бухаралыгъа керек олгъанда ярдым косьтереджегини айтты, эм де Каспий ялысында мусафир этеджегини бильдирди.

Чобан-заде иле оладжакъ корюшювден эеджанланып, Хабиб онынъ иле ведалашкъан июнь айынынъ бир акъшамыны хатырлады.

Бекир Ваап огълу, Хабибнинъ бабасы Акърам Саид огълунынъ талабы иле “Суфиен” мааллелериндеки эвлеринде мусафир олгъан эди.

Бабасы бильгиге авес огълу кимнинъ кьолуна тюшкени, оны Бакугъа давет этмеге ваде берген инсан не дереджеде ишанчлы олгъаныны бильмек истеди.

Чобан-заде, башы тёпесинде пишкен, салкъымлары бираз бурюшкен, сарараяткъан япракъларында исе чевик торгъайчыкълар бир шейлер кьыдыргъан азбардаки юзюм астындаки тёшемеде онъайтлы ерлешкенинен, бабасы мусафирнинъ ачыкъ, садедиль бетине илишчик назар атып, мусафирченлик адетине рагъмен, субет башламакъны озъ бойнуна алды.

% — Аферин... йигирми еди яшында олсанъыз да, энди профессор!

Браво!

Меним якъын достум — Бурхан Бурханович, Файзулла Ходжаевнинъ исрарлыгъынен, Къызыл профессорлар институты ачылгъан йылы Москвагъа ёлланылгъан эди...

Эки кере комиссиядан кечмедиле... кери къайтмагъа истемейип, Москвада учъ йыл копек суварды.

Гизли чалышкъан къуюмджынынъ тул къадынында кирада отурды...

Ахыр-сонъу кирмеге наиль олды, фельсефе болюгинде тасиль алды... ве къызыл диплом алып, къабара-кибирлене къайтты — нефакъагъа тамам чыкъаджакъ йылы...

Шимди исе бизим къызыл профессор, догъру-яландан сакъынмайып, къадылыкъкъа киреджек ола...

Эм кярлы, эм шанлы!

Чобан-заде оны незакетли тебессюм иле динълей...

Хабиб оджасына тикленип бакъа, онъа мусафирликте онъайтлы экенми, деп тюшюне эди.

Лякин Чобан-заденинъ даима муляйим, ачыкъ, чаялыкъ къыгъылчымлары иле йылтырагъан ве меракънен дюньягъа бакъкъан козьлери сийрек денъише, умумен торс я да шашкъын олмай тургъан.

Не окъув аудиториясында студентлер иле олып кечкен эеджанлы субетлер вакътында, не эски шеэрнинъ азиз ерлерини зиярет эткенде, не де мында, мусафир шерефине къазанда пиляв пишкен ашханенинъ тютюнinden эвельки джанлы парылдысыны джойгъан оймалы къапу-пенджерелери олгъан эскирген эвнинъ таныш олмагъан шараитинде.

Чобан-заде, мусафирине джан сыкъыджы ве джаиль олгъаныны косътермеге истемеген эв сабысынынъ девамлы, эпкин муалазаларыны сес чыкъармай, муляйим тебессюм иле динълей эди.

Субет далгъасына даа минмеген Чобан-задени Хабиб къуртармагъа тырышты ве бабасыны тынчландырмагъа башлады.

— Бекир Ваапович шаматалы аудиториялардан узакъча, къоранта даиресинде раатламагъа кельди, — деди.

Акъбар Саидович огълуна пиалаларгъа чай тѣкмекни ишмар иле буюрды ве мусафирге татлылыкълар иле табакъны якъынджа итеди.

Лякин кене эвельки гъайретнен девам этти:

— Айтсанъыз, Бекир Ваапович... эр шей шунъа кете ки, ойле олмазмы, заман бизден кутълеге тасиль бермек ичюн сиз киби классик профессорларны дегиль де, Бурхан Бурханович киби атешин къызыл профессорларны талап этер?!

Шимди къызыллар оларны къады, тахкъикъатчы хызметине, фиркъа реберлерининъ ве халкъ комиссариатларнынъ меслеатчылары, университет оджалары вазифесине зияде джелъп этелер...

Чайдан бир ютум япып, эпкинлик иле девам этти:

— Бизим тарихымызда энди ойле вакъиа олгъан эди де... бутюн эски профессорларны геми магъазына къапап, къайтмагъа акъ бермейип, мемлекеттен ёлладылар...

Хабиб субет мевзусындан къанаатленмейип, турмагъа азырлангъаныны корип, бабасы огълунынъ омузына къолуны икътидар иле къойды.

— Меним суалим бефтандан дегиль... лаф екяне варисим, несилимнинъ девамджысы олгъан огълумнынъ такъдири акъкъында кете...

Ойле олмазмы, сизинъ гъайретинъиз ве ярдымынъыз саесинде...Хабиб, ойле дейик, сиз, сайгъылы оджам, такъдим эткен эски мектепнинъ доцент я да профессор унванынынъ саиби олгъан сонъ... нетиджеде тешик гемиге отурмазмы?!

Ойле сойларыны Каспий ялысына, Дербентке баргъанымда сайысыз коръдим.

Сизинъ ватанынъыз Къырымда бу энди башланды, гъалиба... чакъувлар, ифтиралар, къызыл ве, дейик — акъ профессура арасында джыллы ер ичюн куреш?

Бу себептен дегильми, сиз даима бизим тозлу ёлларымызда — Ташкенттен Фергъанагъа, Самаркъандгъа, андан бизге, Бухарагъа, мындан — Бакугъа... эм талгъын башынъызны таяндырмагъа ер ёкъ?!

Хабиб исе пешинъизден юре, сиз бир йыл, чокъсу бир бучукъ йыл чалышмагъа етиштирген бир институтны дигерине денъиштире...

Чобан-заде чайдан бир ютум япып, Хабибге тааджипнен бакъты: онынъ Къырымдан кетмеге меджбур эткен себепни бабасына о ачкъан дегильми экен?

Лякин Хабиб кескинликнен тиль къайтаргъаныны эшитти:

— Етер энди, баба... Бекир Вааповични мусафирликке согъру япмакъ ичюн давет этмедик де!

Чобан-заде эвлерине кельмезден бир кунъ эвель Акъбар Саидович ерли ГПУны зиярет эткени ве анда онъа мусафирге бериледжек суаллерни теклиф эткенлери, онынъ тюбю-темелини араштырмагъа тевсие бергенлерини Хабибнинъ акълы уджуна биле кельмеген эди.

Акъикъатта исе, Чобан-заде Озбекистангъа кельген биринджи кунюнден ГПУ онынъ эр бир адымыны козете, ерли студентлер ве оджалардан къырымлы акъкъында малюмат топлай экен.

— Тынчлан, огълум... урьметли мусафир огюнде озюньни дегерли тут, — опъкеледи Хабибни бабасы ве девам этти:

— Баба оларакъ меним табийй истегим — огълумны омюрге муваффакъ, урьметли инсан олгъаныны коръмек...

Велякин сизинъ саенъизде чалышкъан диссертациянынъ мевзусы биле шимдики заманда шубели корюне: Абдулла Къадыри... озъбек эдебий тилининъ янъылыкъчысы...

Гъалиба, ойле, мен догъру анълагъан олсам?!

Мусафир адетине уйып, Чобан-заде эв саибининъ тѣкюнмелерини сабырнен динълеп, баш саллай, кимерде ишмарнен шубесини косътере эди.

Ялынъыз Хабиб чалышкъан мевзу анъылгъанда, Чобан-заде эпейи муляйим тебессюми иле ачыкълады:

— Не акъкъында язмакъны Хабиб озю сайлап алды...

Манъа, кафедра башына, бу мевзу меракълы корюнди... чюнки янъы заманлар эр шейде янъылыкъ ярата, шу джумледен озъбек эдебий тилинде... бунда ич бир тюрлю сиясет ёкъ...

Тиль — янъы ве эскининъ куреш мейданы дегиль... арап уруфатындан латин элифбесине кечюв исе — эписи тюрк халкълары сайлагъан ёл...

... Гонълюнде аджджы из къалдыргъан Хабиб Бухорийнинъ хатырлавларыны проводникнинъ кескин сеси больди:

— Тѣшек...

Тѣшек ичюн ким тѣлемеди?!

Проводник иле эсаплашкъан сонъ, Хабиб сувсагъаныны дуйып, треннинъ ресторан-вагонынадже нарзан шишеси арап барды.

Ресторан аман-аман бош эди.

Тек бир софра башында къаба сакъаллы, кенъ кевдели инсан, къая парчасы киби, отура.

О, къарандашнен гуръ къашларыны тюшюнджели къашып, тосат-тосат дудакъларыны къыбырдата, огюнде яткъан къагъытларны зорнен анълагъан киби, окъуй эди.

Официантка, шишенинъ къапачыгъыны чевиликнен ачып, Хабибнинъ огюне къойды.

Нарзан фышылдап, бурнуна кескин къокъу урды.

Хабиб турды ве шишени озюнен вагонына алып кетеджек олды, амма официантка серт сеснен:

— Ресторандан бирде-бир шей алып чыкъмакъ ясакътыр! — деди.

Онынъ сеси пенджере янында отургъан екъане зияретчининъ дикъкъатыны джелъп этти.

Къагъыт япрагъыны дестеге тырачлыкънен къайтарып къойып, сагъыр сес иле:

— Янъы къаидеми..?

Не къадар юрем — ильк дефа... — ве кететкъан Хабибге сынайджы назарнен бакъты, санки эвель оны расткетиргенини бильдирмек истеди.

Онынъ сувукъ бакъышы Хабибни сескендирди.

Вагондан чыкъкъанда не ичюндир арткъа чевирилип бакъты: таныш олмагъан инсан къагъытларны тырачлыкънен чантасына топлагъан сонъ, агъыр-агъыр басып, треннинъ башкъа тарафына догърулды.

Озь вагонына къайткъан сонъ Хабиб юкъары ятакъкъа чевиликнен тырмашты, джемиданыны чекип, ичинден Чобан-заденинъ къыймет кесмесине алып кеткен эльязманы — Абдулла Къадырининъ иджады акъкъында диссертациясыны чыкъарды.

Язгъаныны аман-аман эзберден бильсе де, сатырларны козьден кечирип, хатырасыны тазертмек истеди, оджасы

сатырларны илишкик бакъышынен окъугъаныны козь огюне кетирди.

Бутюн вакъыт Чобан-заденинъ сымасы онынъ огюнде джанлана, узакъ ёлгъа чыкъкъан Хабиб бабасынынъ эвини Чобан-заденинъ кабинети иле хаялий йипнен багълай эди.

О, профессорны, омузларына памукъ халатыны атып, къолтукъта кынтавлы ерлешип, онынъ ишини саифелегенини тосат-тосат козь огюне кетире тургъан.

Чобан-заде Бакугъа кетмезден оларнынъ эвлеринде мусафир олгъанындан энди аман-аман эки йыл кечти, амма Хабиб тренге отургъанынен шу ведалашув акъшамынынъ сёзлери, ишмарлары биле хатырасына тюшип, бутюн ёл оны раатсызлады.

Бабасы — Анвар Саидович ве оджасы Бекир Чобан-заде... ташкын бу вакъытнынъ далгъасы оларны тап ашагъыдан, факъырлар табакъасындан юкъары котерди...

Бабасы, замангъа уйып, озь ыргъат кечмишинден файдаланды ве Наркомпрос — фукъарелернинъ халкъ маарифи саасында баягъы мувафакъиетлерге иришти.

Бельки де, шу себептен озюни кызыл профессорлар сырасына къошкъаны ичюн о, мусафир иле ойле эпкинликнен, бироз кибирленип лаф эте.

Классик шекильде, эскиджесине чалышкъан профессор илимде япкъанларыны шубе астына къоя эди.

Анвар Бухори ве Бекир Чобан-заде...

Бири, чыкъкъан — къуллукъ япкъан ыргъат табакъасыны огге сюрип, янъы заманларда озю ве къорантасы ичюн янъы имтиязларны талап эте...

Оджасы исе — эфенди, о да авам халкъ арасындан олып, озюни Чобан-заде, яни, чобан неслинден, деп адландырса да, джемиетнинъ энъ ашагъы басамагъында тургъан, къувулгъан инсанларгъа буюк урьмет беслей, санки яшлыгъында озюне ваде берген: эр заман ве эр адымында озь имкянлары ве бильгисине эсасланып, арекет этмек, огге ынтылмакъ...

Бу фикир Хабибнинъ акълына та о заман, Чобан-заде ведалашып, Бакуда корюшкендже дегендай, къолуны саллагъан куню кельди...

Бабасынен музакере эткенде Хабиб “ыргъат”, “къул” сёзлерининъ манасыны башкъаджа тариф эте, оларны тамам Чобан-заде киби анълай эди.

Шу себептен институтнынъ чокънусхалы “Къызыл укъувчи” газетине язгъан ильк макъалесини, оджасынынъ джазибеси астында булунып, “Хабиб Гулям-заде”, деп имзалагъан ве илериде де озъ ишлерини бу янъы ад иле имзаламагъа къараргъа кельген эди.

Хабиб ичюн бу зека оюны дегиль де, садыкълыкъ анты киби, оджасынен маневий алякъа эди — бундан сонъ генч онъа бутюн омрюни багъышлайджакъ олды.

Институт газетиндеки макъале Чобан-заденинъ ерли газетте басылгъан ве студентлер эм оджалар арасында чокъ музакерелереге себеп олгъан “Озъбек эдебий тилининъ учъ эсас инкишаф ёлу” деген макъалесине сесленюв эди.

Даа муими ве меракълысы шу эди ки, Чобан-заденинъ ишине сесленген ве топлашувларда эм де неширлерде семерели музакерелерге киришкен белли озъбек языджылары — Чулпан, Абдулла Къадыри, Вадуд Махмуд, Фитратнынъ дикъкъатыны джелъп эткен эди.

Ялынъыз онынъ сюрю къалеми дегиль де, Чобан-заденинъ айдын, озъгюн шахсиети студентлерни онъа джелъп эте ве хатырлары ондан бир даа узюльмей эди.

Аудиториянынъ босагъасында профессор дакъкъасы дакъкъасына пейда ола тургъан.

Селямлашкъан сонъ лафыны шакъадан башлай, меселя: бойле кунешли куню негедир яныма шемсие алгъаным, потиклернинъ устюнден исе калош кийип кельдим, деп, эсасен озю устюнден куле эди...

Эм де, озюне юз кере башкъа тютюн ичмемек ваде берген инсан киби, терен кокюс кечирип, “Казбек” папиросларнынъ къутусыны ача тургъан...

Эвельден азырлангъан конспектлер ве я китапларгъа бакъмайып, хатырадан тюрк тиллерининъ фонетикасындан муреккеп меселелерни саде ве анълайышлы тариф эте, минсиз бильген бир сыра тюрк тиллеринден суаллерге джеваплар тапа эди.

Эдебияттан чокъ мисаллер кетире, Алишер Навоийни, Низамини ильхам иле, сесине макъам берип, окъуй, бунен берабер, орта асыр шаирлернинъ иджады сырларыны огренгени акъкъында икяе эте тургъан.

Бу вакъытта аудитория ондан козьлерини алмай, бакъа ве эр сёзюни дикъкъатнен динълей эди.

Эписи субет иле ойле авеслене тургъанлар ки, окъувгъа айырылгъан вакъыт кечкенини сезмей къала, озь дерсине кельген невбеттеки оджа исе къапу артында сабырсызлыкънен оксюре, къакъып тура эди.

Озюне келип, Чобан-заде сагълыкълаша, сабырсыз оджагъа теменна этип, афу сорай тургъан.

— Иште, — айта тургъан студентлер, — энциклопедик бильги саиби олып, къонушувда озюни саде, шенъ тутмакъ, озьгюн къырым истиза иле шакъа этмек, аятсевер олмакъ мумкюн экен...

Озь фикри олмагъаны киби, экиде бир Ленин, Сталинни, бир сыра пролетар даийлернинъ сёзлерини текрарлап отургъан къызыл профессорлар сырасындан базы оджаларымыз киби дегиль.

Шимди исе, Чобан-заденинъ Бухарадан кеткенининъ эки йыл кечкенине бакъмадан, онынъ сымасы копчеклернинъ тыкъырдысы ве вагоннынъ тюзгюн салланмасы алтында джанлана эди.

Не шамата, не янаша ятакълардаки къомшуларнынъ сеслери Хабибни Бакуда оладжакъ къуванчлы корюшювден чекип олды.

Рязаньге барып етмезден бир кичкене чатмаёл станциясында трен апансыздан токътады.

Къаршысына кельген паровознынъ девамлы дюдюги янъгъырады, артындан исе, вагон пенджереси янындан чапып кечкенде, мундирининъ бель къайышыны чезген милиснинъ кескин сызгъыравукънынъ даушы эшитильди...

— Гъалиба, вагондан джемиданны хырсызладылар... бедава айтмагъанлар: Рязаньге якъынлаштынъмы, торбанъны тутмасанъ, анъкъавсынъ, — тахмин этти ашагъы ерде отургъан ёлджу ве сийрек тишлери арасындан не ичюндир сызгъырды...

Бир кереден о къадар чешит-чешит даушлар къарышмасы насылдыр теляшлы нагъмеге ошап, Хабибнинъ къулагъына кирип, чардаш авасынынъ шенълик толу, чая сесини анъдыртты...

Бундан Чобан-заденинъ Ташкент университетинде чалышкъан йылы тегеректе ойнагъан оюнлары акъкъында хатырлавыны уятты.

Озбек ве авропа оюнлары тегереги...

Профессорнынъ озю, вакъыт не къадар сыкълет олса да, тегеректеки мешгъулиетлерге кельмеге илле чаре тапа тургъан.

Башта сакъынып ве анталджа, амма кельген сайын озюнде эминлик сезерек, оджа огюнде эр бир антал арекети ичюн сыкъылып къалгъан студент кызларнен оюн тешмеге башлады.

Андижан полькасындан, фергъана фокстротындан яваш-яваш украин гопакъына ве маджар чардашына кече тургъанлар...

Ойнагъан чифтлер кырым “Тым-тым”ы янгъырагъанда буюк гъайрет косьтере эдилер...

Ялдамалы ве хафиф, сувгъа тиер-тимез сюзген акъкъу киби, кызларнынъ къоллар арекетлери...

Оюн залында тизилип, кызлар профессордан козь алмай, оларны не заман невбеттеки оюнга давет этеджегини беклеп тура эдилер.

Сечильген сою кавалерине буюк къуванчнен элини узата, оюн нагъмесине уймагъа тырыша тургъан...

Бу хатырлавлар Хабибни апансыздан башкъа бир фикирге алып кельдилер, студент яшайышындан къалгъан хатырлавларны мытлакъа мемуар шеклинде язып къалдырмакъ керек.

Чюнки Чобан-заденинъ сымасы, онынъ Кырымдаки достлары ичюн узакъ месафе себебинден бельгисизлик къаранлыгъында олып да, Ташкентте, Фергъанада, Бухарадаки яшайышы ве фаалиети оларгъа эмиш-демишлер, фитне ве ифтиралардан белли олмасын да, булардан мытлакъа билинсин.

Кырымдаки семетдешлерине опыке киби олсун, чюнки оларнынъ нахош ынтылувларына бола Чобан-заде къувулгъан, сюргюнли олды, яман ниетли инсанларнынъ акълы онынъ да икметине, бильгисине, хаялына иришип оламады.

Озь адий яшайышынен яшагъан семетдешлерининъ акълындан устюн бир инсан эди.

“Озь Ватанында пейгъамбер олмаз” — бойле янъгъыравукъ беянатнен Хабиб профессорнынъ фаалиети акъкъында языларыны битирмек ниетленди.

Имзасы: Хабиб Гулям-заде...

“Оджам шимди насыл экен?”, тюзюнди Хабиб, пенджеренден вагоннынъ таванына тюзкен, де корюнуп, де гъайып олгъан ярыкъ шавлелерине бакъаракъ.

Бакугъа ильк баргъанда, о профессорны гъает болдургъан, къасеветли ве арыкълагъан алда корьген эди.

Оны Тифлис вокзалында къаршылагъан Чобан-заденинъ аспиранты Сайид Али Ходжаев шенъ олмагъа тырышып:

— Эмирлернинъ алтын толалары иле джемиданынъны манъа ишанырсынъмы? — деп шакъа этсе де, Чобан-заденинъ сагълыгъы акъкъында суальге, къыскъа джевап берди:

— Оджам дарбеге къаршы къатты тура!

Абу Сайид — Бухара форсасы Авропа мотына коре кийинген эди — немсе бичимли елеги астында беяз герданлыкъ, оны эр бир айткъан сёзюнден сонъ тегизлей ве дёгмелерини тюзете тургъан; башындаки къырым къалпагъы бунъа кесен-кес тик келе эди.

— Кимнинъ дарбесини?

Зенаатдашларынынъ?

— Газетлердеки адий тешвикъат сачмалары... къызыл профессура чаресини тапса, къылыфындан атылып чыкъаджакъ... бизим профессор пантюркчи эмиш, тильшынаслыкъта янъы акъынтыларгъа къаршы чыкъа... академик Маррны къабул этмей — девам этти озь, шенъ тильбаз эдасыны ташламагъан Ходжаев.

Озь вакътында Туркистаннынъ берлиндеки эмигрант шаирлери тегерегинде олгъанлар сырасындан чыктып, Ходжаев олар киби, озь мийини алимнинъ истикъбалине кедер этеджек ич бир джиддий шейге къулакъ асмагъан бир киши эди.

Хабибнен бир яшта олып, Авропа, Шаркъ, Къадимий Юнанистан ве Романынъ эписи эдебий жанрларыны къызгъанчнен синъдирип алгъан ве бу бильгилер онъа Чобан-заде ёлбашчылыкъ япкъан Бакудаки институтнынъ

кафедрасында бошагъан ерни илянсыз ярышта эльде этмекте ярдымджы олгъан эди.

Бундан сонъ, Хабибнен самимий мусабакъада енъип, Баку кунеши астындаки ерни алды ве Каспийнинъ ялысында даимий яшай эди.

— Не устюнден козьлеринъни кёрлатасынъ, шанслы ракъип?

— Хабиб къармакънен отургъан балыкъчылар толу ялыгъа козь ташлады.

Абу Сайид башындан къалпакъны чыкъарып, энъсесини къашыды:

— Э-э, енгиль иш дегиль, — девамлы кокюс кечирди ве эгилип, къалдырымнынъ таш толачыкъларыны такъылдатты.

— Мелеклер ядымджы олсун...

Гедже-кунъдюз Махмуд Къашгъарлынынъ “Дивану лугъат ат-тюрк” эсеринининъ азербайджан тилине терджимеси устюнден чалышам...

Чобан-заде терджимеме тевсир язаджакъ олды, бунъа къуванам...

Иншалла, кузьге екюнлерим...

Кафедрада имтианым мувафакъиетли кечсе, бошагъан доцент ерини манъа береджеклер...

Иште, бойле...

Бильмейим, бильмейим, бир шейлер айтмагъа даа эрте, — ве, яры сёзни болип, янларындан кечкен къызгъа къолуны саллады.

Лаф эте-эте, трамвай дурагъына кельдилер.

Хабиб, бакулы пассажирлерден Тифлис вокзалынынъ мимарлыкъ мутешемлиги акъкъында эшитип, бакъаджакъ олса да, о, биринджи Бакугъа келишинде бинаны ичтен ве тыштан — оймалы къапулары ве орьнекли заллары, аятларыны сейир этип, гранит ве мермерде ойма ясагъан бухара усталарнынъ ишлеринен тенъештирип оламады.

— Эдинип ишленильген иш олса да, фахрий...

Тюрклерге “Лугъатнынъ...” терен манасы ве дюльберлигини гъайрыдан ачмакъ, — макътанчакълыкънен айтты Абу Сайид, эшине даа бир кере Бакугъа кельмекни намуслы ярышта енъгенини хатырлатып.

Чобан-заденинъ эвинедже трамвайдан трамвайгъа кечип отургъан вакъытта башкъа бир сёз айтылмады.

Лев Толстой сокъагъы ве Нефтяниклер джаддеси бою джаяв кечтилер, не исе Кооператив сокъгъына чыкътылар.

Мында, къырмазы толадан къурулгъан балконларында Каспий елинде къуругъан чамашырлы эвде, экинджи къаттаки бешинджи мескенде къарарнен он йыл девамында Ругие ханым Абдулина иле тынч-муаббет Бекир Чобан-заде яшай эди.

Мердивенден котерильгенде, квартирадан фортепианода чалынгъан енгиль, чая нагъмени эшиттилер.

Эшлер таныш къаверенки къапу огюнде токътады, динълендилер.

— Башындан башлаймыз!

Сиз лекцияда дегильсинъиз, ойле эеджансыз сеснен йырламакъ олмаз да...

Шенъ, чаялыкънен, бала хорындаки киби, — эшиттилер олар Ругие ханымнынъ акъайыны опыкелегенини...

Бир кобелек уча-къона багъчаларда кезерди, эрылгъанлар, къарт замбакълар бу мелектен безерди...

- Ругие ханым Номан Челебиджиханнынъ «Кобелек» шиирине музыка язып, бала мектебинде чалмакъ ичюн чалыша...

Эм де Бекир агъаны онъа зиль тутып йырламакъны къач кунъден берли зорлай. — Кедер этмейик... къаршыдаки багъчада отурайыкъ бираз...

Эвден чыкътылар, сокъакъ бою кезиндилер, букинистнинъ тюкянчыгъына кирдилер...

Хабибнинъ къолунда джемидан корип, къарт букинист къолларынен ишмар этмеге башлады:

— Ёкъ, ёкъ, шимдилик китапларны къабул этмеймиз... тек, эгер тери къабы ве алтын сувлу олса... раритет... он бешинджи асыргъа аит Низами Гянджеви...

Кери, эвге таба къайтаяткъанда, Абу Сайид:

— Оджамызны Къырым асрети чекишитире.

Тюневин бу нагъмеге Асие Акимова зиль тутты...

Мында Къырымдан кельген студентлерден...

Ругие ханым эви Бакуда окъугъан къырым генчлер иле толугъаныны севе... козь огюнде яшара, чокъ шакъа эте, куле... Чобан-заде явашчыкътан озъ кабинетине кете, ишине далмагъа тырыша...

Шимди къапу артында сукюнет эди.
Эшлер босагъада даа бираз турдылар.
Хабиб Чобан-заднен корюшеджегинден эеджанланып, озюни зорнен тутты, къызаргъан бетинде тер тамчылары пейда олды...

Чанъ къакъылгъанына халаткъа сарынып, Чобан-заденинъ озю чыкъты.

Муляйим кулюмсиреди.

Хабиб оджасы оларнынъ Бухарадаки эвинде мусафир олгъанындан берли насыл денъишкенини бир кереден абайлады: талгъын козьлеринде эвельки чая кыгъылчымлары ёкъ, гуръ сачларына чал тюшкен.

- Селям алейкум, оджа, - зорнен айтып олды Хабиб.
Онынъ утангъаныны ве джуръатсызлыгъыны корип, эв саиби оны озюне чекти ве къучакълады.

- Ругие ханым, мусафирни къаршыла...

Хабиб Гулям-заде кельди... - ярым адым кери чекилип, дикъкъатнен мусафирге бакъты ве макъуллеп, башыны къакъты:

- Эп ойлесинъ... аудиториянынъ биринджи сырасында музакере этмеге азыр олып отура эдинъ... ве апансыздан, студентлерге хитап этмеге алышкъаны киби, "сиз" демеге кечти:

- Сизден хабер алдым, эбет, эбет, ишинъизни окъурым...

Озюнъиз не фикирдесинъиз?

Мемнюсизми?

- Догърусыны айтсам, чокъ мемнюн дегилим, - икърар этти Хабиб: - Абдулла Кадырининъ услуп нагъмесини анълап оламайым... теренлиги менден къача...

- Я аятта не тура бересиз? - эшитильди Ругие ханымнынъ сеси, - Икметли субетлер бир фильджан къаве башында алып барыла... - Ве Хабибни къолундан алды, - Ойле япмасам, таллебени оджасындан айырып оламам...

Енгиль юрип, квартира ичине озгъарды:

- Ода сизинъ маиетинъизде...

Сабадан къаве ве къайгъана.

Бекир агъа Бухара пилявыны пек макътады...

Лякин бизде, теэсюф ки, – долма, анджакъ о да иштаа къозгъата.

– Ругие ханым – йылдыз, – апансыздан къарышты субетке Абу Сайид, – театрде операнынъ етекчи йырджысы...

Ромео иле дуэтте Джульеттаны иджра эткенде, бутюн Баку айретте къала...

Ве, эв саибесини даа зияде пиязламакъ ичюн, къошты: – Бугунъ сизинъ къатынъызгъа котерильгенде, тесадуфен эшиттик, сизде бестекяр къабилиети де бар экен.

Ругие ханым къолуны саллады.

Абу Сайиднинъ пиязындан дюльбер чертильген эльмачыкълы бетинде козьлери парылдап башлагъаны корюнсе де:

– Э, ойнамакъ киби, иште, Бекир агъанъызнынъ кейфини котермек ичюн. – Сонъки вакъытта пек тюшкюн алда юре.

Деди о, зариф арекетлернен сачларыны тюзеткен сонъ, къапуны ачты:

— Хош кельдинъиз...

Акъайым озъ озъбек талебелери акъкъында чокъ икяе эте тургъан -илимде тирнекли, бильгиге ынтылгъан, деп... хусусан сиз акъкъынъызда...

Абу Сайид кене сёзге киришти:

– Бекир агъа Озъбекистанда илим ве тасиль ичюн япкъаныны айтаджакъ олсакъ... тенъештирмеге ич де къоркъмам, онынъ фаалиети Исмаил бей Гаспринскийнинъкинден эксик дегиль. Бизим айдынларымызнынъ фикри бу.

Хабиб бу макътавдан Чобан-заденинъ гуръ къашлары чаткъаныны абайлады:

– Абу-Сайид, джаным, сен билесинъ де, арткачнен кыймет кесильгенини ве тенъештирмелерни севмейим.

Гаспралы тек кырымларгъа дегиль, озъ фикирилерини, гъаелерини, языларыны ярымададан баягъы тыш, Туркистандан Тюркиегедже даркъатып, ирфан кетирди.

Мен исе?

Эгер сиз экинъизнинъ акълынъызда меним ишлерим къалса, омрюмни зая яшамадым, деп саярым.

Иште, о къадар хассас да олмайыкъ...

Хабибни эски диван, маса ве орьме кьолтукъ олгъан кичкене кошедеки одада ерлештирдилер.

Чобан-заденинъ кабинетинден оданы индже дивар айыра эди, онынъ ичюн Хабиб адымларыны ве оксургенини, оджа башынен ишке далгъаныны ве та гедженинъ дер маалинде, къадыныны уятмамакъ ичюн кене шу одада дивангъа ятып юкълагъаныны эшите тургъан.

Бираз вакъыттан исе, сабагъа якъын къапусы астындаки арадан Хабибнинъ бурнуна кьою пиширильген гузель къаве къокъусы ура эди.

Хабиб хатырлады: Чобан-заде Ташкентте, Бухарада – симитли пите, къаймакъ, алма, йымшакъ армут киби наджиз, сагълам аштан мемнюн, ич де ашкъа къуйпалангъан инсан дегиль эди.

Эвде де Ругие ханым акъайынынъ куръсемейджегини билип, чокъ назландырмай тургъан.

Ондан гъайры, Мельпомена хызметчилерининъ чокъсу киби, оджакъ башында вакъыт кечирмеге севмей эди.

Онынъ зариф кьоллары тек санада сесине уйып, ишмар этмеге яратылгъан киби олып, ашханеде савутлар элинден къопкъанда, оджакъкъа авдарылгъанда, кабинетте китап башында вакъыт кечирген Чобан-задени къырылгъан чанакъ я да фильджан сесинден абдырата тургъан.

— Чолпа, — охшап айта эди акъайы, савут парчаларыны топлагъанда.

Саиплерни зорламамакъ ичюн Абу Сайид къайтмагъа ашыкъты:

– Достум Бакуны корьмеге, ялыдан кезмеге, денъиз авасындан нефес алмагъа истеген эди...

“Тандыр” къавесини де зиярет этерик, долманынъ дадыны бакъарыкъ.

Сонъ Ичери-шехернинъ сокъачыкъларындан кезерик, Хабиб, институт китапханесине бир сокъулса, илим ташыны кемирмеге башласа Ичери-шехерде кезмеге вакъыт тапмаз...

– Кезин де келинъ, – кьолтутты онъа Чобан-заде, кьорантаны ашханеде невбеттеки парланаджакъ савуттан кьуртармакъ чаресини тапкъанына къыймет кесерек, Ругие ханымгъа ифадели бакъты. – Ич бир университетте ойле китапхане ёкъ...

Тюрк, арап, фарси тилинде эльязмалар топламы исе мен чалышкъан ич бир китапханеде ёкъ эди.

Не Акъмесджитте, не Ташкентте, не де, эмир Тимурнынъ буйругъы иле эписи фатих этильген мемлекетлерден эльязмалар кетирильген Самаркъандда...

II

Бекир оджанынъ узерине Бакугъа ильк келишинде Хабиб эки ай китапханеден чыкъмады десенъ, оладжакъ.

Саба эрте келип, китапхане яры гедже маалинде къапатылмагъандже, анда булуна эди.

Учъ кениш залда тынчлыкъ ве къынтавлы муит укюм сюре, тек арды-сыра орьнекли таванда ель къувгъан ельпазеден китап яки меджмуанынъ саифеси шытырдагъаны эшитиле тургъан.

Бухарадаки къачкъан эмирнинъ Аркъа сарайыны я да Калян медресесинкине ошагъан керем ешилъ тюсте мермер орьнеклернен яраштырылгъан гянч диварлар да хусусий къынтавлы муитни ярата эдилер...

Аюрлы маса лампасы ярыгъында китап я да меджмуалар тикими устюнден чалышкъан Хабиб кимерде янына яваштан келип токътагъан Чобан-задени бир кереден абайламай эди.

Лекциялар арасында, аудиториянынъ шаматасындан болдургъан оджа мында сукюнеттен кейф алмагъа келе тургъан.

Онынъ джаны эп тынчлыкъ, тескин истей, бу, атта энъ къадимий Баку университети киби “бильги оджагъы”ны озъ алына къалдырмагъан, теляшлы вакъытлар яраткъан кескин къабаатлавлар, топлашувларнынъ гъай-гъуйындан къачмагъа тырыша эди.

Макътавгъа къызгъанч олгъан Бекир агъа Хабибнинъ огюнде тургъан бир десте китапларны козьден кечиререк, юрек бере тургъан:

— Сизинъ тирнеклигинъизни анъламакъ къыйын дегиль, достум.

Озюм де Будапештте студент олгъанымда ве университет китапханесине къатнамакъ рухсетини алгъанда, башта китап айырмай, не тапсам, оны менимсемеге тырыша эдим... урьметли оджам, шаркъшынас профессор Ньюла Немет незакетнен, фикрини манъа мусаллат этмейип, баш ёлумны косьтермегендже...

Ондан сонъ ве чокъ йыллар девамында бу мевзуда чалышмакътам.

Будапешт университети о заман тюрк шаркышынаслыгынынъ меркези сайыла эди.

Меним, Къырымдан кельген студентнинъ устазлары арасында Дьюла Месарош, Игнац Кунош, Армин Вамбери, Лайош Лигети кибилери олды... — Чобан-заденинъ сесинде Хабиб шу, Будапештте кечкен йыллар акъкъында хатырлавда теэссюф аэнкини эшите тургъан...

Китапхане къапатылгъан сонъ, Апшероннынъ къаранлыгы иле толугъа, фенерлернинъ ярыгъындан зорнен корюнген сокъкълар бою къайткъан бухара мусафири, Кооперативнаядаки эвни ялынъыз озъ сезгирлиги иле тапа эди.

Къулакъларында чынълагъан трамвайнынъ маден гъыйчылдысы, къапудан киргенинен, ятакъханеден эшитилген фортепианоннынъ де назик, де котеринки давушларынен денъише тургъан.

Таныш олмагъан нагъме, амма Хабиб энди биле эди: опера театринде Октябрь инкъилябынынъ невбеттеки, он секизинджи йыллыгына аджеле суретте музыкасыны Узеир Гаджибеков язгъан “Лейля ве Меджнун” саналаштырмасыны азырлайлар.

Бу акъта эр бир трамвай дурагъында, фенер дирегинде асылгъан ренкли реклама плакатлары бильдире эди...

Ругие ханымгъа Лейлянынъ фаджиалы ролюни ишандылар.

О, санагъа ильк чыкъаджакъ киби, пек эеджанлана, озюнден мемнюн олмагъанындан назлана, эвде кергин бир вазиет ярата ве оны къайгъыргъан акъайына да кедер эте, эсас ишинден дикъкъатыны чеке эди.

Кимерде Ругие ханымнынъ эеджаны юксек давушнен йырлагъанда пек къозгъай тургъан.

О заман фортепианоннынъ къапагыны тарс этип къапата ве бутюн квартирагъа къычырып, Бекир агъаны ярдымгъа чагъыра эди.

Озюни начар ве имаесиз косътермеге севген дюльбер къадын омюр аркъадашындан къарарнен йигирми йыл яш олып, атта яры геджеде акъайына раатланмагъа бермей, сабырлы динълейиджисине арияны сонъуна къадар динълеттире, кимерде исе онынънен берабер дуэт олып, Меджнун ариясыны йырлата тургъан.

Бекир агъа, къамбурайып, таягына таянып фортепианоннынъ четинден тура, сеси ярамай олгъаны ве музыкагъа истидатсызлыгы ичюн озюни акъламагъа тырыша:

— Не айтасыз шу, джаным, менден Меджнун олурмы?!
Сес безлеримни зорласам, ярын, биринджи лекциядан сонъ институттан зенааткъа уймагъаным ичюн къуварлар... — Ве, тамагъыны темизлеген киби, оксюрп, кычырыкъкъа ошагъан юксек давуш иле нота чыкъара эди.

Ругие ханым яры шакъа иле:

– Билем, Алла сизге не сес, не де къатты табиат берген.

Кафедрадан къувсалар... янгъынсёндюрджиджи олып барырсынъыз...

Апшеронда ермай къуллелерини сёндюрмеге...

Меним пешимден юргенде эвленмезден эвель маджар ордусында хызмет эткенинъиз, немсе бомбасындан контузия олгъанынъыз акъкъында айта эдинъиз, атта ольдюрильген достунъыз ерине пулемёттан атмакъ меджбур олгъанынъызны...

Яш эдим, садедиль.

Сизге инана, акъикъий эр киши, деп белледим сизни, акъикъатта исе йымшакъ табиатлы зиялы олып чыкътынъыз, не сесинъиз бар, не музыкагъа къабилиетинъиз...

Бунъа Бекир агъа барыштырыджы сеснен джевап бере тургъан:

— Джаным, опъкелеменъиз: Алла не берген олса, о бар, не зияде — не эксик.

Истесенъиз, достум, догъаяткъан йылдыз Рашид Бейбутов иле анълашайым... келир де, сизнен арияны йырлар — эм бир дане дегиль, не къадар истесенъиз, усталыгъынъызны пекиткенинъиздже.

Сиз синъирленгенинъизни анълайым — единджи ноябрьде укюмет ложасында мындаки бутюн акимлер — Багировдан башлап, отураджакълар, эм де сизинъ мухлисинъиз генерал Сумбатов иле, — Ругие ханымны тынчландырмагъа тырыша тургъан акъайы, къолундан тутып.

Озюни санки Олимп устюнде дуйгъан опера перисининъ фикриндже, опера ве балетке етеджек дигер музыка жанрлары ёкъ эди.

Онынъ ичюн сокъакъларда ве базарларда белли олгъан Бейбутовгъа скептик мунасебетте эди.

Рашиднинъ мухлислери исе, яшы-къарты гедже-куньдюз, иште ве окъуш тенеффюслеринде шенъ “Аршин мал алан”нынъ нагъмесини тильден тюшюрмей тургъанлар.

— Ёкъ, — озъ назыны къадынджасына ифаде эте эди Ругие ханым, — Рашид манъа тенъ дегиль.

Сиз — чюрюк зиялы, акъылынъызны башынъызгъа топланъыз да, озюнъизни ашкъ атешинде янгъан Меджнун киби ис этинъиз.

— Айды, — разы ола эди Бекир агъа, — Навои ве Низамининъ шириети акъкъында бедава язмагъан экеним... мына керек олды... — Ве юксек нотаны аладжакъ олып... — Екянем...

Куньдюзимни гедже асрети сарды...

Козъ яш олып юрегим ириди...

— Янълыш йырлайсыз! — Ругие ханым ачувланып, фортепианоннынъ къапагъыны тарс этип къапата ве тура эди...

Лаф-лафтан анълашылмамазлыкъ бири-бирини севген рефикълернинъ оюнына чевириле тургъан.

— Манъа зияде Топегёз ролю келишир эди... онынъ Софоклнынъ персонажы Полифен иле бес-бедава къыясламайлар.

Разы олунъ, джаным, сизинъ йымшакъ табиатлы зиялынъыз зенаатдашлары арасындан, атта башта манъа оджа деп, сонъ саткъан душманларнынъ сычан къармалавларына къулакъ асмай...

Апай-акъай бираз тынчланмакъ ичюн дивангъа отургъан сонъ Бекир агъада дигер бир гъае пейда олды:

— Джаным, Узеир иле лаф этип бакъынъыз - бельки, онда Деде Коркъуткъа музыка язмакъ авеси олур...

Аджайип къараманий драма!

Урузны ойнамагъа ве сизинъ паклигинъизни ве исметлигинъизни яман тиллерден къорчалап, джефакар олюмнен ольмеге азырым.

Мен беллесем, Гаджибеков сизге, о консерваторияда окъуткъан энъ эйи талелесине ред джевабы бермез.

— Хм! — Ругие ханым бундан къанаатленмейип, омузларыны ойнатты, — сизинъ бу джефакар олюм акъкъында сёзлеринъизни ич де бегенмейим, сонъки вакъытта бу акъта чокъ айтмагъа башладынынъыз...

Чобан-заде башыны төбен алды, амма озюне тез келип, апайына гонъюль бериджи кулюмсиреди.

– Эм де, умумен алгъанда, – девам этти Ругие ханым, хошнутсыз мевзудан иракъ олмагъа истеп, – Гаджибеков Деде Къоркъуттан авесленмез.

– Бу да не ичюн?

Бу айретлендириджи бир мевзу да...

– Разы олмаз, якъында театримизге Наркомпростан насылдыр вазифедар мемур кельген эди ве бизим репертуарымыздан къанаатленмегенини айтты.

Санада тек шимдики шанлы куньлерден алып кеткен эскилик бар эмиш, мырзаларнен кулаklarны косътерип, чешит тюрлю зиянкярларнен, буржуа миллетчилернен, ишчи ве кой яшларны ябанджы гъаелернен толдургъан эски сыфаттаки профессорларнен курешини косътермек керек экенмиз... ойле бир ресмий тарзда лафлар юрсетти...

— Ан-на-а..., – девамлы созып айтты Бекир агъа, – олар башкъаджа япып оламайлар... гъарип, гъарип бизим тилимиз...

Янгъын сёндюриджиликке авушмакъ тамам вакъыт кельди, — къошты о истизанен.

Озь ханесинде чалышкъан Хабибге апай-акъай арасында олгъан субетнинъ тек айры ибарелери эшитиле эди.

Оджанынъ кабинетине о тек чагъырылгъан вакъытта, буюк мукъайтлыкъ ве сайгъынен кире тургъан.

Оджасы тосат-тосат о, китапханеде насыл ишлер беджергенини бильмек истей эди.

Дикъкъатны алмасын, деп, спартан шекильде донатылгъан кабинетте арткъач шейлер ёкъ эди.

Будапештни анъдыргъан мемлекетлери маджар тилинде язылгъан глобус тургъан язы масасы.

Пенджеренден сол тарафтан черчиведе бираз къараргъан къоранта фоторесими: диванда сербест отурышта чобан къалпакъта Бекир агъанынъ бабасы Ваап агъа.

Ондан Бекир агъа ачыкъ раат бакъышны, кенъ омузларны ве кучлю ишчи колларыны мирас алгъан.

Акъайы янында яшлыгъында дюльбер олгъаны корюнген орта яшлы, наджиз, сагъ къолундан чечекли шал атлаткъан ве фес кийген къадын — кабинет саибининъ анасы.

Ашагъыда фоторесимнинъ черчивесинде тырачлыкънен, суялесине садыкълыкъ анты киби Бекир агъанынъ къолунен чыкъарылгъан язы:

“Не мырза бар союмда, не айтувлы бир бай,

Бабам бир чобан, анам Зайдабай!”.

Къоранта ресиминден бираз сагъджа кабинетнинъ босагъасындан атлагъанынънен козьге чарпкъан чешит ренкли Кубачи устанынъ буюк табагъы.

Устюнде Эльбрус этегинде тургъан атлы.

Бу Кавказгъа баргъан экспедициядан хатира эди.

Чобан-заде анда дагълыларнынъ тилини теткъыкъ эткен, хавфлы ёллардан юрип, аулдан аулгъа кечип, ерли фольклор — Дагъыстан, Чеченистан, Шималий Осетиянынъ тюркtilли къумыкъларнынъ тюркю, эфсанелери, аталар сёзлерини огренген эди...

Истемеден эшиткен апай-акъай арасында олгъан субетлер, чешит маналар тапып олюмни анъгъан акъайына япылгъан опькелев Хабибде оджасы ичюн теляш догъура тургъан.

Эписинден зияде мусафирге эфенди айткъан сёзлери тесир этти:

– Гъарип бизим тилимиз...

Янгъынсёндюриджиликке авушмакъ тамам вакъты кельди...

Шакъанен айтылгъан сёзлер олса да, эр бир шакъада догъру лаф бар дегенлери киби...

Ичинде алевленген теляштан къуртулмакъ ичюн кабинет саибинен оны, сийрек китаплар топламындан гъайры китапханеде эеджанландыргъан меселенен болюшмеге ашыкъты:

— Окъув залында ерли дюльбер студент къызлар о къадар чокъ экен, догърусыны айтсам, кимерде меселем устюнде акъыл топлап отурмакъ зор келе... сиз лекциялардан сонъ Ташкенттеки студент къызларнен оюн тегерегинде ойнагъанынъызны хатырладым... бесе-белли, мында да талебелеринъиз, оларны «Джейрани», «Лалэ», «Бяневше» оюнларына давет эткенинъизде айретленедирлер.

— Бу хаста аягъымнен насыл оюн олсун... акъсасанъ — устюнден кулерлер. — Оджанынъ талгъын козьлеринде шенъ кыгъылчымлар пейда олды... кьолю озю масадаки глобускъа узанды... шар негизи этрафында бир, эки айланды. Эм де санки къан тѣкюльген, кьою кырмазы боянен бельгиленген Къырым ярымадасы олгъан тарафынен чевирильди.

Буюк бир дикъкъатнен, козьлеринде эеджаннен ватанынынъ чевре сызыгъына бакъып къалды.

Чобан-заде хаялында сынъырсыз чѣльни, озюни кер ат устюнде кьойларны сувармагъа кеткенини тасавур этти... Сесинде асретлик иле:

— Меним лялем анда, чѣльде, дигер солукъкъан чечеклер арасында джоюлып къалды... басиретли Номан Челеби киби бунда инсан фаджиасыны коръди.

Джан сыкъыджы фельсефелерсиз.

Апансыздан айткъаныны исбатлап, Челебининъ “Сары тюльпан” шииринден сатырларны окъуды...

Ильк бааръни мужделеген сары тюльпан.

Бари бойле солмасайдынъ ич бир заман.

Гузель ёсма гонъдженъ иле эндамынъны

Эр кунъ север, опер эдим сайгъыларман.

Гонълюмизни хошландырдынъ, сары тюльпан.

Мен де сени эльден, ельден кыскъанман.

Узакълардан, коктен, ерден чокъ суемен,

Кунешлернинъ йылдызларнынъ козю яман.

Сары тюльпан, багъчамызны шенълердирдинъ,

Пек аз заман кырыкъ гонълюм эглендирдинъ,

Ярын сен де кырыладжакъ, оледжексинъ,

Оледжексенъ, бу джихангъа ничюн кельдинъ...

Онынъ сесиндеки аэнк Хабибни ойле пек тесирлендирди ки, сукюнет укюмсюрген сонъ биле бир сѣз айтамады, козюне толгъан козьяшлардан богъазыны томарчыкъ тыкъаткъан киби олды.

– Оджам, сиз Челебини биле эдинъизми?

Бекир агъа бир кереден джевап бермеди, масада олгъан насылдыр кягъытларны синъирли саифеледи, кабинет бою адымлады.

— Эбет, — кыскадан деди о, пенджерге бакъып. — Кырымны он секиз сенеси кылагъан кызыл боранда кыбаатсыз эляк олды. — Ве “кызыл боран” мевзусында башкъа лаф этмеге истемейип, отурды.

— Он секиздеми? — тюшюнджеге далып, текрарлады Хабиб, онынъ мийинде апансыздан кыяслав пейда олды... шашыладжакъ шей!

Тамам шу он секиз сенеси сиз “Тувгъан тиль” шиирини яздынъыз!

Бу шиирни китапханеде олгъан сизинъ шиирлер джыйынтыгъынъызда таптым...

О заман сиз Будапештте окъуй эдинъиз...

Чобан-заденинъ козьлери джыллы олды, санки насылдыр агъыр, кыальбини сыкъкъан бир шей оны бошаштырды.

— Э, о заман мен йигирми беш яшында эдим... тамам сенинъ шимдики яшынъ, достум, — деди оджа.

— Йигирми беште!

Гениаль! — Эеджанлы Хабиб не ичюндир кыапугъа таба адымлады, амма бираздан, озюне кельген киби олып, маса янына кыайтты. — Сизинъ джанынъыз агъырмазмы...

«Тувгъан тиль»ден ойле бир тесирлендим ки, башындаки сатырлардан сонъкисинедже... джесаретленди де... бельки, кыба олды, талебеджесине... терджиме эттим, — эеджанындан сеси токътап-токъатап, анълатмагъа башлады Хабиб. — Изин берсенъиз, терджимесини окъуйым...

— Кыана-кыана, пек меракълы, — яры шакъанен деди Чобан-заде. — Мен сизге теклиф эткен Шпенглернинъ «Авропанынъ сонъу» ишини огренмек ерине! — Ве, апансыздан кыапуны ачып, апайыны чагъырды:

— Ругие ханым, тюневин, сизинъ баскъынъыз иле бизде музыка акъшамы олгъан эди, бугунъ исе, аваленъизге — шиириет акъшамы...

Ругие ханым, кыолларыны ашхане оглюгине ашыкъчанлыкънен сюртип, кабинетнинъ босагъасындан енгиль юрюшнен атлады:

— Авеслендириджи... бу оджакъ башында кулинария акъшамындан меракълыджадыр.

— Эбет, бунда шубе бармы? — Онъа уйып, джевап берди акъайы. — Сизден, бу акъшамнынъ программасы боюнджа, айдын, артистик сыфатта, гъает буюк ифаденен «Тувгъан тиль»нинъ иджрасы талап этиле.

Эм шашыртманъыз, муэллифи Шекспир де дегиль, Пушкин де дегиль... муэллифи юкъарыда анъылгъан деалардан баягъы наджиз бир адам.

Лютфен... сизден сонъ исе Гулям-заде озъ терджимесини окъуйджакъ...

Ругие ханым, эеджан косътермейип, элесленмеге тырышып, маса четинден турды...

– Хатырланъыз,– юрек берди онъа акъайы. – Сиз музыкагъа чевиреджек шиир олмады я.

Башындан огюни алмакъ истесем де...

Ругие ханым къолларыны коксюнде хачлады, акъ джигерлерини авагъа толдуруп, яваштан башлады:

– Сени мен Къырымда, Къазанда таптым,

Джюрегим къайнагъан, ташкъанда таптым,

О музыкада киби шиирнинъ давуш аэнкини, везинини сынап бакъы ве, язгъаныны гъайрыдан яшап кельген акъайынынъ назары астында енгиль ве аэнкли девам этти:

– Джат эльде мугъайып, аджынып джюргенде,

Умютим, хаялым шай тюшип джюргенде,

Мойнунъа сарылдым дертимни айтып.

Бир гузель сёзинъмен озюме къайтып...

Сиирли сес Хабибни сарып алды.

Озю бунъа эмиет бермейип, шиирнинъ эр бир сёзюни ялынъыз дудакъларынен текрарлады...

— Бир гузель сёзинъмен озюме къайтып...

Джырларынь болмаса, манень болмаса,

«Джурт» деген сёзинъмен джурек толмаса...

Сеске берилип, санки сиирли сес артындан чеккен киби, Ругие ханым масанынь де бир тарафындан, де дигер тарафындан туруп, апансыздан токътады.

Санки оны, садедже динълейиджи олмагъа даянмагъан акъайынынъ къарыкъ сеси везинден урды.

– Ах, насыл джурермен гъурбет якъларда, – эеджанланып деди оджа ве рефикъасыны шиирий дуэтке давет этип, ишмар япты...

– Танышсыз-билишсиз, ят сокъакъларда.

Бильмиймен, тюркми, татармы адынъ,

Ругие ханым акъайынынъ сесине уйгъанынен экевлешип айттылар:

Бек яман татлысынъ — Танърыдан тадынъ,

Тюрк де, татар да сенинь сёзлеринъ...

Бекир агъа енгильден башыны саллап, талебесини де кьошулмагъа давет этти.

Оджа утангъан Хабибни омузларындан кьучакълады.

О, исе даа пишкин олмагъан, огълан бала сесинен кьошулып, трио яратты:

– Экиси эки чифт мунълы козлеринъ...

Виана огюнде, къазакъ ичинде,

Берабер джырладыкъ Хинлерде, Чинде...

Анъласын бир, сени душман да сюер.

Бир джаныхъ сёзинъмен джуреги ирер...

Истиймен озинъни эр якъта коръмек...

Эр ерде инджинъден дестанлар орьмек...

Къушларгъа къашкъыргъа уйретсем сени...

Къальбининъ энъ терен теллери кьозгъалгъан Хабиб трио дуйдурылмайып дагъылгъаныны сезмедиди.

Бекир агъанынъ ишмары иле Ругие ханым сусты ве шиирнинъ эр бир сатырыны гъайретнен сёйлеген Хабибнинъ тель киби тартылгъан сеси аэнкини динълеп къалды:

– Сен болсанъ оксюзнинъ гонълюнден сюйгени...

Джамиге, михрапкъа сарайгъа кирсенъ,

Денъизлер, чёллернинъ четине ирсенъ...

Сенинъмен душмангъа ярлыкълар язсам,

Къарувлы сёзюнъмен гонълюни къазсам...

Къабримде мелеклер соргъу сораса,

Азраиль тилимни бинъ кере тораса.

«Озь тувгъан тилимде айт магъа» — дермен.

Озь тувгъан тилимде джырлап олермен...

Гонълюмни къайгъылар кемирив тургъанда,

Халкъымнынъ тынышсыз йылдызы ургъанда,

ТУВГЪАН ТИЛЬ — башкъасы акълыма кельмий.

Бир буюк сырымсынъ душманлар бильмий...

Хабиб сусты ве тек шу дакъкъасы апай-акъай диванда отурып, онынъ айретли ифадесини дикъкъатнен динълегенлерини анълады.

Шашмалап ве утанып:

– Эфенди?! – деди о тааджипнен.

– Аферин!

Шаане!

Пек темиз тильде айттынъыз, догърумы, ханым?

Ругие ханым джевап ерине эеджанлы ве гуръдели эльчырпты...

- Мен эминим, терджимеси де тамам ойле аджайип...
Хайырлайым...
Бекир Ваапович, дикъкъат...

III

Къыт студент стипендиясына - эбет - Ичери-шехернинъ энъ айтувлы турист нокътасы олгъан "Тандыр" къавесинде байрам япылмаз.

Бунъа бакъмадан, киногъа бармакътан, дигер эгленджелерден икътисат этселер, Абу Сайид ве Хабиб, узакътан долма къокъусыны алып, «Тандыр»да маса башына кече эдилер.

Таныш аякъчы - мераметли шишман Мехмет оларны муляйим тебессюм иле къаршылай эди.

Абу Сайид, оны достчасына омузындан таптап, эр сефер бир ибарени айта тургъан:

% - Не бар, не ёкъ, Мехмет бей.

Бу сефер де Мехмет, чанакъ-чельмекни чевиликнен донатып, зораки кулюмсиреди.

% - Шэраб... Озьбек ве азербайжан халкъларынынъ достлугъы сагълыгъына! — достане чертип алды Абу Сайид Мехметнинъ къолуны.

Обири хошнутлыкънен башыны къакъты ве сымарышны эда этмеге ашыкъты, Абу Сайид исе Хабибге анълатты:

- Азерилер джумерт софралар сымарлагъанларны севелер, бизим софрамыз бугунъ берекетли оладжакъ, деп беллесин.

Билесинъми, мен Бакугъа ильк кельген йылым Бекир агъамызнен мында сыкъ-сыкъ келе тургъанмыз.

Лякин сонъки вакъытта экимлер Бекир агъама ашкъазаны агъыргъаны себебинден диета тутмагъа тевсие этелер, Кисловодск сувларына барып кельмеге...

Чобан-задени коръсе, Мехмет бир кереден чапып келе, букюлип, селям бере тургъан: "Селям, эфенди"...

Мусаллат этип, сагълыгъы акъкъында баягъы вакъыт сораштыра, эписи сой-акърабасыны анъа, ойле бир гъайрет эте эди ки, санки эписини шахсен биле: — Кыйметли эшинъизнинъ сагълыгъы насыл, икметли бабанъыз сагъ-селяметми, я иманлы мусульман ананъызнынъ?

Хабиб, тепсидеки орьнеклерге бакъып, къайгъынен деди:

- Бекир агъанынъ сонъки вакъыттаки кейфи мени раатсызлай - сыкъ-сыкъ гонъю къырыкъ юре.

Буны Ругие ханым да сизди - олюм акъкъында айта, санки мен Ташкентте бильген оптимист, джошкъун, омюрсевер агъамызны денъиштиргенлер.

Абу Сайиднинъ мезекли кейфи денъишти, о бир кереден джиддийлешти:

– Бекир агъа ичюн сонъки эки-учъ йыл чешит огъурсызлыкъларнен пек къайгъылы олды, агъыр, пек агъыр...

Башкъасы олса, чокътан йыкылыр эди...

Дарбе артындан дарбе - эм де эписи дарбелер Къырымдан.

Пек хырпалай, юрегинде яра ача.

Насылдыр “Енъи дюнья” газетчиги эр бир санда профессорны фитнелей... пантюкист, миллетчи, миллифиркъаджы — бакъса, насыл сёз уйдургъанлар! — экен эмиш.

Совет акимиятине тек тильде садыкъ эмиш, — Абу Сайид, чевре-четке бакъынып, Хабибнинъ къулагъына эгильди. – Ондан сонъ кене шу «Енъи дюнья», замангъа коре, эр шейге “халкъ сеси”, деген ад берип, Керич маден заводы эмекдарларынынъ беянатыны дердж эткен — шунъа бакъ — эмекдар халкъ — эписи ишчилер къырымтатар...

Анда тек нелер ёкъ: миллетчиликте, сиясий экикъоллукъта къабаатлав...

Ондан сонъ бу газет сачмалавы чагъырувнен екюнлене, шимди киби, сёзме-сёз акълымда къалды — «Девлет маден заводынынъ ишчи татарлары совет акимиятининъ аит органларына мураджаатта булунып, Чобан-задени профессор унванындан марум этмекни талап этелер”.

Дуясынъмы, завод парткомынынъ канцелярия услубини!

Санки яры ач яшагъан ишчилер маден оджакъларынынъ сыджагъындан зияде сиясий экикъоллулардан чыкъкъан миллетчиликнинъ ёкъ этиджи сыджагъыны корелер...

Къырым эмекдарларынынъ “Баку ишчиси” газетинде басылгъан даа бир мектюплеринде — профессор унванындан марум этмек ве Баку институтындан, озъ къысметини озю тапсын деп, къувмакъ меселесини къойдылар...

Хабиб, эшиткенинден шашып, ашкъа къулакъ асмай, огге берилип, къатып къалды.

– Бу эмекдарларнынъ зурна сеси киби давушлы хоры, антик фаджиясында киби.

Аилевий огъурсызлыкъларнен бир кельгени де тесадуфен дегиль...

Къайдандыр бильмем, чокъ йыллар сусып тургъан эфендининъ биринджи къарысы Дилъра Булгакова башыны котерди - о, Хатидже Булгакова алякъалы Кирпаковский

князларынен сойлуқта олган Исмаил мырзанын асыллы сюлялесинден ола экен.

Бизим заманымызда, адет узьре, аякъ бити башкъа минди дегиль де, баштан аякъкъа тюшти, десенъ оладжакъ, — аджджы кульди Абу Сайид. — Дуясынъмы, профессор унванындан марум этмек, институттан къувмакъ, фитнелемек, ашаламакъ истегенде, эмекдар халкънен князь асыллы задеканлар насыл бирлеше экен?..

Иште... — Абу Сайид богъазыны чайкъамакъ ичюн фильджандан шербет ичти, дикъкъатлы Мехмет исе сувугъан долмаларны алып кетип, ашханеден сыджакъ союны кетирди. — Иште, ана шу къадынчыкъ, яш Ругие ханымгъа кунълеп, бутюн ачувыны Бекир агъанынъ башына ягъдырды...

Олян, къартайгъан, ташлангъан апайлар кунъджюликтен пек къоркъунчлы ола экенлер!

Буны акълында тут, достум...

— Озьбек къадынлары юваш, — деди Хабиб.

— Ан-на-а, ювашларны атешке де, сувгъа да ёлламакъ мумкюн.

Бунынъ ичюн партком бар...

Диляра иле алектелерни, Кооперативнаядаки эвине баргъанымда, мен де корьдим...

Бекир агъанен эвлиликте оларнынъ Мустафа деген огъуллары олган.

Диляра иле айырылышкъан сонъ Мустафа бабасыны пек севгенини корип, Бекир агъа оны янына алды...

Диляра махкеме вастасынен огълуны озюне къайтарды...

Лякин бундан сонъ энъ ашша ве Бекир агъа ичюн агъыр заман башланды - Диляра Къарасувбазарда къолум-къомшудан юрип, оджаны фитнелей, къаргъай эди...

Баласыны не маневий, не малиевий джеэттен теминлемей, деп акъаретледи...

Къавгъаджы институт ректорына, атта Багировгъа мектюплер язып башлады.

Онынъ арекетлери нетиджесинде “Баку ишчиси”нде фельетон басылды...

Иште, бойле!

Бу да етишмегени киби, Бекир агъанынъ сагълыгъына къыз къардашы Зелиха Чобан-заде иле вакъиа тесир этти...

Къырымдаки душманлары Зелиханы агъасына фитне атмагъа, ерли газетлерде алып барылгъан гъарезкяр кампаниягъа къошулмагъа меджбур этеджек олдылар.

Зелиха ханым, акълымда, бир къач кере агъасына келип кеткен эди...

Эеджаннен аякътан башкъа минген битке ошагъан къызыл профессорлар, келирли ерлерни алгъан сонъ, нелер япкъанларыны, оджалар арасында ишанчсызларны къыдырып тапып, укюмдарларнынъ чанакъяларлары олгъанларыны икяе этти...

Бу джедвельге о да тюшкен.

Къарасувбазар мектебинден къувгъанлар...

Маскъаралыкъ!

Софра янына дуйдурмайып кельген Мехмет “Тандыр”нынъ даимий муштерилери ойле де татмагъан ве сувугъан долманы алып кетти.

Сыджакъ союны кетирди, бурунларына нане ве кескин бахарат къокъусы урды.

Абу Сайид тепсиге къолуны узатты, амма къолундаки къашыкънен кене къатып къалды:

— Зелиха ханым агъасынен эм корюништен ошайлар, табиатлары да оларгъа Ваап агъадан кечкен — садедиль, джесюр ве тирнекли.

Къардашы агъасында мусафирликте олгъанда Ругие ханым иле Зелиха ханым бири-бирине урметнен бакъа, муляйим лаф эте эдилер.

Лякин табиатлары эм де саалары чешит-чешит олгъанынданмы, араларында насылдыр кергинлик дуялды...

Зелиха ханым агъасынынъ апайы оны яхшы бакъмай, деп тюшюнгендир... акъикъий къырым къадыны киби дегиль — вакътында ашатмаз, охшамаз, джанына мельем олмаз.

Лякин бу бош шей — апайларнынъ табиаты ойле! — саллады къолуны икяеджи ве апансыздан, болдурткъан яман хаберлер ве Бекир агъанынъ хасталыгъандан тыш, бир шенълендириджи шейни хатырлады.

— Достум, къаранлыкъ куньлер арасында кунеш нуру да йылтырады... эфендимизни къыздыргъан ве умют берген бир хабер — Чобан-задени Париж лингвистик джемиетининъ азасы оларакъ сайладылар, дюньяда энъ белли тюркшынаслар Армин Вамбери, Игнац Гольдцингер, Дьюла Немет, Радлов Василий Васильевич кибилер сырасына кечти, Махмуд Къашгъарлынынъ улу ишини азербайджан тилине терджиме этмеге башлагъанымда тамам оларнынъ китапларындан файдаландым.

Апансыздан, тепсини четке чекип, шапылдады ве къычырды:

– Браво!

Машаллах!

Буюкбурун Париж биле къазанчларыны таныгъан Бекир Чобан-задеге шан-шуретлер!

Ойле шаматалы къуванчны беклемеген «Тандыр»нынъ даимий муштерилери шашып, оларнынъ софрасына таба чевирилип бакътылар, Хабиб исе семетдешини омузларындан къучакълап, къалпагъыны сыйпады.

Къычракълав ве шапылдыны эшитип, шашмалагъан Мехмет чапып кельди.

Онынъ шашкъын козьлери, яры ачыкъ агъзы: “Даа бир шейлер сымарлайджакъсызмы?”, — деп сорагъандай эди.

IV

Семетдешлер “Тандыр”дан чыккъанынен, Абу Сайид Хабибнинъ къайгъылы сымасына бакъып, о бир ерге ашыккъаныны анълады.

— Къайда кетесинъ?

Хабиб индемейип, джебинден дёрт букленген кягъытчыкъны чыкъарып косьтерди, онда онынъ къолунен язы бар эди: “Бугунъ, 26-сентябрыге вазифе”.

Абу Сайид джедвельни козьден кечирди:

— Эбет...

Бекир Чобан-заде “Элифбе бирлиги сингармонизм ве фонетика мисаллери”, «Кизил Узбекистон» газети, 1928 сенеси 18-январь саны.

Анъладым, институт китапханесине ёл алдынъмы — “китап къурту”...

“Китап къурту”, бу профессорнынъ вазифеси дегендай, омузларыны сыкъты ве тылсымлы кельген «сингармонизм, сингармонизм» сёзюни текрарлай берип, трамвай дурагъына чапып, кетейткъан накълиеге секирип минмеге етиштирди, пенджересинден эшине къолуны саллады.

Хабиб биле эди: шу базар акъшамы Чобан-заденинъ эвине семетдешлери — чешит вакъытларда, Бекир агъанынъ пешине тюшип, Бакугъа авушкъан Къырым оджалары ве студентлери келеджеклер.

Мусафир толу эвде Къырымнынъ такъдири, шенъ шакъалар, кулькю, энъ муими исе - ана тилинде субетлер оладжакъ, бойле вакъытларда эв саиби огде белли олмагъан торс келеджекни мужделеген къарышыкъ куньлерден бираз раатлана эди...

Ругие ханым да ильхамлангъанындан о яш мусафирлер кельмесине къувангъаны дуюла эди, мытлакъа фортепиано чала, бири-бири артындан чевик пармакълары астындан «Той олсун Гунеш» йырынынъ шень, «Ильхам» оюнынынъ къыгъылчымлы давушлары чыкъа тургъан...

Догъмуш Къырым нагъмелеринден рухланып, мусафирлер чифт-чифт тар фезада оюн тёшей, бири-бирининъ аякъларыны баса ве дакъкъа сайын афу сорай эдилер...

Эбет, энъ истенильген кавалер эв саиби эди.

Агъыргъан аягъына къулакъ асмайып, Бекир агъа, даветни къабул этерек, незакетли баш эге, оюн чифти исе севингенинден къызарып, оюн тёшей, тамам Ташкент студентлери невбетке тизилип, бойле кавалернинъ дикъкъатыны озю ичюн буюк шан, деп сайгъан вакъытларыны анъдыра эди.

“Э, йыллар, йыллар. – Кокюс кечирди Хабиб, диваргъа ясланып ве эки козюни оджасындан алмайып...

Онынъ назары ойнагъанлар арасында гуръ сачлары шень, садедиль чересине ярашкъан коккозъ къызны абайлады.

Ойнагъанлардан бири онъа чевирилип:

– Асие, Асие, джошкъунлыджа ол, хафифче...

Асие...

Бу дакъкъадан Хабиб оюн тёшеген къыздан козъ алмады...

Шеньленгенлернинъ сыкъ даиресинде о тек онъа бакъты, апансыздан Асие янъгъыз тургъан бухаралынен козъ чатышты.

Ойнагъанлар ортасындан чыккып, утанчакъ Хабиб янына барды ве кюлуны узатып, оюнга кюшулмагъа давет этти.

Хабиб къызны белинден тутып, абдалджа аягъына басты, амма Асие буны дуймагъандай озюни алып барды...

Олар ильк дакъкъалардан бири-бирине мейиль бергенлерини сезип турдылар...

Апансыздан фортепианоннынъ къапагъы пат этип къапалды, Ругие ханым шакъанен деди:

— Алидженап эфендилернинъ ич бириси мени оюн даиресине давет эткени ёкъ...

Акъайчыгъым исе, яшларнынъ дикъкъатындан акълыны алдырып, меним тарафыма бакъмады биле...

Асиеге хитап этти:

— Ашханеге!

Мусафирлерге къаве пиширмеге...

Ругие ханымнынъ агъзындан чыкъкъан бу сёзлерни дагъылмакъ вакъты кельди, деп анъламакъ мумкюн эди.

Бекир агъа невбеттеки агъыр кунни дегерли къаршыламакъ ичюн юкъугъа тоймакъ керек...

Мусафирлер къайда ким ер тапты — килимге, тёшемеге, пенджере тахтасына отурдылар...

Хабиб оларнынъ оюн ве къаведен къызаргъан бетлерине бакъып, элемнен тюшюнди: олар иле бу мусафирчен эвде даа не вакъыт корюшмек къысмет оладжакъ экен — бир йылданмы, эки йылданмы?

Асие Акимованен, бири-бирине эгизлер киби ошагъан агъа-къардаш Асан ве Решад Рефатовларнен... эр ерде озюнен къабында кеманесини къамбур киби ташыгъан консерватория студенти Омер Куркчи иле...

Бакуда чалышмакъ ичюн айырылгъан эки ай энди екюнлене эди.

Огде догъмуш эви, Бухара беклей...

Хабиб биле эди: Къырымдан, эфендининъ семетдешлери эр сефер кельгенде, кетеджекте озю ичюн бир файдалы фикир эшитмек, сырлы, сонъуна къадар огренильмеген ве анълашылмагъан, лякин гонъюллерине ойле якъын олгъан ватанлары акъкъында бильгилерини арттырмакъ истей эдилер.

Бугунъ иджра этильген оюнларнынъ тылсымлы манасыны ачыкълагъандай, Бекир агъа, энди сувугъан къаведен бир ютум ичип, айтты:

— Эминликнен айта билем, бизим койлерде фольклор нумюнелерини топлагъанымызда... къырымтатар халкъ назмиети, оюнлар — буны Василий Васильевич Радлов да къайд этти — тюрк дюньясында энъ терен, пак ве пишкиндир. Сиз билесиз, чешит тюрк лехджелери арасында пек аз фаркъ бардыр, шунынъ ичюн йырларымыз бутюн тюрк халкъларынынъ вариети ола.

Бу тюркю къырымтатарларнынъ олгъаныны, къайда чалынса да — Къашгъарда я да Урумчиде, дюньянынъ обир кошесинде, онынъ ритми, хусусий мелодикасындан атта бала анълар... — Бекир агъа, Асие онынъ сёзлерини язгъаныны абайлап, сусты.

Апансыздан козьлеринде чаялыкъ кыгъылчымлары
йылтырады, о, Истанбулда — Босфор ялысында кечирген
студентлик деврини хатырлады.

— Биз ким олсакъ да — озыбек, кызах, кырым, кызанлы,
сибирь татарлары – чешит байрам ве тантаналы тедбирлерде
озь тюркюлеримизни берабер йырлай тургъанмыз, чюнки
олар эпимизге анълайышлы ве якъын эдилер.

Меним унутылмаз оджам Армин Вамбери озь “Тюрк ыркы”
эсеринде язгъаны киби, шиир кырумында ве везинде бизим
тилимиз маджар халкъ музыка иджадына шашыладжакъ
киби якъынлыкъы бар.

Бу якъынлыкъ озь тамырларыны тюрк дюньясындан баякы
четке чыкъарып бизим медениетимизни эм шаркъ, эм де
Авропа иле багълай.

Экинджи кысым

I

Бинъ докъуз юз отуз единджи сенесининъ бир аязлы сабасы
бизим тикбаш бухаралы кене чагъыргъан Каспийнинъ
ялысына ёл алды...

Вагон пенджересинде корюнген манзарадан тарсыктып,
янъгызлыкъ ве кыорувсызлыкъ дуйгъусыны кыозгъагъан
кызах чёллерининъ джансызлыкъындан болдуруп, Хабиб
Гулям-заде Семипалатинсккедже аман-аман бутюн ёлны
юкълап кечирди.

Не ашагъыдаки ерде ач сабийнинъ агълavy, не ярысархош
картаджыларнынъ сеслери, не кълп ракы кыокъусыны
даркъткъан стаканларнынъ тыныкъ даушы онынъ агъыр,
тосат-тосат эсини джойгъан хастанынъ юкъусына ошагъан
юкъусыны бозып олды...

Сыкъ-сыкъ токътагъан тренге Оренбургда, Бузулукъта,
вагондан вагонгъа кечип, пишкен йымырта, къртоп, тузлу
хыяр теклиф эткен станциялардаки шаматалы сатыджылар
биле бу юкъуны айындырамай эди...

Рязаньда токътамаздан эвель вагон сарсылды.

Хабиб уянды, пенджерени ачты, бурнуна куюк,
кыымызлангъандже кълбугъы сыдырылгъан
акъкъайыларнынъ кыуру япракъларынынъ кыокъусы урды —
кузь сувугъы келеджегининъ беяны.

Перронда Хабиб синъирли-синъирли тютюн ичип, чевре-четке бакъынган кишини абайлады.

Эм бир кереден шу бельгисиз адамны хатырлап, истемеден эгильди ве пенджеренден чекильди.

Шубе ёкъ — эр шейи: ишмарлары, омузларыны синъирли сыкъ-сыкъ силькигени о, шу Хабиб Бакугъа ильк баргъанда вагон-ресторанда расткетирген пассажирни анъдыра эди.

О келишинде Хабиб чокъ вакъыт бу адамнынъ кысыкъ бакъкъан, ичинъни-багърынъны якъкъан кескин, бездириджи козьлерини унутып оламагъан эди...

«Бесе-белли эбедий пассажир, озю де не ерде тюшеджегини, къайда башыны ясландыраджагъыны бильмейдир», — мыскъылнен тюшюнди Хабиб, оны теляшландыргъан фикирлерни къуваракъ.

Айныкъ тюшюнерек, трен кочеджекте минген бу инсан чиптесиз юргенлерни джоремеге ограткъан, кимсе дуймасын деп, адий урба кийип юрген тешкериджидир, деген нетиджеге кельди, даа десенъ.

Алла биле ким о...

Хабиб ачувнен къолуны къакъты...

...Иште, Москва дживарындаки ильк эвлер де корюнди.

Пассажирлер узакъ ёлда тютюннен паслангъан пенджерелерге япыштылар, къою ыстан бири-бири артындан, этрафтаки бир-эки къатлы эвлерге опкелеген киби, Кремльнинъ кулялары корюммеге башлангъан сонъ, эр кес, эмир эшиткендай, джемидан ве чанталарына япышты.

Биринджи кересине нисбетен бу кереси Москванынъ манзарасы Хабибни ич эеджанландырмады; анджакъ Ташкентни кечейткъанда о, озю ичюн къарар алгъан эди: Бакугъа кетеджек тренни Курск вокзалында еди саат беклегендже, пайтахтнынъ тарихий ерлери ве белли шахыслары акъкъында яланнен акъикъатны къарыштыргъан лафазан къылавуз иле туристик автобускъа минип, айтувлы, корюмли ерлерни бакъып чыкъмалы...

Хабиб, джемиданыны салландырып, адамлар акъынтысындан тез айырылды ве юк ташыйджыларнынъ шаматасына къулайкъ асмайып, Къазан вокзалынынъ бинасына якъынлашты.

Энди бильген маршрутнен метрода Курск вокзалына барып чыкъты.

Яры-ярыгъа къаранлыкъ беклев залыны тапып, Бакугъадже тренге отурмакъ мумкюнлигини илян этмегендже, анда

кечирди, еринден биле кыбырмада, залнынъ ичи тер сасыгы ве аджеле гыда ашханесинден кельген борщ кыокъусундан гъает тынчыкъ эди.

Хабиб юкъусыз геджелернинъ нетиджеси — эки юз саифели метни сыгъдыргъан салмакълы джуздан яткъан агъач джемиданыны тизлеринен сыкып отурды.

Бутюн ёл, Чобан-заде онынъ Абдулла Кыадыри акъкъында ишини екюнленген, деп саяджакъмы, я да оджагъа даа бир кере кельмек керек олгъанына озюни азырламалымы, деген тюшюнджелер оны кыйнады.

Бухаралы огюнден джемиданына, онынъ ичиндекилерине кыймет кескен киби, кескин назар ташлап, энди эки кере къатты адымнен милис хадими кечти...

Радиодан Москва-Баку тренине отурмакъ илян янгъырагъаныны, девамлы беклемектен юкъу серсеми олгъан Хабиб эшитмеди ве зал ярысындан зияде бошагъандан сонъ озюне кельди.

Вагонда купенинъ кенарында ер алып, джемиданыны юкъары ятакъкъа атты ве ястыкънен къапатты.

Купеде трен кочъмезден нард оюныны башлагъанларгъа козь ташлады.

Тахтагъа ташлар урулгъаны эм де оюнджыларнынъ “ду бир”, “шеш беш” кычыргъанларындан джошкъун Баку нардджылары олгъаныны анълады.

Олар бир кереден бухаралыгъа обир сеферки келишинде далгъан муитни хатырлаттылар... о заман да багъчалар ве азбарларда ташлар тыкъырдысы ве “гоша беш” фетхий даушлар этрафкъа даркъала тургъан...

Сонъ исе хатырлавларыны даа девам этип, сыджакъ, эеджанлы дакъкъалар козь огюнде джанланды — Бекир агъа ве Ругие ханымнынъ Кооперативная сокъагъындаки о киби яш, чокъсу Кыырымдан студентлер толу эви.

Асие Акимованы да хатырлады...

Шимди кыйда экен?

Оны насыл къаршылар?

Къаршыда отургъан оюнджыларнынъ апайлары ёллу къ богъчаларыны тизлерине сыкып, теляшлана эдилер, акъайлар шу кумар оюнындан зияде кызышып, къавгъа этмесинлер.

Алла косътермесин пычакъ да чыкъмакъ мумкюн.

Лякин, бир оюн ойнагъан сонъ эм юткъан, эм юткъузгъан, къол тутушып, оюнны “Аршин мал алан” тюркюсининъ иджрасынен екюнледилер.

Бойле екюнден тынчланып, Хабиб пенджерени къапатты.

Трен кочъмезден эвель бошагъан перронда анавы белли олмагъан эриф кене козюне чалынды.

Трен мудире янында туруп пармагъынен кягъыттаки джедвельни кечире эди.

Учюнджи, созулгъан гудок оны энди кочейткъан треннинъ басамагъына, онъа къолуны узаткъан мудирнинъ пешине атламагъа меджбур этти.

Онынъ пейда олувынен тааджипленип, пенджеренден чекильди ве акълына, бу бинъкилометрлик ёлны бельгисиз кишининъ назары астында кечиреджегини тюшюнди: эр бир дакъкъада о, вагон бою огге-арткъа кече биле я да Хабибнинъ артындан вагон-ресторангъа нарзан шишеси алмагъа бара билир...

Анълашылмагъан хаялет.

Хабиб юкъарыдаки ятакъкъа минди, теляшлы фикирлерни къувмагъа тырышып, козьлерини къапатты, лякин бу, бельгисиз адам тесиринде пейда олгъан фикирлер анъында Чобан-заденинъ сымасыны яратты.

Хабиб, Абу Сайид онъа Бекир агъаны “телефли гуняхлар”да дефаларджа къабаатлагъан, онынъ ве Ругие ханымнынъ омрюни къарарткъан душманлар акъкъында икяе эткен “Тандыр”даки акъшамны хатырлады.

Биринджи апайы къавгъаджы Диляра Булгакова, къырым газетлеринде агъасына чиркеф тёккенлерге къолтутмагъан ве Къарасувбазар мектебинден къувулгъан догъмуш кыз къардашы Зулейха Чобан-заде...

Бойлеликнен, ёл бою бири-бирини денъиштирген станциялар — Елец, Борисоглебск, сонъра - Сталинград, Астархан, Махачкала, Сумгаитни кечер экен, Чобан-заденинъ сымасы онынъ козю огюнде ве фикирлеринде эди.

Ич бир станцияда вагондан чыкып, тазе ава алмагъа истеги олмады.

Хабиб пенджеренден дикъкъатнен бакъып, къыдырса да, Тифлис вокзалынынъ перронында къаршылагъанлар арасында Абу Сайид Ходжаев ёкъ эди.

Бухаралы мусафир тренден тюшип, чевре-четке бакъынды — перрондан кетейткъан адамлар арасында шу бельгисиз кишини коръмеди.

Трен оны энди экинджи кереси кетирген Тифлис вокзалы Бакунынъ дигер вокзалларындан тыш корюнишинен,

византия услубинде сутунлар, денъиз боюнда къурулгъан шеэрлер ичюн хас миллий орьнекли ярашыкълы шекиллер иле сюслендирилъген залларнынъ дюльберлигинен баягъы фаркълана эди...

Лякин къасевет Хабибни вокзалдан тыш тарафкъа, ялы кенарына къувгъан киби олды.

Нефтяниклер джаддесини тез кечип, Губернаторскийге чыкъты, анда бурнуна ермай лекелеринде чюрюген денъиз отларынынъ сасыгъы урды...

Оны чекиштирген суаллер сырасында, не ичюн, Ходжаев онынъ келеджек кунюни бильсе де, оны къаршыламагъа кельмегени бар эди.

Ялы бою сокъакътан тотлу демир басамакълар иле сувгъа эниш башлангъан ерде янъгъыз балыкъчы тургъаныны коръди.

Къолуны кенъ чекип къармагъыны сув сайы олгъан ерге ата, лякин даима телине сарылгъан гуръ, къан тюсте къырмызы сув отларыны чыкъара эди.

Ялыгъа урулгъан далгъалар санки сувгъа баткъан адамларнынъ къанындан даа арынмагъан киби, дуйгъу пейда олды...

— Э-э... — эшитти Хабиб атындан созулып айтылгъан сёзлерни: — Иште, денъиз де, къартлар биле хатырламагъан, кечкен язнынъ сыджагъына къаршы исьян къопарды.

Сув отлары кьою къырмызы тюсни алдылар, тек еди баллыкъ фуртуна денъизни темизлей биле.

Къызыл фуртуна...

Хабиб таныгъан сеске бирден чевирильди.

Ялыда сувгъа бакъып, шу “эбедий пассажир” тура, санки денъизнинъ мына-мына къопаджакъ исьяныны беклей — энъ теренден котерилип, сайы ерлергедже келеджек ве ялы боюна къызыл, темизлейиджи фуртуна иле дарбе ураджакъ...

— Сарымсакъов аркъадаш! — эски танышына киби, къычырды балыкъчы, тельни къармакъкъа аджеле сараракъ.

— Насыл келип чыкътынъыз?

Ахун сизни машинада къаршыладымы?

— Къаршылады, арбийджесине, дакъкъасы дакъкъасына. — Ана, къалдырымнынъ кенарында туруп беклей, — сесленди Сарымсакъов адландырылгъан адам.

Дюрбинни Хабибге къаршы тиклеп бакъты ве, бираз акъсап, машинагъа догърулды.

Хабиб, Сарымсакъов, къалын кевдесини тар къапугъа сокъып, машинагъа отурмагъандже, онынъ артындан бакъты, о бир кереден суръат алып, эвлер арасына синъди.

Бу экинджи кере онынъ пешине тюшип, бир афталыкъ ёл кечкен “даимий пассажирге” бизим бухаралынынъ ачувындан къаны къайнады.

Хаяллар ичинде яшагъан яш йигитнинъ мийинде ве юрегинде топлангъан къоркъулар аксине чевирилип, оны джесюр, атта теджавузий олмагъа меджбур эткен сынъыр бу эди...

— Бу, Сарымсакъов аркъадаш, ким олгъаныны айтмазсызмы? Шанлы Баку шеэрини оны не кетирди? — адым атты Хабиб, ялы боюндан кетейткъан огъуры ачылмагъан балыкъчынынъ ёлуны кесип.

Балыкъчы, сескенип, къармагъыны огге алды ве тааджипнен Хабибге бакъты.

— Сиз буны менден яхшы бильмек керексиз...

Сиз семетдеш дегильсизми, экинъиз де Бухарадан, — зевкъландырыджы сеснен джевапланды о.

Бойле апансыздан япылгъан итирафтан Хабибнинъ юреги сыкъылды, бир кереден кескинлешкен къулагъына денъизнинъ агъыр хасталардаки киби нефес алувы урды.

— Сиз буны да билесинъиз?

Мен Бухарадан олгъанымны?

Джевап оларакъ айнеджи бакулы теэссюфнен башыны саллады ве ерли акъайларнынъ энъ сонъки моты олгъан — узун ялпакъ кунешлиги олгъан шапкесини чыкъарды.

Эм де, онъмагъан балыкъчылыгъыны унутмагъа тырышып, фикирлерини сеслендирмеге башлады.

— Нафиле айтмагъанлар, шимдики яшларнынъ хатырасы къыска...

Бизни байлардан къуртаргъан большевиклернинъ адларыны ич де акъылларында тутмайлар... душман моллаларнынъ чешит олмайджакъ язылары ерине, мектеплерде азербайджан тилинде дерсликлерни де унуттылар.

“Мефкюревий аркъадаш, онынъ иле мукъайт олмакъ керек”, - тюшюнди Хабиб оны динълеерек.

— “Къара шеэр” къуюсында бомбаджыларны исьянгъа котерген фитнеджилерни де... о ерде шимди нумюневий тюрьме ерлеше...

Мени, Рустемни ойле де хатырламадынъызмы? — айнеджиликнен козьлерини кыысты... — Эки йыл эвельси,

сиз, яш йигит Бакугъа ильк келишинъизде, денъизни корип,
айреттен кычыргъанынъызны, аркъанъызда ялдап, бутюн
балыкъларны ушкюткенъизде.

Сизни къувмадым, бу чёллю, дедим, денъиз оларда тек
къумлар ичинде уфукъта хаялет, яланджы тасвир, козьни
алдаткъан бир левха киби корюне...

О заман танышкъан эдик; о йылы ав да гъает берекетли эди,
шимдики киби дегиль.

Ава да яхшы эди, енгиль ельчик уфюре...

Денъиз тынчыкъ... аджайип...

— Бельки де, — озю де шубеленмеге башлап, башыны
къакъты Хабиб, хатырламагъа тырышып. — Селям алейкум...

Янъыдан корюшкенимизден мемнюним. — Ве джадде
тарафкъа адымлап, тюшюнди: — Эки йыл эвельси...
большевиклер, меньшевиклер, душман моллалар — бойле
сёзлер газетаджыларда ве минберге чыкъкъан
профессорларда мот... буларны балыкъчыларнынъ,
ермайджыларнынъ, адий адамларнынъ башларына да
синъдиргенлер... о заваллылар шимдигедже тек аш-сув
акъкъында тюшюне тургъанлар, сынфий куреш оларнынъ
акъылларына биле кельмей эди.

III

Ёлдан баягъы ёрулгъан Хабиб Гулям-заде Кооперативная
сокъагъына тек уйледе барып чыкъты.

Бираз озюне кельмек ве оны къаршылагъанлар огюнде
тендюрист, кулюмсиреген алда пейда олмакъ ичюн, башта
джемиданыны кызыл дермантин иле орьтюльген къапу
огюнде кьойды, лякин, кьолуны чанъ дёгмесине узаткъанда,
оны, насылдыр теляш сарды.

Бу теляш, шимди бираз ятышкъан олса да, ичинде
семетдеши-бухаралы Сарымсакъовнен корюшювден сонъ
пейда олды...

Къапуны бир кереден ачмадылар, бесе-белли, башта
мусафирге козь джамчыгъындан бакътылар.

Босагъада муляйим Ругие ханымны, бельки де, эв саиби —
узун енъли, бухара шекилли дёгмесиз кынтавлы эв
халатында Бекир агъаны корьмеге азырланды, онынъ ичюн
къапунынъ къаранлыкъ черчивесинде Асиенинъ юзюни
корьгенде бираз шашмалады.

Сонъ кулюмсиреди ве урьметини косътерип, башыны
къакъты.

— Сизмисиз? — садедиль тааджип ве утанчакълыкънен сорады Асие ве мусафирге къапуны кенъ ачты.

Лякин шу арада ятакъ одасындан эшитильген Ругие ханымнынъ сесине джевап берди.

— Ким о?

Абу Сайидми?

— Ёкъ, ханым...

Хабиб Гулям-заде кельди. —

Ве къошты: — Къасеветленменъ, шимди Абу Сайид де апханеден къайтыр...

Хабибге фысылдап айтты:

— Бираз хасталанды, — Яры къаранлыкъ аятта токъталды: — Эким къоркъуладжакъ киби ич бир шей тапмады, бесе-белли синъир зайыфлыгъы кечкен афта тап секиз спектакльде ойнады, — лафазан къыз фысылдап лаф эте эди: — Учъ кере Апшеронгъа, ермайджылар ве Къара шеэрнинъ мабюслери огюнде чыкъыш япмакъ ичюн...

Бугунъ Ругие ханымны милислер клубында бекледилер, Сумбатовны орден иле такъдирлегенлери мунасебетинен, лякин гедже сандыракъламагъа башлады, насылдыр къокъулардан къыйналды, пенджерени ачмагъа риджа этти.

Якъында оны алып кетмек ичюн генералнынъ адъютанларындан бири кельди.

Бир шей дегиль деди: "денъиштирмиз Решид Бейбутовгъа. Тантанада..."

Асие бир кереден эписи хаберлерни айтаркен, Хабиб иле корюшювге къувангъаныны гизлемеге истеди, бухаралы Бакудан кетеджек кунюнинъ арфесинде берабер оюн тешегенлерини хатырлады.

Хабиб оны динълеп, тосат-тосат болдургъан аякъларыны алмаштырып, аятта турмакъны девам эте эди, онда пейда олгъан раатсызлыкъны да тышкъа чыкъкъан илядж ве апхане ичимликлеринден олгъан къокъугъа язды.

Башы айлангъанына ве озюни ярамай дуйгъанына бакъмадан, Ругие ханым бу вакъытта кузюгу огюнде тюзене, ашыкъып, оны динълемеген къолларындан де дудакъ боясыны, де янакъ тозуны тюшюре эди...

— Балам, Хабибни онынъ одасына озгъар ве манъа ярдым эт. Мен бекленильген мусафир огюне шимдики алымда чыкъып оламайджам... барып да, мени танымаз, Изергиль къартийге ошатыр...

Бекир агъа бир кере айтмайып къалмагъан эди: "мен акъыл-хатырасыны джойгъан къартбабай олгъан сонъ, меним ишимни Гулям-заде, Абу Сайид ве сиз, меним гузелим, девам этерсиз..."

Хабиб, эфенди онынъ акъкъында бойле лафлар айтылгъанындан гъает мемнюн олып, таныш одагъа ашыкъты, мында эр шей эвельки ерлеринде, тийильмеген, чекильмеген тура эди, санки бухаралы мындан тюневин чыккып, артындан къапуны сыкъ къапаткъан.

Апансыздан босагъада Ругие ханым пейда олды, лякин эвельки киби енгиль ве хафиф дегиль, яваш, агъыр адымларнен кельди.

Хабиб, оны къаршылап, аякъкъа котерильди:

— Селям алейкум, ханым, — шашмалап селямлашты о, къою макияж сакълап оламагъан хасталыкътан агъаргъан, шишкен бетини корип. — Мына, келип чыккытым, Бекир агъанен анълашкъан эдик, онынъ авалесинен тюзетильген ве къошмалар иле ишимни кетирдим...

— Сиз кеткенинъизден сонъ, къач вакъыт кечти шу?

Аллахым, эки йыл, — тааджиппен сесленди Ругие ханым, — бу вакъыт ичинде нелер олды, нелер олмады...

Лякин Бекир агъа сизинъ мувафакъиетлеринъизге къуваныр. Сизинъ къабилиетинъизге даима ишана эди.

Мен де эминим, сиз озъ ишинъизнен ильмий шура огюнде аджайип чыккыш япкъандырсыз — Апансыздан синъирленип, башыны къолларынен сыкъты: — Бекир агъа институттан башыны котерип кетти, — онынъ нуткъу багъсыз олды, эр айткъаны арасында девамлы сукюнет укюм сюре эди: — Иште, бекленъиз — Кисловодсктан къайтса, эр шейни озю тариф этер...

Меним сиясеттен хаберим ёкъ; яш чагъымдан эмин эдим — санат менфур сиясеттен устюн.

Аллахым, санаторийден сагъ-селямет, эвель олгъаны киби къайтса да...

Биз акъайымнен къошакъ савутлардайынмыз — о хасталанды, меним сагълыгъым да осаллаша.

Лякин эр шей яхшы оладжагъына инанам...

Хабиб оны шашмалагъан алда динълей, къорантада олып кечкен вакъиаларнынъ невбетини сонъуна къадар анъламай эди, — Бекир агъанынъ он йылларнен чалышкъан институттан кетмеси, Кисловодскта тедавийленмеге меджбур эткен хасталыкъ... ве ички къудретини джойгъан, санада озюни сербест ифаде этип оламагъан Ругие ханым, булар эписи онъа янъылыкъ эди, чюнки о, узакъ Бухарада, бир

шейден хабери олмайып, гедже-куньдюз диссертация устюнде чалышты.

Аяттан кельген бираз пельтек сес Гулям-задени барлыккъа къайтарды.

— Ханым, кечке къалгъаным ичюн багъышланъыз, — акълай эди озюни эв саибеси огюнде Абу Сайид — Дёрт апханени айланып чыкътым, эким сизге тайинлеген эр шейни кетирдим.

— Сагъ ол...

Асие, эвлядым, иляджларны меним ятакъ одама алып кет.

Замет олмаса, хардал кягъыты ичюн джыллы сув азырла...

Къаршысына чыкъкъан Хабибге таба адым атаракъ, Абу Сайид къокъланды ве шакъа иле деди:

— Семетдешимни къокъусындан таныйым - тек бухаралылар кукнар, керван-сарайдаки къой териси ве Ляби хаузнынъ дургъун ешилътим сувунен къокъуйлар.

— Эйи ки, Каспийдеки киби къан къырмызы тюстекинен дегиль. — Онынъ шакъасына уйып, джевапланды Хабиб ве эшини къучакъламакъ ичюн эллерини ачты.

Чобан-заде санаторийге кеткен сонъ эвде укюм сюрген муитнинъ озю фысылдап лаф этмеге, сукюнет сакъламагъа чагъыргъан киби — атта диварлардан ве гъыйчылдысыз ачылгъан къапулар биле музыка, сесли музакерелер давушлары гъайып олгъаны киби келе эди.

— Сонъ, Бекир агъа насыл?

Тедавийлевден файда коръдими? — Теляшнен сорады Хабиб.

— Ругие ханымгъа телефон ачты... гъалиба, андаки шифалы сув, ванналар, парктаки кезинтилер ярдым эте.

Бильмейим, мен Кисловодсккъа эфендини ёкъламагъа барып келир эдим, лякин Ругие ханым хасталанды, бу да етишмегени киби, къырым студентлеринен айын-оюнлар башланды: чешит маналар тапып, институт, консерваториядан къувмагъа чаре къыдыралар, Бакугъа Бекир агъада тасиль алмагъа кельген олсанъыз — онынъ пешине тюшип, Къырымгъа къайтынъыз.

Бакуда тек Асие къалды.

Ругие ханымнен пек якъынлаштылар.

Онъа эвни бакъмагъа ярдым эте, мен беллесем, манъа, доцентке де — эписи факультет ве кафедраларны запт эткен къызыл профессорлар — мен оларны политкурьер-цензорлар, деп адландырам — тиш къайрайлар... — умютсизликнен дудакъларыны сыкъып, деди Абу Сайид яныкънен: — Билесинъми, ойле олып чыкъа ки, биз дигер бир барлыккъа

яшадыкъ ве окъудыкъ; янъы, торс сою богъазымызгъа япышаджагъыны дуймай эдик...

Къырымда якъалавлар, мында да Къара шеэрде мабюслер ичюн янъы камералар къуралар, деген ошек эшиттим.

Бекир оджадан сонъ институттан къувуладжакъ меним... эгер эски оджалардан, меселя, Бекир оджа я да о киби, намуслы оджалардан къалгъан сойларыны къызыл профессура топлашувында баштан-аякъ чамургъа булгъаласанъ, ифтира атсанъ, къалырсынъ, бельки де, даа юкъары котерилрсинъ. Арсланларгъа къаршы сыртланлар, иште...

Эшининъ монологуны динълеркен, Хабиб апансыздан дигер семетдеши — Сарымсакъовнен корюшювини хатырлады. Ве апансыздан эминликнен айтты:

— Мен Кисловодсккъа кетеджем... ярын вокзалгъа билет алмагъа барырым.

Ана-бабам ёллу къ берген парам даа бар... тренлерде икътисат эттим... — Эм, ишанчлыджа корюнмек ичюн джеплерини таптады.

— Яхшы олур эди, бар да кель, — къолтутты онъа Абу Сайид ве фикирини девам этерек, — эфенди къуваныр.

Эгер тренде икътисат эткен паранъ етмесе, “Тандыр”даки даймий муштерилерге мураджаат этерим, ким не къадар берсе, берсин; я да нард ойнарым: ортагъа юз рубле къойып, учъ кере “Шеш-беш”те ютсам.

Нард оюнында баягъы уста олдым... — эеджанлы Абу Сайид огге-арткъа юре, санки озю Чобан-заде иле корюшювге бармагъа азырлана эди.

— Нард?

Пилявханеде? — деди, озъ фикирлерине берильген ве далгъын алда олгъан Хабиб.

— Пиляв дегиль, долма; пилявханеге учъ маалле бармаздан эвель айланып кетем, сен дегиль эдинъми ант эткен: Шаркъта энъ яхшы пилявны Бухарада пиширелер, мындакини агъызгъа алма, “Кёр огълу” лагъаплы Джафар Бухарагъа барып огренди, лякин беджерамады — къоллары керек ерден осьмей, Джафар озю баштан аягъынадже ермай къокъуй...

Бунынъ ичюн девзира бу бакулы къазан башына кечкенини ич де истемеди, гъалиба....

— Башынъда эр шей къарышты: Аршин мал алан, долма, девзира...

Догърусыны айт, сен мени эриштиресинъ, мени Кисловодсккъадже узун ёлгъа азырламакъ ичюн...

Сёзюни битирмейип, Хабиб къолуны къакъты: санки энди автобуста салланып, денъизнинъ теляшлы къанлы къырмызы ялысыны айланып кечкени, Бакудан эп узакълашып, Эльбруснынъ этегинде ерлешкен сырлы Кисловодсккъа кеткени козь огюне кельди...

IV

Кооперативнаядан эки маалле узакъ олгъан автовокзалнынъ боз къутусына бакъкъанда, козюнъ ич бир шейге илишмей эди.

Беклев залынынъ къапулары артынадже ачыкъ, ичине денъизнинъ тузлу, дымыкъ авасы кире.

Тынчыкътан байыладжакъ алда олгъан къадынлар, мумиялар киби кыбырмамай отура, янларында раатсыз, агълагъан балалар.

Милис хадимининъ сынайыджы бакъышына даянып, Хабиб кассагъа олгъан невбетнинъ къуйругъына турды.

Тосат-тосат курткасынынъ джебиндеки акъча дестесине тийип ала: тренде икътисат этильгенлерге мангъал, пилявханелерде, “Тандыр”да топлангъан хайрие паралары къошулды.

Абу Сайид эписини айланып чыкъты ве бу паралар Бекир эфендиге, Кисловодсккъа бармакъ ичюн керек олгъаныны анълатты.

— О-о, эфенди, эфенди, — бу сёз озо адий тюкянджылар ве ашчылар арасында азиз сайыла, оны ерли азизлер ве эвлиялар сырасында анъа тургъанлар...

Даа невбетте отургъанда Хабиб касса пенджереси устюнде асылгъан, Кисловодсккъадже къалын кыйыш сызыкъ иле реклама маршрутына дикъкъат этти.

Къырмызы денъиз отларынынъ сыкъ къатламлары ичинде богъулаяткъан Каспийнинъ ялысындан.

Сонъ: Самур, Куба, Кизляр, Дербент, Махачкала...

Грозный, Пятигорск, Минводы, Ессентуки, анда исе Кисловодсккъадже аз къала.

Эвель бухаралы эшитмеген бу адлар озь тылсымлыгынен айретлендире, дюньянынъ белли олмагъан кошелери киби чагъыра эди.

Лякин бу ерлернинъ чокъсунда, тюрк къабилелерининъ лехджелерини, тюркюлерини, дестанларыны язып, Бекир агъа олгъан эди...

Бу сырлы ерлерден, оджасынынъ изинден кетип, талебесине де бармакъ къысметтир.

Сырлы маршрутнынъ тек бир ери таныш корюнди — Ессентуки.

Бу ерге бабасы, «интернационал», «рабоче-крестьянская инспекция», «Пролетарии всех стран – соединяйтесь!», «Кто был ничем, тот станет всем!» киби сёз ве ибарелерни адий озъбек халкъына анълашылгъан тильге терджиме этип, большевиклернинъ янъы сёзлери иле къыскъа сёзлюк тертип эткени ичюн, Наркомпростан макъуллев сыфатында ёлланма алып, барып кельген эди.

Бабалары раатлыкъкъа кеткенини беклеген анасы — Марьям-бону — артындан къапуны къапатаркен, енгилликнен нефес кечирди, юзюм тюрюндеки тапшангъа отурып, кокке бакъты ве дуа окъугъан киби:

— Аллагъа чокъ шукюр...

Эвимизде эки-учь афта тынчлыкъ ве раатлыкъ олур — командир къычырыкълары ве опыкелерсиз.

Анасы омузланыны керди, санки аркъасындан агъыр юкни тюшюрди.

Енгиль юрюшнен дюгенелерине мусафирликке, бир эки кере Хабибнен, дженубий тарафта ерлешкен “Шеригон” арабакъапусы олгъан яры йыкъылгъан кермен дивары янындаки шеэр медениет паркына, без экраны чинарлар кевделери арасына асылгъан язлыкъ кинотеатрине биле барды.

Лякин тынчлыкъ ве раатлыкъ, бабасына раатланмакъ ичюн берильген дёрт афтагъа дегиль де, учь кунге сюрди.

Агъыр адымларнен эвнинъ босагъасындан атлап, шашкъан анасы огюнде яры-ярыгъа бош джемиданыны оданынъ кошесине котерип атты ве:

— Ессентукта яшайыш ёкъ... тынч, сырасынен... мен алышкъан сынфий куреш руху дююлмай... без халатлар —

саба турмакъ — акъшам ятмакъ — булар мен ичюн дегиль...
джаным сыкъылгъанындан олеяздым...

“Бабам айткъан “олюм ери” не бакъмакъ меракълы олур эди”,
деп тюшюнди Хабиб ве кассаджынен юзьме-юзь билет
сатылгъан пенджеречик янында олгъаныны абайламай
къалды.

Араларында кыска субет:

— Къайда, яш йигит?

— Кисловодсккъа... бугунь.

— Билетлер тек биринджи сентябрьге.

— Не вакъыткъа?!

— Саймагъа беджермейсизми?
Еди куньден сонъ.

Хабиб шашмалагъанындан, артында туруп, энъсесине нефес
эткен акъай оны къабаджа невбеттен итеп чыкъаргъандже,
касса янында тура берди.

Залда бошагъан ерге отурды ве озь-озюне фысылдап суаль
берди: “Энди не япмалы?

Ругие ханым даа бир афта сабырсызлыкънен беклевден
болдуруп, апансыз адамларнынъ телефон ачкъанларына
чапып бараджакъ, Бекир агъаны къасевет этип, бир кошеден
дигер кошеге юреджек...”.

Янында отургъан эсли, эски мотлы пенсне кийген акъай
козюни китаптан алып, нефес кечирди:

— Не япмалы?!

Беклемели, яш йигит... манъа мында джойгъан куньлериме
янкакъ ери бар, сизинъ исе бутюн омрюнъиз огюнъизде...

Даа нелер-нелер беклерсинъиз яшайышта — ятакъ сатын
алмакъ ичюн талон да агълагъан баланъызны ашатмакъ ичюн
сют ашханесине невбетни... дантистке къабулны я да
пролетарийлерге алякъасыны къайд этип, башына кызыл
кыйыкъ багълагъан бездирген апайынъызнен
айырылыкъны...

Зиялынынъ фикир этювининъ къарама-къаршылыгына кыймет кесмеген Хабиб озъ меселесини текрарлай эди:

– Манъа бугунъ керек, я да энъ кечи — ярын.

Беклейлер, — эм оны телашландыргъан фикирлер топундан апансыздан бусы айырылды: пролетар фаалининъ кызыл кыйыгында бездирген апайы...

Недендир, бу кызыл кыйкылы фаальнинъ сымасы оны балалыккъа, узун кой ёлуна къайтарды.

Бу ёлдан къомшу къадынъа джаны агъыргъанындан козьяшларыны тутып, бир озю кеткен эди.

Бабасы о заман Гиждувангъа — Бухарадан кыркъ километр авлакътаки бир шеэрчикке мектеплерге мудирлик япмакъ ичюн ёлланылгъан, афталарнен эвге къайтмай эди.

Анасы озъ насылдыр ишлеринен онынъ янына, Гиждувангъа бараджакъ олып, Хабибни эсли къомшусы — Гульсумнынъ васийлиге къалдырып кеткен эди.

Джан сыкысындан азбарда футбол ойнагъан Хабиб, тесадюфен, онъа пенджеренден бакъкъан Гульсумнынъ пенджересине топнен урды.

Парлангъан джамнынъ шашыртыджы чинъильдиси ве кьоркъудан кыйышкъан къан ёлакълары иле Гульсумнынъ юзю огъланчыкъны ойле сескендирди ки, о, анасындан имдат кыдырып, арабакъапугъа атылды.

Гиждувангъа джаяв бармагъа къарар алды.

Кене яхшы, ёл таныш эди.

Чюнки бундан эвель автобуста бабасынен онынъ иш ерине баргъан эди.

Бойле этип, ялынаякъ, къаршысына кельген адамларнынъ — къайда кеткени, джоюлмагъан экенми, деген суаллерине джевап бермейип, юре берди.

Аман-аман кыркъ километр ёл юрип, Гиждуваннынъ дживарына якъынлашкъанда кечкен машинадан апансыздан анасынынъ сесини эшитти:

— Хабиб, огълум!

Эвден къачтынъмы?

Не олды?

Машина бирден токътады.

Айдавджы когертени тюшюрип, огъланчыкъны котерди ве баласы ичюн кьоркъудан буз-бузлагъан анасынынъ кьолуна узатты.

Бухарагъадже бутюн ёл бою оны къучакълап кетти, инат бала кене бир орынек косътереджегинден къркъты...

Хабиб озь омрюнде ильк сеяатыны хатырларкен, эски мот пенснедеки пассажирге чевирильди ве апансыздан сорады:

— Кисловодсккъадже къач километр, айтмазсызмы?

— Айтырым, — азырлыкънен сесленди къарт, — ве бурнунда пенсени тюзетти. — Эгер бугунь автобускъа минмеге огърунъыз олгъан олса — секиз юз алтмыш алты километр, бу беш юз отуз инглиз мильге мусавий. Эгер джаяв — тендюрист, акъайджасына юреджек олсанъыз, бир ерге бурулмайып, догъру ёлнен — еди юз километр.

— Сиз Кисловодсккъа джаяв бардынъызмы? — тааджиplenди Хабиб, ильк кере онынъ бурюшлик бетине бакъып.

Лафазан субетдеши китапны ачты, санки анда ишанчлы субет ичюн бир шейлер язылгъан эди. Лякин тез къапатты.

— Мен император хызметчисим, такъдир эмринен большевиклерге хызметке кечтим. Бутюн Кавказны энине боюна, эм де Каспий этрафындаки топракъларны ермай къыдырып, доланып чыкътым. Къара шеэрде биринджи куюны тешкен эдик. Козълерим энди манзарасыны унутты, аякъларым исе хатырлай, геджелернен сызлайлар. Эбет, беш юз отуз миль, бир дюйм зияде дегиль.

Хабиб сабырсызлангъанындан атылып турды:

– Джаяв барарым... мытлакъа етиштирмек кереким. Манъа еди яшымда, эбет, еди юз километр дегиль, олгъаны-оладжагъы къркъ километр юрмек къысмет олды, — лякин шу арада, эсаплап, кене отурды: Адий адымнен беш километр дегиль, тез юрюшнен еди километр олсун, гедже раатлыкъкъа бир саат.
– Бир дакъкъачыкъ! – сабыкъ чар мутехассысы яш адамнынъ джесаретлигини бегенди.
Онъа ярдым этмек макъсадынен узакъ сефернинъ вакътыны акълында эсаплады: — Бир куньде тез адымларнен сиз юз алтмыш километр кечерсиз.

Бир саат юкъламакъ ичюн айырсанъыз, Кисловодсккъа дже дёрт ярым кунъде барып чыкъарсыз, хасталангъан эфендининъ хатыры ичюн джуръатлы олунъыз, йигит!

Талебе ичюн оджа — бабасындан устюн — Сизде шаркъта ойле айталар, гъалиба.

Сизде джаяв юрмек теджрибеси де бар экен.

Балалыкъта алынган теджрибе, къашкъырны сезгирлик интуиция юрсеткен киби, хатасыз ола... — Бираз сускъан сонъ, къошты: — Дербентке киргенинъизде, кемер янында — уфакъ къынтавлы къавехане бар.

Анда лезетли ашамакъ ве бираз юкъламакъ чаренъиз олур.

Сиз озюнъизге айыргъан бир сааткъа тамам олур.

Меним яхшы танышым Сафар Мемет огълу.

Шишханеде гедже-кунъдюз ола.

Чагъырсанъыз, Мемет огълу юкъудан козьлерини сюртер ве шу арада софраны донатыр.

Грозныйнынъ дживарында исе – акъсакъ Ахмад, менден селям айтсанъыз, гедже биле сиз ичюн вайнахларнынъ лезетли ашы жижиг-галнашны къыздырып берир, тоймасанъыз – фурундан чыкъарып, чепалгаш иле сыйлар, меним адымны айтынъыз – Фатали Гянджеви, чаргъа киби хызмет этер, даа ёлджугъа эндиirim де япар.

«Къарт, гъалиба, акълы», – тюшюнди Хабиб – «янъы ерлерни корерим, вайнах ашынынъ дадыны бакъарым... бухара ашларына къошма бир-эки рецепт язып алырым – анам ашкъа уста, пек лезетли пишир».

Кене китапкъа далган Фатали Гянджевиге чевирильди.

– Икметли меслеатынъыз ичюн сагъ олунъ, Фатали агъа...

Эвге тез-тез барып келейим, ёлджу урбасыны киерим де, ёлгъа чыкъарым...

– Енгиль, хавфсыз ёлунъыз олсун, – тиледи Фатали Гянджеви ве къолуны саллады. – Узакъ ёлнен хастагъа барган инсан къальбинде дева кетире. — Ве къошты: — Тек чытырманлы дагъ чалыларына далманъыз, агъа-къардаш урушы къызылларнынъ гъалебесинен биткенинден хабер олмаган акъ субайларгъа расткельмек хавфы бар...

V

Бекир агъа иле корюшмек ичюн Кисловодсккъа джаяв кетмек къарары бизим бухаралыны ойле бир эеджанландырды ки, Кооперативная сокъагъына тез

адымлагъан вакътында о, озюни энди янъгъыз ёлджу олып, сюлялеси имам Шамильден башлангъан акъ гвардияджы авар субайлары сакъланып юрген тикенли дагъ ёлчукъларындан кеткенини козь огюнде джанландырды...

Эвге киреджекте, нефесини тынчландырмакъ ичюн, адымларыны явашлатты.

Асие, Абу Сайид аман да айретленирлер, Ругие ханым исе талебесининъ Бекир агъагъа садыкълыгъына кыймет кесер, деп тюшюнди.

Лякин Хабиб квартиранынъ къапусыны ачкъанынен, белли олмагъан адамларнынъ серт эмир берген сеслерини эшитип, тааджиПЛенди ве шашмалады.

Давушлар шаматасындан къадын агълавы айры эшитиле эди...

Хабиб къапуны бирден ачты ве босагъада, даа эки саат эвель денъизни тап тюбюнден тёпесинедже темизлейджек къызыл фуртунаны беклеп дюрбинге бакъкъан адамнен юзьме-юзь къаршылашты...

“Сарымсакъов аркъадаш” – санки юзюни атеш якъкъан киби олды.

— А-на-на, меним семетдешим Хабиб Гулям-заде, янълышмасам, – деди Сарымсакъов, Хабибни баштан-аякъ сюзерек, санки о урбасы астында бир шей сакълай. – Кисловодсккъа бармагъа истединъизми, энъ олмагъанда – джаяв.

Ашыкъманъыз: эгер, машинанен кетмек джаяв юрмектен хавфсыз олгъаны къарарына кельсек, шу куню сизге билет алырмыз, девлет эсабындан.

Онынъ эмир этиджи сесини эшитип, ятакъ одасындан къолларыны эеджан иле къапкъачлагъан эм башына сылакъ явлукъ саргъан Ругие ханым чапып чыкъты ве яйгъаралы сеснен къычырды:

– Аллахым, Хабиб!

Бизде тинтюв...

Неге?

Не ичюн?

Бекир Чобан-задени неде шеклегенлерини айтмайлар!

Бу къышкъыртма!

Бойле къанунсызлыкъ юзь бергенини Парижде, Берлинде, Будапештте, Москвада, Ташкентте, эм де мында, Бакуда бильселер, онынъ зенаатдашлары, талелелери не тюшюнир?!

Давушына ятакъ одасындан ашыкъмайып, таз баш, салпыкъулакъ адам чыкъты

Агъзында тютеген папирос:

— Тынчланынъ, бизим севимли артистимиз, хасталанырсыз, къоркъам, тешек хастасы олурсынъыз...

Сиз — халкъ серветисиз достояние, сийрек истидат, озюнъизге мукъайт олмайсыз, — айнеджилик этип, пиязламагъа тырышты о.

— Генерал Сумбатов?!

Бу спектакльни неге косътересиз?

Бутюн эвни аякътан башкъа къойдынъыз, уста Джованни Понтининъ он единджи асыргъа аит фортепианонинъ къапагъыны тырнадынъыз.

Клавишаларыны батырдынъыз, санки сизинъ команда бу клавишаларда “Казачок” чалды...

Акъайым йыларнен устюнден чалышкъан къыймети буюк олгъан эльязмаларны аякъ тюбюне атып, кирли чызмаларнен басып кечтинъиз...

— “Казачок”! — шакъылдап кульди Сумбатов, сары, тютюнден сараргъан тишлерини косътерип, о, мундирининъ юкъары дёгмелерини ашыкъып чезгенде исе, бойнунынъ дамарлары къабаргъаны корюнди. — Не ичюн “Джанги” дегиль?!

Оны динълемезден, Ругие ханым аякъ тиремеге девам этти:

— Атта мусафиримизнинъ джемиданыны тинттинъиз, — Хабибге чевирилип, козьлерини акъайтты. — Не къыдырдынъыз, бир чифт чорапмы?

Тюб урбасынымы?

Айып олсун!

Гъарип аспирант...

Бутюн шейлерни къарыштырып къойдынъыз, учъ йылыны сарф эткен ишининъ саифелерини дагъыттынъыз...

Онынъ оджасы — йигирми дёрт яшында профессор унваныны къазангъан Бекир Ваап огълуны тюркшынасларнынъ бутюн топлашувларында дюньяджа белли олгъан алимлер янына алып, президиумларгъа давет эте эдилер.

Онынъ бутюн, эминим ки, келеджекте музейлернинъ дегери оладжакъ китапларыны, эльязмаларыны, языларыны кирли солдафон чызмаларынен бербат эттинъиз, — токътамакъ бильмеди Ругие ханым, онынъ сесинде агъламсырав нефрет иле денъишип турды.

— Олды!

Олды! — котерди къолларыны Сумбатов. — Джаным, тынчланынъ - профилактика, огюни алмакъ макъсадынен.

Сизинъ акъайынъыз киби истидатлы адамлар бала киби садедиль оларар.

Яман бир алгъа тюшмесин деп, къоруймыз... эр ерде тузакълар къоюлгъан... инкъиляп душманлары юкъламай. — Ве къычырды: — Команда — пешиме тюш!

Ругие ханым чагъырылмагъан мусафирлерни озгъараракъ:

— Ёкъ!

Башкъа чагъырманъыз мени...

Сизинъ милислеринъиз огюнде йырламакътан ред этем.

Энди къапуда тургъанда Сумбатов даа бир тынчландырыджы арекет япаджакъ олды:

— Сизге уста Керим Бедайбейлини чагъыртырым, фортепианоны сазласын деп...

Яхшы къалынъыз.

Бекир Вааповичке селямлар сёйленъ.

— Аллах къорусын! — айтмагъа етиштирди Ругие ханым: — Сизинъ Бедайбейли саздан гъайры къолуна бир шей алмагъан, Джованни Понтининъ фортепианосыны сазламакъ къолундан келеджекми...

VI

Пенджереде танъ аткъаны белли олгъанынен, Хабиб агъыр, раатсыз юкъудан уянды ве кийинмеге ашыкъты.

Онынъ къальбинде, бельки, биревлер Кисловодсккъа бармакътан ред этер ве билетини кассагъа къайтарыр, деген умют бар эди.

Тюневинки къалабалыкътан сонъ, Чобан-заде иле корюшмекни даа зияде сабырсызлыкъ иле бекледи, оны къучакъламакъ, сагълыгъыны сорамакъ истеди...

Хабибнинъ одасында даушлар пейда олгъанынен, алсызлыкътан зорнен аякъ устюнде тургъан Ругие ханым да аяткъа чыкъты.

Кергин синъирленювден: бутюн гедже онынъ козюне юкъу кирмеди, чюнки Сумбатов командасы иле я гедженинъ дер маалинде, я да танъда, умумен, эр анъде къайтып, тинтювни девам этеджегинден къоркъты.

Сиясеттен ич алып береджеги олмагъан, севген ишине бутюнлей берильген Ругие ханым апансыздан театрде олып кечкен сонъки топлашувлардан бирини хатырлады.

Шу топлашувда директор эмир сыфатында репертуарны гъайрыдан бакъып чыкъылмасы акъыкында сёйлеген эди.

Цензурадан Юсуф Везир, Али Назим, Мюшфук, Мухтанлы, Талыблы кечмедилер.

Спектакльде бу муэллифлернинъ шири я да къыскъа бир репризасы янгъырагъан олса, электен кечирмек эмир берильди...

Къадынынынъ пек тесирленген табиятыны билип, Чобан-заде онынъ иле сиясет акъыкында лафлардан къачына тургъан — къорантада теляшландыргъан, “халкъ душманлары” адландырылгъан кимселер иле сонъсуз курешке джелъп этильген къызыл профессуранынъ заман эмринен денъишкен, къарышыкъ къуйпалыгъынен багълы мевзулар ясакъ астында эдилер.

Кисловодсккъа кетмезден, Чобан-заде тесадуфен айткъаны киби, о, ве даа онгъа якъын оджанен берабер институттан ректорлары Симург Тагишахбазыны кетмеге меджбур эттилер.

Хабиб одасындан чыкъаркен, шашмалагъан Ругие ханым иле къаршылашты.

— Хабиб, сизмисиз? — ичи енгиллешкен киби, нефес кечирди къадын. — Мен, тюневинки чагъырылмагъан мусафирлер кене къапумызны тырмалай, деп белледим.

Анджакъ, мен неден къоркъа экеним?!

Айттылар да, муфсит ич бир шей тапмадылар.

Сумбатов да незакетли эди, фортепианоны сазламагъа ишандырды, — къадын токътап-токътап, фикирлерини къарыштырып ифаде эте эди: — анджакъ ким биле оларны — агъызларындан бал тамлар, джеплеринде исе окъ толу наган...

Тюневин олгъан шейлер акъкъында Бекир агъанъызгъа сёз къачырманъ.

Айтынъыз: севемиз, беклеймиз, эм Кисловодскта чокъ къалманъыз.

Сиз эр вакъыт озюнъизни тута бильген, сабырлы адамсыз, тюневин де джесюрлик косътердинъиз...

Бутюн гедже юкъламадым, мийимни чешит фикирлер ёрды...
Театр репертуарындан силип ташлангъан яzydжыларнынъ адлары, эм апансыздан, булар арасында билесиз нени тюшюндим...

Къадынларнынъ сезгирлиги алдатмаз — сиз ве Асие бири-биринъизге пек келишесиз, бир бахт йылдызы астында догъгъан киби.

Башына явлукъ багълагъан, китапларны тоздан сюрткен Асие, озъ адыны эшитип, Бекир агъанынъ кабинетинден юзюни косътерди.

Хабиб онъа достане баш къакъты ве Ругие ханым узаткъан зарны алды.

— Бекирге эки сёз яздым: беклейим, севем.

Тюневинки акътар-тёнтёр акъкъында бир сёз ёкъ...

Огъурлы ёллар олсун, яхшы хаберлернен къайтмакъ насип олсун.

Хабиб мектюпни курткасынынъ джебинде терендже сакъламакъ макъсадынен, оны тантимнен къатлагъанда Асие чыкъты:

— Ханым, Бекир агъанынъ кабинетинде кене темиз ве къынтавлы...

— Ёкъ, мазунлыкъ иле сесленди эв саибеси, — бизим ювамызда энди ич бир вакъыт къынтавлы ве тынч олмайджакъ...

Мен буны билем, сезем...

Бугунъ, бельки, такъдир онъа кулер, деген умютнен, Хабиб чыкъышкъа догърулды, лякин азбар къапуны ачмаздан, апансыздан ичинде шубе догъды: онынъ эр бир адымыны незарет эткенлер бардыр.

Ойле олмаса, Сарымсаков онынъ автобус станциясына тюневин баргъаныны къайдан бильди?

Керчектен де, оны аязлы сабанынъ кескин къокъусынен къаршылагъан сокъакънынъ кошесинде, трамвай дурагъынынъ кунешлиги тубюнде, къалдырымгъа япышып, брезентнен ортыули машина тура эди.

Бир кереден айдавджынынъ еринде балыкъ къармагъыны дюменге денъиштирген Рустем козьге чарпты.

Артта исе — Чобан-заденинъ эвинде тютюв вакътында онынъ джемиданыны акътаргъан сержант Ахундов отура эди.

Хабиб, машинаны коръмезден олып ве такъиптен къачаракъ, къатты адымларнен автостанциядан терс тарафкъа ёл алды, лякин оны чагъырдылар:

— Эй, деликъанлы, джаяв юрменъиз, ёл узакъ — сизни машина беклей.

Биринджи фикри чапмакъ, машина кечип оламагъан янаша тар сокъакъкъа бурулмакъ ве Ичери-шехернинъ битмез-тюкенмез лабиринтлеринде гъайып олмакъ эди...

Лякин, озю-озюнден беклемезден, антиквар тюкянчыгъы янында токъталды ве ичтеки сагълам фикирлерине динъленди: токъта!

Акъай ол!

Сержант Ахундов, пыштав къыны асылгъан къайышыны чекерек, пешинден кельди ве Хабибнинъ тирсегинден тутып, сыкъты.

— Къайда я огъурлар?

Автовокзал терс тарафта да.

Сизни алып барарыкъ, Кисловодсккъа билет алмагъа ярдым этерик, — енгиль истизанен деди такъипчи. — Лякин бир къач зарарсыз суальге джевап бергенинъизден сонъ...

— Сиз кимсинъиз?!

Мени неге эсасланып якъалайсыз?! — Хабиб къолуны серт чекип алды ве кери адым атты: — Машинагъа отурмайджам...

Джаяв севем...

Ахундов оны омузындан къапкъачлады:

— Сиз акъыллы адамгъа ошайсыз, милис нарядыны чагъыргъанымны истемезсиз...

Тюшюнъ пешиме, баштакълыкъ япманъыз.

Машна кѡапусы янында Ахундов Хабибнинъ курткасы джеплерини акътарды, Ругие ханымнынъ мектюбини кѡармалап чыкъарды, бухаралыны машинанынъ арт отургъычына итеп отуртты.

Озю шаматанен айдавджынынъ кабинасына минди.

Машна еринден бирден кочъкенде, кѡаранлыкъта Хабиб янында отургъан Сарымсакъовнынъ бетини абайлады.

Терс-терс юзюне кѡаршы кѡычырды:

— Сиз кимсинъиз..?

Сучум неде?!

— Шимди даа бир шейде дегиль, — эшитти о сагъыр сесни — Сиз бизни шаат оларакъ меракъландырасыз, яш достум — джадид.

Пек истер эдим, сиз, илериде де, ватанынъызгъа, кѡадим заманларнынъ шаирлери мубарек, деп адландыргъан Бухарагъа аман-эсен кѡайткъанынъызгъадже, тамам шу статуста кѡалгъанынъызны. — Сарымсакъов “джадид” деп мыскъыллагъаннынъ тизине кѡолуны кѡойды. — Кѡабаатлангъанлар бойле онъайтлы юрмейлер... оларны пармакълыгъы олгъан “воронок”ларгъа кѡапайлар...

Тынчланынъ.

Раат олмакъ — кучълю олмакъ.

Сиз тасавуф суфизм иле авесленесиз, гъалиба.

Тамам софу киби вакъыт ирадесине ве сабыргъа берилинъиз, ве манъа, семетдешинъизге ишанынъыз.

Сизинъ устазынъыз ве достунъыз олурым, — пиязлап, айта-айта, анъалата берди капитан.

— Меним устазым — Бекир эфенди Чобан-заде, — эшитти субетдеш терс джевапны. — Мен ондан ич бир вакъыт инкяр эттем, якъалав телюкеси олса биле...

— Хм, — кулюмсиреди Сарымсакъов. — Заманлар денъише, устазлар да, кѡайда шимди бухаралыларгъа устазлыкъ, атта акимлик япкъан — джадид айдут такъымы — Файзулла Ходжаев, Фитрат, Абдукъадыр Мухиддинов, Муса Сайфитдинов ве дигер затлар?!

Олар Бухарада омюрге ве тасильге пантюрк кѡанунларыны кирсеткенде нелер япкъаныны бабанъыздан соранъыз!

Ёкъ, бизим догъру ёлдан кетмедилер.

Ве джезасыны коръдилер.

Ахундов, джебени къармалады ве бирден Сарымсакъовгъа чевирильди:

— Афу этерсиз, капитан аркъадаш.
Тинтюв вакътында гражданин Гулям-задеде мектюп таптым,
— ве зарфны онъа узатты.

Сарымсакъов кычырып окъуды:

— Севем, беклейим.
Йырджы — кыскъадан, нотадан окъугъан киби, бир арткъач сёз ёкъ.

— Ох, шу йырджы къадынчыкълар, — сесленди Рустем, —
Акъайына, севем, деп хабер ёллар, озю исе ойнашынен
тёшекке ятар, ха! ха!

Айтылгъан сёзлер Хабиб ичюн шамар киби корюнди.
О, бирден турмагъа ынтылып:

— Биревлернинъ мектюплерини ачмакъны алчакълыкъ саям!
Ойле айтмагъа акъкъынъыз ёкъ, арамзаде!
Ругие ханым вели къадындыр!

Сарымсакъов Хабибге тааджиппнен бакъты ве, иште, не
япайым, хызмет, демерге истегендай, омузларыны сыкъты.

Чорлангъан Хабиб даа бир шейлер айтаджакъ олды, лякин
сонъ, оларгъа не дейджексинъ, мундирлер кийген арсызлар,
эписи бир анъламазлар, деген киби, къолуны къакъты.
Олар ичюн азиз бир шей бармы экен...

Бойле этип, сукюнетте Приморский бульварны аштылар,
Графский джаддесини кечип кеттилер, Шамахан
арабакъапуларына бурулдылар.
Бу ерде машина ич бир шейнен айырылмагъан “Нефтяник”
мусафирханесининъ бинасы янында бирден токътады.

VII

Сарымсакъов ве онынъле кельгенлер босагъадан
атлагъанынен, къабул масасы башында отургъан
мухафирханенинъ идареджиси ашыкъып турды.

Оны чокътан бильген къадын, ялтакъланып, анахтарларны узатты ве мердивенден тёпеге котерильгенлерни кергин бакъышнен озгъарды.

Мусафирханеде яшагъанларнынъ дикъкъатыны мына санъа джелъп этмейип, экинджи къаттаки кошеде олгъан одагъа котерильдилер: къапусы, тышкъа бир сес биле эшитильмесин деп, къалын дермантин иле тарттырылгъан эди.

Йымшакъ диванлар, макъатлар, чечек бардакълары ве диварларда манзаралы ресимлер иле эки ода: буларны Хабиб бир бакъышта корип, козю пенджерере токъталды.

Къапуны ичтен килитлегенлерини эшиткенинен, акълына фикир кельди: пенджерени къырып, къачмакъ мумкюн олур экенми?

Пенджере артында Ичери-шехердеки Къыз къуллесининъ къаралтысы корюнип тура.

Къачаджакъ олса, къуртарыджы фарос киби...

Сарымсакъов онынъ фикриден кести:

— Чай ичеджексинъ, семетдеш, я папиросмы? — деди о, “Казбек” язысы олгъан къутунынъ къапагъыны ачып.

— Мен тютюн ичмейим.

— Ана-бабанъа машалла... дегерли тербие бергенлер. — Ве ичине папирос тютюнини терен чекип, къошты: — Айса, арткъач сёзсюз ишке киришейик...

Лейтенант Шорохов — ишмарнен, къурбан арагъан мутаасипнинъки киби янгъан козьлери олгъан, сырыкъ киби арыкъ акъайгъа ерини корьсетти — сизинъ еринъиз маса башында.

Обири чантадан гонь джюзданны чыкъарды, ачты.

Биринджи саифеде Хабиб: “Къызыл фуртуна” иши” деген языны корип къалды.

“Кяттип” язмагъа азырланды, лякин Сарымсакъов ишмарнен онынъ авеслигини сёндюрди:

— Бираз токътайыкъ, лейтенант, соргъу стенограммасыз, - эки семетдеш арасында ишанчлы субет олсун, — деп, диванда аякъларыны сыкъып отургъан Хабибге чевирильди.

— Эгер, итираз бильдирмесенъиз, сизден дегиль де, сиз эфенди деп адландыргъан кишиден башлайыкъ...

Кимсе ичюн бу сыр дегиль эди: Ташкентте чалышкъан йыллары раатлыкъ куньлерде Чобан-заде студентлерни ойнамакъ, шиир окъумакъ, атта раатланмакъ ичюн табиаткъа алып чыкъа тургъан.

Гъает дюльбер ерге — Дурменге.

Шеньлеше, шакъалаша, чардаш, озыбеклернинъ “Ёр-ёр”ини ойнай эдилер, яваш-яваш бири-бирине ишанмагъа башлай эдилер.

Нетиджеде, насылдыр топлум яратылды, берабер Чулпан, Бехбудининъ миллетчи шиирлери окъулды, сиз исе гъайретнен — Абдулла Къадырининъ несир эсерлеринден парчалар.

Онынъ романы акъкъында зевкъ иле язылгъан сесленювни Чобан-заденинъ эвинде тинтюв отъкерильгенде, шейлеринъиз арасындан таптылар.

О йыллары, кунь-куньден табиатта, мусаллат козь ве къулакълардан четте олмакъ авес олгъанлар, текрарлайым, насылдыр яшлар тешкилятына бирлештилер, Чобан-заде уйдургъан низамнамеде, Къуранда емин эткен киби, ант эттилер.

Хабиб, къыйын суаллерге къандырыджы джевап бергенде, янълышмамакъ ичюн, башындан дикъкъатнен динълемеге азырланса да, чорлангъаныны сакълап оламады.

Сарымсакъов буны онынъ, чыбалгъан сачларыны сыйпагъанда, къалтырагъан къолларындан анълады.

Дикъкъатыны джелъп этмеге истеп, Сарымсакъов текрарлады:

— Булар эписи догърумы?

Яшларнынъ миллетчи топлумы?

Хабиб уянгъан киби олды, озюни керчек яшайыштан тыш олгъаны киби дуйды — онынъ яш, назик, бу къадар къабартылгъан яланны къабул этмеген гонълю, Чобан-заденинъ, о, тайып йыкъылсын, къарышып къалсын, деп, аякълары астында кишен тешельгени себебинден къальби сызламагъа башлады.

— Мында тек эфенди балалыкътан севген “Тым-тым”, “Чобан оюны” ве дигер оюнларны огренгенимиз догъру.

Къалгъаны — ялан.

Бундан башкъа къошмагъа шейим ёкъ!

— Бакъ манъа, акъикъатсевер! — апансыздан кьошулды субетке, шимдигедже тарсыкып отургъан Шорохов. — Мында тек бир акъикъат бар — бизимки, башкъасы олмай! О — бизим монополиямыз, сен насыл бургъаланмасанъ да.

Сарымсакъов тынчландырыджы ишмар япып девам этти:

— Мында музакере этиледжек шей ёкъ.

Адий суаль: насыл этип сиз, Гулям-заде, Абдулла Къадырининъ иджадыны сечтинъиз?

Онынъ иджады иле огърашмакъны эфендинъиз талап этtimi?

— Худжур суаль. — Хабиб, фикирлерини топламакъ ичюн диваннынъ дигер кошесине чекилип отурды.

Сарымсакъов агъзындан чыкъармагъан папироснынъ тютюнине богъулып, оксюрге башлады. — Абдулла Къадырини даа мектеп чагъымда бегенген эдим, Чобан-заде иле таныш олмагъанымдан эвель...

— Къартананънынъ масалларындан эвельми? — Кулюмсиреди Сарымсакъов, джеп саатыны чыкъарып:

— Уйлелик вакъты кельди...

Ахундов къавеге чапа-чапа барып кель.

Мусафиримизни де долманен сыйлармыз.

Бутюн вакъыт къапу янында къаравуллыкъта тургъан Ахундов анахтарны айландырып, башыны аяткъа чыкъарып бакъты.

“Бу, соргъу япылгъанларнынъ не бир сеси, не кычырмасы, не зар чекюви эшитилген тена одада олар эм ашайлар, эм оларнынъ акъикъаткъа монополиясынен разы олмагъанларнынъ къан чыкъкъандже кемиклерини кыралар”, — апансыздан козю ачылгъандай, фикир чертип алды генчни.

О, турды:

— Сагъ олунъыз.

Долманъыздан емледим...

Азат ола билиримми?

Вакътынъызны зая сарф этесиз, эгер Чобан-задеге ифтира атаджагъымны беллесенъиз...

Лейтенант Шорохов кьоркьузаджакъ олып, масагъа юмругъынен урды.

— Отур!

Сарымсакъов сабырсыз хызметдешини кене тенбиеледи:

— Къоркъузмакъ керекмей...

Бухаралыларны Шаркънынъ Париж сакинлери, деп адландыралар...

Назик, тез тесирленген гонъюллери бар. — Хабибге чевирильди. — Бизнен уйлелик ашамайджагъынъызгъа языкъ.

Бу энди шаркъ анъанесине уймагъан бир шей: биз сизни мындан чыкъармамыздан эвель сонъки суаль: Чобан-задеден сонъ институттан чыкъарылгъан, сизинъ эшинъиз доцент Абу Сайид Ходжаев шимди къайда булуна?

— Бильмейим, — Хабиб омузларыны сыкъып, башыны тѳбен алды...

Ве Сарымсакъовнынъ даа бир лафыны эшитти:

— Худжур бир яш.

Заваллы даа тюневин Ругие Гиреевнагъа илядж алмакъ ичюн апханеге чапып кетти ве Каспий сувуна далгъан киби, изсиз гъайып олды.

Сарымсакъов турды, мундирини тюзетти, Хабибден къысылгъан козьлерини алмай, тюшюнип бакъты: — Тамам, бугунъ азатсынъыз.

Лякин токътагъан эвден бир якъкъа кетменъиз, сизге янъы суалим ола биле... бельки де, башкъа сизни раатсызламамыз. Ким бильсин? — Ве, сагълыкълашаракъ, Хабибге къолуны узатты.

О исе агъырмакълыкъ этип, чыкъышкъа адым атты ве токътап, терли къолны сыкъты.

Къапу янында олгъанда Сарымсакъовнынъ насиатыны эшитти:

— Эм де билинъиз.

Эндиден сонъ сиз, башкъалары — сизге таныш яки таныш олмагъанлар сырасында.

Арындырыджы “Къызыл фуртуна”гъа къошулгъан, даа бир дане, буюк олмагъан далгъасыз.

Ахундов къапугъа анахтарны кирсеткен заман Хабиб озъ ичинден кулюмсиреди: “Не керек акъикъаткъа монополияны аллегория ве тапмаджалар иле думанлаштырмагъа?

Ойле тактикамы?”

VIII

Хабиб басамакълар иле ашагъы чапаркен, азатлыккъа олгъан дуйгъусындан, мердивен онъа пек узун корюнди.

Идареджининъ тикилип бакъкъан назары астында мусафирханеден чыккып, не ичюндир, тюшюнмеден Шамахан арабакъапусы тарафкъа бурулды ве Ичери-шехернинъ сокъакъларына далды.

Невбеттеки такъиптен сакъынып, онынъ тар лабиринтлеринде излерини джойдурмакъ истеди.

Яшап кечирген эеджандан онынъ юреги булана эди.

Бираз нефес алмакъ ве “Нефтяник”нинъ тена одасында олып кечкенлерни яхшы анъламакъ, Сарымсакъов онъа берген суаллерни хатырламакъ ичюн биринджи расткельген скемлеге аман-аман йыккылып къалды.

Лякин не акъкъында тюшюнсе де, фикирлери Чобан-задеге, эфенди хавф астында олгъанына къайта берди.

Бельки де, бунынъ фаркъына барып, Бекир агъа вакътынджа Бакудан узакъча — Кисловодсккъа кетмеге къарар алгъандыр?!

Къарышыкъ ве чешит яштаки туристлер топлумы къылавуз — эсли, тобан шляпа ве тобугъынадже къырмызы антердеки къадыннынъ ишмарынен Хабибнинъ артында токъталдылар.

Чекишкен, ана-мына яйгъара къопараджакъ киби сеснен боразангъа: “Инкъиляп иштиракчилери ве ветеранлар, етекчи ермайджыларгъа, мектепкедже чагъындаки балаларгъа элли файызлыкъ эндирим...”, — кычырды о.

Сонъ, кызыл байрачыккы саллап, ачыкъагъызлар топлумыны Шамахан арабакъапулары бою юргюзип, “Баку ханларынынъ сарайы”на таба алып барды, о ерде “Ширваншахлар амамы” деген косътергич бар эди....

Дюльбер, къадимий задеканлыкъ корюниши олгъан Ханлар сарайы артында онъа кесен-кес терс кельген торс, къурум сажа излери олгъан таш бина тура эди.

Сарайнынъ ренкли, зенгин боялы къапламасына лякъайд козь ташлап, туристлернинъ бири шу таш къуруджылыккъа авесли дикъкъатыны токътатты ве къылавуздан:

— Бу ис баскъан бинада не бар?
Балыкъ цехининъ исханесими?

Къылавуз, топаллагъан москвалы, таягъыны котерип
косътерген тарафкъа козь биле атмайып, къыскъадан:

— Тахкъикъат тюрьмеси, — лаф гизли объект акъкъында
кеткени киби деди. — Авам халкъ арасында: Къара шеэр.

— О насыл шеэр олгъан экен?! — хымылдады таякълы адам,
— адий исхане, — тирельди о озь фикринде: — Бельки,
исханенинъ озь тюкяны бар, анда да, бизим Тамбовдаки киби,
чабакъ балыгъы иле бира саталар?

Къылавуз, бу дуюла эди, ахмакъ топлумдан болдурмагъа
башлады ве, базыда пельтекленип, озь хызмет вазифесини
беджеререк, анълатмагъа тырышты: — Къара шеэр тургъан
ерде асыр башында къую бар эди.

Капиталистлер ондан, ермай битмегендже, юзьсюздже
файдаландылар...

Ишчи халкъ, отъмексиз къалып, исьян къопарды...

Оларны залымджасына бастырдылар, эписи исьянджыларны
атып ольдюрдилер.

Иште, къыскъадан Къара шеэрнинъ тарихы, — ве, къызыл
байрачыкъны саллап, ачыкъагъызларны ашыкътыра-
ашыкътыра, туристлерни Ичери-шехернинъ лабиринтлерине
давет этти. — Энъ меракълысы илериде оладжакъ... он
бешинджи асырдан къалгъан Бухара базиргянларынынъ
кервансарайы.

Догъмуш шеэри анъылгъаныны эшитип, Хабибнинъ юреги
сыкъылды.

“Абу Сайидге хабер этмели, — чевре-четке бакъты: — Бельки,
хавф астында олгъаныны бильмейип, мында Ичери-
шехернинъ шиш кебаб емекханесинде кейф чатадыр?”.

Лякин шу арада бу фикирден ред этти: “Эски шеэрнинъ энъ
паалы ашханелеринде кейфленмек ичюн ишсиз доцентте
акъча къайда?”.

Абу Сайид къайда олмасы мумкюнлигини тюшюнип,
Шамахан арабакъапуларындан чыкъып кетмеге ашыкъты.

Арткъа бакъмай, “Нефтяник” мусафирханеси янындан кечти.
Къомшу аралыкъкъа бурулгъан сонъ, ярым саат огюне, андан
сагъ чыкъарыр экенлерми, деген фикирден чекишкен
къапалы кошедеки оданынъ экинджи къаттаки пенджересине
бакъып, нефес кечирди...

Пенджереде насылдыр инсаннынъ кольгеси корюнди, сонъ экинджисинки, санки ачыкъ авалыкътан кельген тазе аванен невбет иле нефес ала эдилер...

Эгер Хабиб шимди шу, оны соргъу япкъан одагъа къайтып олгъан олса, маса башындаки декорация денъишкенини корер эди — Шорохов ве Ахундов ерине анда Шор ве Григорянц лейтенантлары отура эдилер...

“Оларнынъ къурбаны ким экен?” — кельди акълына ве теляшлангъан Хабиб ялы боюндаки бульваргъа таба адымларыны тезлештирди, о ерде севги толу Абу Сайид... баштан тобугъынадже къара урбаларгъа сарынгъан, озюне бир километр якъын къоймагъан семетдеш озбек къызларындан фаркъ эткен, европа бичимли мот урба кийген яш, эркин Баку къадынларынен танышмакъ ниетинен сыкъ-сыкъ кезе тургъан...

IX

Эгер Хабиб Гулям-заде, мусафирханеден чапып чыкъкъан сонъ къомшу берберханенинъ кузгюсинде чыбалгъан сачларыны тюзетмек ичюн токътагъан олса, пенджересиз, брезент тѣпеси олгъан таныш машинаны, ичинден исе милислер Абу Сайид Ходжаевни чыкъарып, мусафирханенинъ къапусына итегенлерини мытлакъа корер эди.

Хабиб киби, бу алышылмагъан ве теляшлы шараитке тюшкен ишсиз доцент озюни эшине коре, къарама-къаршы алып барды.

Эгер Хабиб, биз коръгенимиз киби, синъирлене ве телюке вазиетинде къорчалама инстинкти оны, Сарымсакъовнынъ суаллерине тиль къайтармагъа меджбур эткен олса, Абу Сайид бойле алларда озюни садедиль, ондан не истегенлерини анъламагъан инсан киби алып бара эди.

Дивангъа отургъаны ве сербест, вуджудыны джайратып ерлешкенинен, меракъланды: бу, бельки, хатадыр, бельки, оны башкъасынен, айны о киби муэндислик институтынынъ доценти олгъан кимсенен адаштыргъандырлар?!

Чюнки НКВД хадимлерининъ бойле де иши чокъ, эр кесни тешкерип, козетип етиштирамазсынъ.

Бакуда эмиш-демишлер юре де: къуюмджы Самвел Акопян ерине кене шу эвде яшагъан онынъ сойадашы аякъкъапчыны якъалагъанлар...

Лякин эр шей Абу Сайид хаялына кельген сценарий боюнджа кетмеди.

О, садедиль, масум бир черенен кьапалы оданы козьден кечиргенде, кьомшу ханеден начар, акьсагъан адам чыкьып, эмир берди:

— Манъа бакъ!

Къыбырданма! — ве Ходжаевге фотоаппаратны тикледи.

Обири юзюни кьапатмакъ ичюн кьолунен кьорчалайыджы ишмар этти.

— Олды!

— Тарих ичюнми? — ынтылды шакъагъа чевирмеге даа джесаретини джоймагъан Абу Сайид.

Анджакъ о биле эди: соргъуларда фотоны “Мабюсинъ анкета”сына япыштырмакъ ичюн япалар.

Лейтенант Григорьянц кьансыз индже дудакъларыны тебессюмде созды, сесинде енгиль акцент иле, истизанен анълатты:

— Фотограф профессор Чобан-заденинъ истидатлы талебесини хатире оларакъ кьалдырмакъ истеди.

Йигирми эки яшында оджасынынъ гъайретинен Бакунынъ энъ яхшы алий окъув юртунынъ кафедарсында доцент ерини алгъан...

Демек, Абу Сайид Ходжаев, сизге бир кьач суаль бермек истеймиз, виджданлы, самимий джевап береджегинъизге умют этемиз.

Абу Сайид козь кьыйыгъындан лейтенант Шор, язмагъа азырланып, ““Къызыл фуртуна” иши” язысы олгъан джюзданны ачкъаныны коръди.

Абу Сайид бир аягъыны дигер аягъына нумайышлы кьойды ве озюне эминлик бермек ичюн майл омузларыны догъурлады:

— Меним джевапларым, мен ким оларакъ: шаат я да шекленген олгъаныма багълы оладжакъ...

— Бу сизинъ самимий икърар этменъизге, бизге ярдым этмек истегинъизге багълы, — къайд этти Григорьянц ве не ичюнدير Ходжаевнинъ бурну огюнде пармакъларыны шакълады.

Бираз арткъа берилип, Абу Сайид омузларыны сыкъты:

— Самимий олмагъа тырышырым, анджакъ, эгер сиз абайлагъан олсанъыз, мен эеджанлангъанда бираз пельтекленем...

Бундан интонациямны къанаатлендириджи деп саймазсыз, бельки, — эвельки садедиллик иле джевап берди согъу япылгъан.

Онынъ яры шакъа давуш аэнки, къаршыларында отургъан адам, къапалы одада бир озю олып, къоркъудан тилини юткъанына, я да эсини джояткъан алда олгъанына алышкъан тахкъыкътчыларны энъ башындан асабийлендире башлады.

Институттаки сабыкъ зенаатдашларындан онынъ йымшакъ табияты, шенъ, мазунлыкъ бильмеген къую ве танышмакъ ичюн бакулы къызларны сайламагъаныны билип, тахкъыкътчылар Абу Сайид ильк суальден башлап, Бекир Чобан-задеге къаршы оларгъа керекли шаатлыкъ береджегини бекледилер, джевап оларакъ исе кульмек, шакъа этмек...

— Доцент унванына сиз, профессор Чобан-заде сизге теклиф эткен Махмуд Къашгъарлынынъ “Дивон-и лугъат-и ат-тюрк” эсерини азербайджан тилине терджиме эткенинъиз ичюн наиль олдынъыз.

Ойлеми? — берди суалини Григорьянц, ода бою юрип.

— Догъру... бакулыларгъа мусафирченликлери ве гъарип студентке къолтуткъанлары ичюн меним тешеккюрлерим оларакъ, — джевап берди Ходжаев, озю исе тюшюнди: “Бильмирли инсанлар, бедава айтмагъанлар: энкавэдэде “къызыл пофессорлар” сырасындан энъ тасилли чекистлер чалыша”...

Григорьянц, кескин демленген чай къокъусы кельген къомшу одагъа, биревни соргъуда иштирак этмеге чагъырып, бакъты ве бирден чевирильди:

— Я сизинъ акълынъызгъа кельмедими, совет бакулыларгъа: ермайджыларгъа, сувгъа далыджыларгъа, денъизджицерге узакъ къуллукъ заманыдан къалгъан “Дивон” неге керек олгъаныны тюшюндинызми?

О оларгъа насыл бильги бере биледжек?!

“Ама да янълышкъаным, — тюшюнди Абу Сайид онынъ бетине бакъып, — бир дакъкъа эвельси чекистлерни укъукъкъоруйыджылар арасында энъ окъумыш сандым, мында исе не эшитем... ресмий, эскиджесине, шиарлар тили. Эбет, адджы козь къайтув...”.

— Къашгъарлынынъ мешур “Дивон”ны хызметим талабынен алимлер шурасы изини иле терджиме эттим... бунынъ ичюн кафедрада бошагъан доцент ерине кирдим.

Эгер къыскъа айтаджакъ олсакъ...

— Айды, ойле олсун, — тахкъикъатчы озъ агъыр кевдесинен соргъугъа огърагъаннынъ янына, дивангъа ойле ялпашты ки, тап зембелеклери пружина гъыйчылдады, — айса, чокъ икметли алимлер шурасы сизинъ ишинъизде ачыкътан-ачыкъ зайыф, миллетчи фикирлерни не ичюн коръмегенини насыл анъламакъ мумкюн?! — Бирден турып, Григорьянц къапында “Къызыл фуртуна” иши” деген джюздан яткъан маса янына барып, пармагъынен онъа тирельди.

— Бельки, оларнынъ козьлерине Бекир Чобан-заденинъ шуретинден перде тюшти?

Сёз сырасы, гъает шубели шурет, дер эдим.

Чобан-заденинъ тезкереси бар, онда ильмий шурагъа, сизге тюрк филологиясы кафедрасынынъ доцент унваныны бермек риджасы язылгъан, бу кафедрагъа исе о озю ёлбашчылыкъ япа эди.

— Эбет, риджа этти, чюнки Чобан-заде о заман меним ильмий реберим эди — тааджипнен бакъты тахкъикъатчыгъа Абу Сайид, — профессор Латыф-заде язма шекильде къолтутты...

Григорьянц, козьлерини къысып, соргъугъа огъратылгъангъа девамлы бакъты, санки доцент унваны иле вакъиада даа зияде къандыраджакъ делиллер къыдырды.

— Сиз сабыкъ зенаатдаш доцентлер Мемет Энвер-огълу, профессор Ахмат Кълыч-огълунынъ адларыны билесизми?

Абу Сайид, эбет, белли, дегендай, тааджипнен омузларыны сыкъкъан вакъытта тахкъыкъатчы масадан “Къызыл фуртуна” иши” деп адландырылгъан джюзданны котерип, оны авада силькиди:

— Мында бакъ.

Бу эки иззетли оджа сизинъ “Дивон”гъа язгъан изаатларынынъызгъа къандырыджы бир сесленме яздылар... бу намуслы алимлернинъ фикриндже — Къашгъарлы тариф эткен тюрклер тили, оларнынъ адетлери, риваетлери акъкъында сиз язгъанларынынъыз — сахте илим.

Сизинъ, къадимий тюрк къабилелерине бакъкъанда, славянлар къабилелери — земаневий рус, украин, акърусларнынъ илерилев дереджеси он къат ашагъы эди — язма тили олмагъан, цивиль адалетли къанунлар олмагъан, къыскъасы айдутлар, деп тасдикълагъанынынъыз да тенденциоздыр.

Эм сиз насыл этип анълатырсыз ки, Чобан-заде киби ойле бир басиретли алим сизинъ язынынъызда усталыкънен сакълы сувасты ташларны, земаневийджесине айткъанда — джебинъызде учъпармакълы ишаретни коръмеди?

Бельки, сизинъ эфенди бу къатмер миллетчиликке махсус козьлерини юмды?

Анджакъ, неге шашмакъ мумкюн мында!

Аджджы алма тюбюнде адджджы алма... Сиз де зенаатдашларынынъыз козюнде адджджы алма олдынъыз, эм олар сизни ве меслекдешинъизни институттан къувдылар... — Айнеджиликнен козьлерини къысып, иш иле джюзданны тосат-тосат саифелеген зенаатдашы Шоргъа бакъты ве Абу Сайидге чевирильди.

Яшнынъ юзюнде тааджип ве шашкъынлыкъ дуюла, санки о, тахкъыкъатчы ойле тафсилятлы, давушында махсус аэнкнен айткъан сёзлерни анъламай эди.

— Сёз сырасы, Бекир Ваапович Чобан-заде шимди не ерде олгъаныны бильмейсизми?

Бакуда я да Къарасувбазарда?

Абу Сайид суальни эшитмегендай этти, онъа ве Чобан-задеге чакъув язгъан — профессор Ахмат Кълыч-огълу ве доцент Энвер-огълуны хатырламагъа тырышты.

Оларнен танышлыгъы чокъ якъын дегиль эди, шимди исе ишсиз къалгъан вакъытта оларны хатырасындан умумен чыкъаргъан.

Эписи бир бу чакъув онынъ зытына басты...

— Ильмий фезада Къашгъарлынынъ “Дивон” иши этрафында, адет узьре, эки я да учъ давалы фикир пейда ола...

Шу себептен иззетли “къызыл профессорлар”нынъ сесленмеси... не эди шу адлары... огълу... огълу?, — эки йыл омрюни сарф эткен эмеги нетиджесини яманлагъанларнынъ адларыны хатырламагъа тырышып, манълайыны бурюштирди о, — мен тек Чобан-заденинъ дегиль, Самед Агамалининъ фикрини де козь огъуне алдым.

— Сиз шимди не акъкъында айтасыз? — асабийленип айтты, Чобан-заденинъ булунгъан ери акъкъында суальге джевап беклеген Григорьянц.

— Ильмий алемдеки мунакъашалар акъкъында... — садедилликнен джевап берди Абу Сайид.

Соргъунынъ базы ерлерини язып алгъан зенаатдашы Шор, бесе-белли, джан сыкъыджы иштен безди.

Асабийленип, къарандашнен масагъа такъылдамагъа башлады:

— Озь окъумышлыгъынъызны нумайыш этмекни токътатынъыз!

Тахкъикъат сизге нисбетен энди екаяне нетидже чыкъарды!

Масагъа такъырдыны этишип, Сарымсакъов къомшу оданынъ къапусыны ачты ве, ягълы къолларыны сюртерек, босагъадан атлады.

Артындан, чевре-четке сакъынып бакъкъан хызметчи къадын аш къалымтыларыны алып чыкъты.

— Кунъ хайырлы олсун, Абу Сайид Ходжаев, — бир къарар достане, бир къарар япма сыфатта селямлашты Сарымсакъов.

Абу Сайид семетдешининъ таныш лехджесини эшитип, бекленильмеген бу вазиетте тап турмагъа ынтылды.

— ТааджиПЛЕНДИНЪИЗМИ?!

Мен де хызмет ишлеримнен мында, Ташкенттен бинълер километр узакъкъа келип, эки семетдешим — Хабиб Гулямзаде ве сиз иле танышаджагъымны беклемедим. Хабиб энди мында олгъан, — кельди Абу Сайиднинъ акълына.

— Тютюн ичесизми?

Буюрынъ... — капитан папирос къутусыны ачып, онынъ тарафына узатты.

— Ичем... — шашмалап, деди соргъугъа огъратылгъан.

О але даа “Хабиб де мында олгъан...

Шимди къайда экен?

Бельки, шу, Сарымсакъов лезетли ашкъа тойгъан корюнишнен чыкъкъан къомшу одададыр”, деген мусаллат фикирден къуртуламай эди.

Лякин:

— Лютфен, буюрынъ... — сёзлерини эшитип, апансыздан: — Ёкъ, тютюн ичмейим, сагъ олунъыз...

Мен, иште, янълыш айттым — балалыгъымдаки чаялыгъымны хатырладым...

— Машалла, меним балалыкъ чаялыгъым, ана-бабамдан сакъланып ичкеним, мени теджрибели тютюн ичиджи япты...

Сёзлерини тасдикълагъан киби, Сарымсакъов токътамайып тютюн иче, тосат-тосат погонларындан, башлары тёпелеринде давуш чыкъарып чалышкъан ельпазенинъ япракълары бутюн одагъа дагъыткъан кульни къакъып тура эди.

Бир къач вакъыт тахкъикъатчы Шор отургъан маса устюнден эгилип, “Къызыл фуртуна” иши” джюзданыны саифеледи...

Онынъ таныш корюнген бетине бакъып, Абу Сайид апансыздан, институт китапханесининъ сакълы долапларында яткъан “Чар гизли полисининъ усуллары” деген китапны хатырлады.

Онда бири-бирини “даирели соргъуларда” раатлыкъ бермейип, токътамайып, Григорьянцкъа ошагъан “серт” тахкъикъатчыны “муляйим” , тамам шимди озюни ойле косътермеге тырышкъан, Абу Сайидге тютюн теклиф эткен, Григорьянцкъа аш кетирген акъсакъ хызметчиге исе, соргъу соралгъангъа буфеттен бир шише “нарзан” кетирмеге авале эткен Сарымсакъов киби сою.

Бу токътамагъан, мыргъаны чыкъаргъан даиреге тюшкен инсан, “серт” сою оны акъаретлеп, устюне кычырып, урмакънен кьоркбузып, “муляйим” союна теслим эткен сонъ, ондан имдат кыдырып, озю ве башкъалары акъкъында, “муляйим” сою не талап этсе, айта тургъан...

Лякин “муляйим” сою да чаресини тапмаса, озюне джелъп этип оламаса, ве соргъу япылгъан адам не озюне, не де башкъаларына ифтира ташламакътан вазгечсе, онынъ ерине кене “серт” сою келе.

Бусы таякънен агъыргъан ерлерге урмакъ... япышкъакъ орюмчек кьолларынен, соргъу соралгъан эсини джоймагъандже, богъмакъ уста...

“Мен олар ичюн ойле, язылмакъ ичюним, олар Чобан-задеге якъынлашмакъ ниетинделер” — бу айныкъ фикир Абу Сайиднинъ мийинде олгъан къалабалыкъ ичинден тепип чыкъты.

— Ичери-шехерни бегенесизми? — башлады бекленильмеген суальден Сарымсакъов, ве, джевапны эшитмек ичюн токътамадан, девам этти: — Бакугъа кельгенимнинъ ильк куню таныш бир бакулы иле Ичери-шехерге бардым.

Онынъ сеси узакътан кельген киби эди.

Чобан-заде акъкъында фикирлернен мешгъуль Абу Сайид, эфенди этрафында башлангъан бу хавфлы оюнда эмиетсиз бир адам олгъаныны къандырды.

Къулагъы уджунда эшитти:

— Энъ-эвеля бакулы мени Бухарадан кельген базиргянлар токътагъан кервансарай янына алып барды... самимиетле, манъа бизим сизнен умумий ватанымызны анъдыргъан кошечикни корьмектен мемнюн оладжагъымны бекледи...

Мен исе окюндим, чюнки мында озю акъкъында тек бизим киргин туджджарларымыз хатыра къалдыргъан.

Алишер Навои, Бобур, Ибн-Сина киби улу семетдешлеримиз дегиль... — ве тюшюнджели алда токътап, капитан тавангъа тютюн булутчыгъы чыкъарып, папирос тюпчигини масада тургъан кулюкке басты.

Абу Сайид бираз бошашты ве дивангъа онъайтлыджа ерлешти.

— Эписи бир Навоининъ руху мында авелей.
Бекир Чобан-заде озъ ишинде бизим белли
саметдешимизнинъ шириетини теткыкъ этти...
Онынъ ичюн...

— Эбет, меракълы, демек, Озъбекистаннынъ авасы,
манзарасы, ярыкъ кунеши профессорны
ильхамландырдылар... бизим улькемизни бир сефер, эки
сефер дегиль, чокъ зиярет эткен, озъ бильгиси иле бизим
анъкъав генч тюрклернинъ младотурки дюнья
бакъышларыны кенишлеткен Исмаил Гаспринскийни киби...

— Ве апансыздан мевзудан чекилип, сорады: — Сиз, мен
беллесем, Бакуны Истанбулгъа коре, зияде бегенесиз...
Мында сиз ильмий мувафакъиетке ириштинъиз, бу
мувафакъиетнинъ эсасы даа Тюркиеде къоюлса да... мен
сизинъ “Бозкъурт”лардаки иштирагинъизни козьде тутам.

— Бу янълыш. — Абу Сайид окюнчнен дудакъларыны сыкъты,
— бир ерде, ич бир тюрлю Истанбул тешкилятларында аза
олмадым... университетте окъудым, шиирлер яздым...
Эвимни сагъынып яздым, иште.

— Я сиз Самед Агамали иле насыл таныштынъыз?
Насыл авесликлеринъиз сизни фикирдеш япты?

— Доктор Агамали иле бизде насыл умумий авесликлер ола
биле, о менден чокъ яш буюк, гъает мувафакъ,
дюньябакъышлары къавий инсан?
Бизни Бакуда Чобан-заде таныштырды, — джевап берди
соргъу япылгъан сакин сеснен, санки Истанбулдаки окъув
йылларыны хатырлап.

— Самед Агамали шимди къайда?
Сиз билесиз?

— Ёкъ, тек шуны билем ки, профессор Чобан-заде иле
Агамали институттан къувулдылар, мен де олар иле берабер
къувулгъанлар компаниясына кирдим...

— Компаниясынамы?!

— Сиз шимди шашырып айттынъыз я да анълы суретте? —
Сарымсакъов къомшу ханенинъ къапусына чевирильди, андан
токъ уйлеликтен козьлери ягълангъан тахкыкъатчы Шор
чыкъты.

— Я сиз, тюрклернинъкине ошагъан тешкилят — “Туркистан бозкъуртлары”нда берабер аза олгъан Ташкенттеки студентлер компаниясы акъкъында не айта билесиз?

Чобан-заде масюм раатлыкъ ве оюнлар шеклини берип, сизни табиаткъа чыкъаргъаны; профессор тюрклернинъ миллий дегери акъкъында девамлы субетлер алып баргъаны, Туркистан совет Русиеге къошулгъан сонъ улькенинъ халкълары тек мустакъиллигини дегиль де, миллий анъыны джойгъаны акъкъында, оларны руслашмагъа меджбур эткенлерини.

Ве даа чокъ олмайджакъ шейлер айткъаныны...

Абу Сайид тааджипнен Сарымсакъовгъа бакъты ве сонъ козюни четке алды:

— Булар эписи ялан...

Чобан-заде ойле лафлар юрсетмеди!

Бекир Ваапович аудиториядан тыш да болдурмакъ бильмей эди...

Лекцияларда анълатмагъа етиштирмегенини айта тургъан...

Болдургъан сонъ, ойнап кучъ ала эдик...

“Къувалама”ны огрене, я да “Батты балыкъ” ойнай тургъанмыз.

Апансыздан, сааткъа бакъып, субетке тахкъикъатчы Шор киришти:

— Бу яланчыкълар неге керек асыл?!

Капитан аркъадаш, хатырасыны бираз тазертмек ичюн, Ходжаевни белли бир вакъыткъа бираз къынтавлыджа шараитке къоймакъ ляйыкъча олмазмы?

— Ойле олса керек, — керди къолларыны Сарымсакъов ве тамам обири киби сабырсызлыкънен сааткъа бакъты.

Бесе-белли зияде муим ве башкъа вакъыткъа къалдырылмайджакъ иши бар эди.

— Машнаны чагъыртынъыз.

— Бизнен кетедженъ! — Шор Абу Сайидни къапугъа итеди.

О исе чевирильдиди ве чокъ отургъанындан уюшкъан аякъларында салланды: — Сагъ олунъ, джаяв да юре билирим... — Джамы буланчыкъ ёлакъларнен орьнектенген

пенджерере бакъты. — Ягъмур ягъгъанда мийинъе яхшы фикирлер келе...

Григорьянц къапуны бираз ачты:

— Бизнен кетедженъ, акъыл торбасы, — деп, босагъадан атлады.

Ве Абу Сайид яры ачыкъ къапугъа башыны чыкъаргъанынен, тахкъикъатчы оны тез къапатып, яшнынъ пармакъларыны кыысты.

Абу Сайид даянмагъа чареси олмагъан агърыдан кыычырды. Григорьянц, кескин сестен кейфленип, къапуны даа бираз къапалы тутып турды:

— Даа зияде агъыраджакъ, чокъ зияде... эгер ялан айтмакъны токътатмасанъ...

X

Сумбатов ве компания Чобан-заденинъ эвине тинтюв япмагъа кельген кунюнден бир вакъытлары кынтавлы мескеннинъ къою авасындан къасевет руху ве янъы мусибетлер беклеви ойле де аваланып чыкъмады.

Бу вазият Ругие ханым ичюн пек агъыр келе ве о, озюни куньден куньге эп начар ве хастаджан сезе эди.

Ноталарны четке чекти, фортепиано энди янъгырамай эди...

Бекир агъа иле бахтлы эвлиликте кечкен йыллары бу эвде ич бир вакъыт ойле мелюль ве агъыр сукюнет олмагъан эди.

Асие иле субетлернинъ мевзусы да чокъсу акъайы эди: Бекир иле бир шей олса, даянамаз, якъаланувы исе яшатмагъан алгъа кетирир...

Тосат-тосат о, санки эссиз алгъа тюше эди...

Атта мусафирликке апансыздан яш, мизаджлы, музыкада буюк мувафакъиятке иришеджек Кара Караевнинъ кельмеси биле Ругие ханымда аяткъа меракъ къайтармады.

Караев сорамадан фортепианонунъ башына кечип, тикине тургъан сачларыны сыйпады ве Ругие ханым санада баш роллерден бирини иджра этмеге тайинленген “Еди гузель”ден бир къач аккорд чалмагъа ниетленди.

— Оны саналаштырмагъа изин бергендже мен энди къартайып кетерим, — чекти нетиджени Ругие ханым,

бекленильмеген мусафирни эвден тездже аткъармагъа ве озъ теляшлы фикирлери иле къалмагъа истеп.

Кара кеткен сонъ шашмалагъан, къайгъы-къасеветте къалгъан Хабиб къайтты.

Асие онынъ одасына ашыкъты: сабадан апханеге илядж алмагъа чыкъкъан Абу Сайид акъкъында бир шейлер бильмеген экенми.

Хабибнинъ къаршысында, болдургъан къолларыны тизлерине къойып, сусып отурды.

Бири-бирини бегенген яшлар арткъач сёзсюз бири-бирининъ алыны анълай эдилер...

Асие ве Хабиб бири-бирине меиль бергенлерини корьген Ругие ханым, шакъа этипми, джиддий айтыпмы, Гулям-задеге меслеат берди: къызгъа онъа акъайгъа чыкъмагъа теклиф этмек ве Бухарагъа алып кетип, Къырымдан келиннинъ ана-бабасыны чагъыртып, той япмакъ.

Бири-бирине меильни ве багълылыкъны берабер операгъа баргъанлары да къызыштыра эди, театрге кириште билетсиз яшларны Ругие ханым къаршылай ве галёркагъа озгъара тургъан.

Спектакльден сонъ, тескин алда ялы боюнда кезе, Хабиб Асиеге, Баку пахыллайджакъ дереджеде, Бухаранынъ дюльберликлери акъкъында эеджанлы икяе эте эди.

Ятакъ одасындан инъильти эшитип, Асие Ругие ханым янына ашыкъты, Хабиб исе багълы киби къатып къалды.

Онынъ къарышыкъ фикирлери Абу Сайид иле къавеханеге баргъан Ичери-шехернинъ сокъакълары, аралыкълары, лабиринтлеринде эди...

Ойле де реаль бир шейге шекилленмейип, теляшлы фикирлер апансыздан къопа, санки Чобан-заденинъ эвинде тинтюв олгъан он бир февраль кунюне барып тиреле ве онынъ къою, къаранлыкъ барлыгъында батып кете эдилер.

Эв ичинде вазиетни даа бетер кергинлештирмемек ичюн Хабиб Ругие ханымгъа ве Асиеге “Нефтяник” мусафирханесиндеки соргъу, Абу Сайидни шеэр бою къыдырып юргени акъкъында ич бир шей айтмады.

Ялынъыз Ругие ханым дегиль, Асие де кескин къадын дуйгъусы иле сезе эди — куньден куньге, челик сармал киби, бу эвде, эм де Бакуда саф юрегинен къабул эткен, севген адамлар устюнде дешетли бир шей сарыла.

Ятакъ одасындан чапып чыккыан Асиенинъ сесли даушы Хабибни озюне кетирди:

— Хабиб, къач!

Сакълан!

Подъездге къара “воронок” келип токътады.

Кескин давуштан Хабиб сескенди, къапалы азбарчыккыа чыккыан пенджереге якъынлашты.

Ильк фикри: кучлю кевдеси иле пенджереге тирелип, первазыны аттырмакъ ве онынъ устюнде ерге барып къонмакъ...

Секирмеге энди азырлангъан сонъ, дешеттен шашмалагъан Асиени коръди ве токътады.

— Ёкъ, къачмакъ акъайджасына дегиль... Чобан-заде ве Абу Сайид телюке астында булунгъанда... — ве кызынынъ тирсегини сыкып, сокъаккыа чыккыан къапугъа догърулды.

Къапалы, пенжересинде пармакылыкъ олгъан демир “воронок” ичиндеки думанда тек кабинада отургъан милислернинъ аркъалары корюне эди.

Хабиб, сувукъ тар отургычта мумкюн къадар кьолайлыджа отурып, дуйгъу уджунда Абу Сайиднинъ омузыны сезди, онъа сыйыкты, эшини омузларындан къучакълады ве ушюген кьолуна джыллылыкъ къайткъаныны дуйды.

Учюнджи кысым

Эмшире Галина Христофоровна, энди эсли яшта олса да, Бекир Чобан-задеден бираз огде чалт юрип, топаллагъан профессор огюнде палатагъа кирсеткен къапуны ачты.

Тынч, яхшы ава денъишкени, ель котерильгени себебинден, къадын озъ ичинден «кыйметли пациент» деп, адландыргъан адамнынъ башы айлана, коксюнде агърылар пейда олды.

Танъгъа якъын, палатанынъ пенджерелерине ель бурчакънен ургъанда, Чобан-задеде, эвельки геджедеки киби, нефес тарлыгъы башланды.

Онынъ ичюн тедавийлеген экими — Зураб Константинович Жбаниянынъ тевсиесинен сабалыкътан эвель япыладжакъ

тедавийлев процедураларны уйледен сонъки раатлыкъ саатына кечирдилер.

Шарко души ве нарзан ваннадан сонъ озюни тендюристче дуйып, Чобан-заде, палатадаки къомшусына сantlyрач ойнамагъа ишандырса да, раатлыкъ саатында бир чырым алмагъа истеди.

Эмшире онынъ къан басымыны ольчеп кетеджекте палатагъа Зураб Константинович кирди ве босагъадан атлар-атламаз, сесинде енгиль гурджи аэнкинен сорады:

— Сонъ, бугунъ насыл, Галина?!

— Арткъач — юз эллиге юз, набызы сыкъ, — джевап берди Галина Христофоровна бираз къабаатлы давушнен, тонометрнинъ осал косътергичлери ичюн къабаатны озъ бойнуна алгъандай.

— Анълашылды, — эким, Чобан-задеге бакъып, манълайыны бурюштирди, тюшюнджеге далды, къыркъ беш яштаки эр киши ичюн — чокъчаракъ...

Анджакъ мийнен чалышмакъ, йигирми дёрт яшында профессор олмакъ...

Эм къайдадыр дюньянынъ бир тешигинде дегиль, атта меним догъмуш Кутаисимде дегиль де...

Будапештте — ильмий Европанынъ меркезинде десенъ, оладжакъ, — айтты Зураб Константинович хатыр сайып ве пациентнинъ сагъ къолундаки пармакъларыны сыйпакълап.

— Эм чокъ акъыл керекмей... аят бугунъ исьян къопарды... яшына бакъмай, эр кесни хасталыкълар йыкъа. — без шапкечигини таз башындан чыкъарып, кокюс кечирди.

— Манъа да етиштирмек керек, — апансыздан болюшти эким шахсий меселенен, — къыркъ докъузdam, сыфырсыз элли, диссертация язмагъа исе даа отурып оламайым...

Мевзусы да семерели — совет ишчилерни санаторийлерде тедавийлевнинъ илери усуллары...

Етиштирир экенми? — ве, Чобан-заденинъ элини сыйпай берип, къарар алды: — Вуджуткъа баскъыны бираз эксильтейик... бир кунъде эписи беш процедураны дегиль де...

Бир кунь шарко, эртеси куню — нарзан...

Галина, озюнъизде къайд этинъиз...

Эким Чобан-заденинъ хасталыкъ тарихы иле джюзданны ачты:

— Иште, бугунь бизде,.. — кягъыттан айткъаны киби лаф эткен темпераментли эким джеп саатыны чыкъарды, джамыны сюртти: — бугунь сабадан бинъ докъуз юз отуз еди сенеси, йигирми секизинджи январь...

Сиз бизде даа эки афта мусафиримиз оладжакъсыз... профессор озюни йигирми яштаки йигит киби дуймасына вакъыт етерли, маден ишчисининъ кучю ве сагълыгъы иле...

Бизде, экимлерде, ойле шиар бар: «В санатории «Горняк» – выкорчевываем у больного весь сорняк», — ве шакъылдап кульди. — Раатланынъыз, курортнынъ паркында кезининъ, торренкур — тедавийлейиджи юрюш иле авесленинъ ве кок наратлар оськен аллеялардан юрюнъ, анда ава — ах!

Яйладаки киби...

Эгер де кезинтиге чыкъкъанынъызда янынъызгъа гузель бир къадынчыкъ алсанъыз — къан басымынъыз бирден тюшер, меним бу саада теджрибем бар, инанынъыз, — ха! ха! — къадын иле Нарзан галереясынадже кезинип барынъ, чокъракътан шифалы сувчыкътан ичинъиз, сонъ Кузьгю тыйнакъны сейир этинъиз.

Джошкъунлыкънен девам этти эким:

— Энъ яхшы терапия, — ве, турып, Чобан-задеге мемнюниет иле элини салады: — Раатланынъыз.

Керек олса, даима ихтиярынъыздам, бугунь мен санаторий бою геджедеки невбетчи оладжам.

Акъшамгъадже Чобан-заде башы айлангъаны себебинден, онъайтлыджа ерлешмек ичюн бир тарафындан дигер тарафына айланып ятты.

Теляшлы тюшюнджелери онъа Хабиб Гулям-заде акъкъында да хатырлаттылар...

Сонъки мектюбинде бухаралы эфендиге ёлгъа чыкъмакъ ниетленгенини ве бу сефер оджасы онынъ Абдулла Къадырининъ тиль янъылыгъы акъкъында ишини макъуллейджегине арзу эткенини язды... онъа пек серт къыймет кесмемеге ялварды.

Муддетке коре, Хабиб энди Бакуда олмакъ керек ве Ругие ханым иле Асиенен узун кыш акъшамларыны субетте кечиредир...

Эвинде тинтюв олгъаны акъкъында, Чобан-заде, табиий ки, бильмей эди.

Чюнки апайы о, санаторийде тедавийлевни ташлап къайтаджагъыны билип, онъа хабер этмеди.

Санаторийге исе оны буюк къыйнлыкъларнен, азатлыкъта къалгъан бир къач достунынъ ярдымынен ерлештирген эдилер.

Ругие ханымны генерал Сумбатов тинтюв вакътында ич бир зарарлы шей тапылмагъаны акъкъында сёзлери тынчландырды.

... Палата эки адамлыкъ эди.

Ортасында къар астында сакълангъан Эльбрус корюнген пенджере.

Ава етишмегенинден богъулмагъа башлагъан Чобан-заде тёшеги ичинде отуруп, дагънынъ маил сыртына бакъаракъ, манзараны Кырымкинен кыяслады.

Къаранлыкъта саллана-саллана, пенджере янына барды.

Къомшу ятакъта юкълагъан адам уянып, башыны котерди:

— Не олды профессор?

Невбетчи экимни чагъырайыммы?

— Авалыкъны ачсам, сизни ель урмазмы?

— Ёкъ, биз, маден ишчилери, сувукъкъа даяныкълымыз... тек ярыкъны якъманъ, юкълап оламам, — онынъ сесинде Чобан-заде гизленген джан агъырувны дуйды, чюнки акъшам онынъ иле сантырач ойнамадылар.

Горловкадан кельген маден ишчиси пек эеджанлы инсан олып, ойнагъан вакътында ракъибини болдурта эди.

Юткъузгъанда исе, озюни акъламакъ ичюн:

— Эбет, профессор математикада кучлю, эм сёзлерни, эм ракъамларны «семычка» ашагъандай черте, — дей тургъан.

Чобан-заде исе онъа:

— Меним зенаатым башта арифлернинъ дадыны бакъмакъ, сонъ олардан сёз ве джумлелер тизмек, анджакъ бу керчектен де математика къаиделерине ошагъан бир шей.

Маден ишчиси шеригининъ анълашылмагъан сёзлери устюнде тюшюнerek, сусып отура эди.

Лякин Чобан-заде де юткъузгъан вакъытлар ола тура эди.

Бу вакъытта палатадаки къомшусы: — Шах ве мат, профессор! — деп джекире, онынъ къычыргъанындан пенджеререде джамлар биле чынъылдай эди.

— Пролетариат мында да озъ шиарына садыкъ къала: беджерикликте къызыл профессурадан бир адым артта къалма.

Иште, къомшусы худжур бир адам эди...

Ачыкъ авалыкътан, дагъларнынъ маил къарлы джапларындан йылышып кельген сабанынъ тазе авасы кирди.

Чобан-заде ичине аваны чекерек, апансыздан тюшюнди:

— Мында Къарадагънынъ чечеклери ве отларынынъ кескин къокъусы ёкъ.

Оны коксюнъни керип нефес аласынъ ве тендюристлик, шифа дуясынъ...

Эльбрускъа бакъаракъ, Чобан-заде фикирлеринен Къырымгъа, денъизге, Къарасувбазаргъа къайта, хатырасында догъмушлар — анасы, бабасы, Зулейха къардашынынъ эм де, насылдыр худжурлыгъы я ибареси иле акъылда къалгъан таныш къарасувбазарлыларнынъ юзьлери козю огюнде джанлана эди.

Назарыны азбардаки липильдеген, устюни энди танъдаки къызыл нурлар ярыкълаткъан фенерге кечиргенде, Чобан-заде кене Хабиб Гулям-заде акъкъында тюшюнди.

Профессор институттан къувулгъан сонъ, Къырымгъа къайтмакъ меджбур олгъан студентлерни киби, оны да бу такъдир беклейдир.

Ватанына — Кезлевге, Акъмесджитке, Судакъкъа, Къарасувбазаргъа къайткъанларнынъ мектюплеринде — сатырлар арасы «эзоп тили» иле якъаланувлар акъкъында хабер пек теляшландыра эди.

Анъылгъан адлар арасында Чобан-заде иле андаки педагогика институтында чалышмакъ къысмет эткен,

Миллий Фиркъада, 1921-1923 сенелерининъ ачлыгъында фукъарелерге ашайт, пара топлавда, гизленген мырзалар ве зенгинлернинъ малыны чекип алууда ишбирлик япкъан... топлашувларда онынъле джами ве медреселернинъ мулъкюни тутып алмагъа чагъыргъанларны...

Сонъра, эбет, инкъиляпнынъ акъымына тюшюнмезден берильгенине, озюнкилерни ве ябанджыларны айырмагъанына пек яныкълагъан эди...

Бу, яшлыгъынынъ хаталары акъкъында къааръли хатырлавларны коридордаки давушлы адымлар узьди.

— Профессор Бекир Ваапович Чобан-заде мында, он дёртюнджи палатада, — эшитильди Зураб Константиновичнинъ шашмалагъан сеси.

Бирден, диваргъа урулып, палатынынъ къапусы артынадже ачылды.

Къаранлыкъта беяз халаты иле айырылгъан Зураб Константинович авизедеки ярыкъны якъты.

Чобан-заде ярыкътан козюни къапатып отурды.

Къомшусы сомурданды:

— Ким шу анда?!

Козълери ярыкъкъа алышкъанынен, киргенлерден биринджи абайлагъан ве бир кереден олмаса да, таныгъан адамлардан къарасувбазарлы Сервер Файтонджы эди.

Киргенлер арасында чокъ корюнмеге истемегени себебинден о, Чобан-задеге бир кере бакъты ве генерал Сумбатовнынъ аркъасы артына кечип, сакъланды.

Къапуда бираз шашмалагъан тахкъикъатчы Григорьянц Зураб Константиновични серт арекетнен четке итеди ве Чобан-задеге кягъытны узатты.

— Гражданин Бекир Ваапович Чобан-заде, савджы прокурор аркъадашнынъ сизинъ якъаланувынъыз акъкъында эмри, имзаланъыз!

Файтонджы, Сумбатовнынъ омузы артындан башыны чыкъарып, Чобан-заде ашыкъмайып, пенджере янына баргъаныны козетти.

Палатадаки къомшусы исе, озюни юкълагъан киби алып барып, ашыкъчанлыкъле ёргъанынен башыны къапатты.

Пенджеренинъ ярыгъында повестканы окъуды, якъаламакъ эмирини бергеннинъ сойадына дикъкъат этти: Теймур Кулиев, сонъ кягъытны терсине чевирди, санки онынъ акъикъый олгъанында шубеленди.

Киргенлер тургъан ерлеринде таптанып, сабырсызлыкънен беклей эдилер.

Файтонджы Чобан-заденинъ арекетлерине: яваштан долапны ачкъаныны, аскъычтан къаверенки пальтосыны башта чыкъарып, сонъ кене аскъаныны, биджагъыны кийгенини, тынч ве эеджансыз тавырнен джеплерини тешкергенини, косътекли саатыны къулагъына къойып, юре экенлерми, деп динлегенини, козюни алмай, бакъып турды.

Онынъ сабырлы, тизгинли арекетлерини козетерек, Файтонджы тюшюнди: «Шашмалады, гонълю къырылды, талийини чокътан беклеген киби, амма шимди штанына къайышны кечиргенде, вакъыт соза, олып кечкен вакъиадан шашкъан тедавийлейиджи экимининъ къоркъувдан къарылгъан сесине динълене».

— Тедавийлев битмесине даа он дёрт кунъ... он дёрт... энди тюзельмеге башлады... — фысылдай эди эким, якъаланувны санаторийдеки тедавийлев битмегендже, хастаны къалдырмагъа ялваргъандай.

Сабырлы тизгинли арекетлер палатада апис акъкъында хабер кетирген гъает корюмли делегациянынъ кельмесинден пейда олгъан кергинликтен юзь берди.

Эписинден зияде исе оны, Къырымда ат ойнаткъан къанунсызлыкъны омюрге кечирген Сервер Файтонджынынъ мевджудиети эзе эди.

Эгер эвель Чобан-задеге онынъ студентлери «эзоп тили»нде язгъан мектюплерде тек узакътан хабер берген олсалар... шимди мына о, хаялет киби къапуда тура — джанаварджасына джинаетлернинъ етишип кельген муджесемленюви ... о, якъында якъалангъанлар сырасында Чобан-заденинъ досту — Асан Сабри Айвазов да бар.

— Мен азырым! — джуръатлы алып барды озюни Чобан-заде ве шашмалагъан Зураб Константиновичке чевирилип, самимийликле онынъ къалтырагъан къолуны тутты. — Сагъ олунъ, Зураб Константинович...

Къалгъан он дёрт кунъ — эбедиетке бакъкъанда бир шей дегиль...

Григорьянц хымылдады ве якъалангъаннынъ огюнде къапуны ачты.

Чобан-заде босагъадан атлар-атламаз, коридорда беклеген эки милиснинъ къолуна тюшти.

Кениш азбардан енгиль аяз уфюрди.

Чобан-заде, шарфыны тюзетмек ичюн токътады.

Аланчыкъта идманларыны башлагъан эсли маден ишчилери чапкъалай эдилер.

Ич бири адымыны биле тутмады, токътамады, чыкъышкъа, демир къапуларгъа ашыкъкъан погонлы адамлар юрюшине къулакъ асмады.

«Бесе-белли, сабагъа якъын сыджакъ тёшектен чыкъарылгъан мен екяне дегилим», — деп тюшюнди Чобан-заде, ильк дакъкъаларнынъ шашмалавындан къуртулып.

Озюни начар косътермемек ичюн акъсамайып адымламагъа тырышты.

Санаторийнинъ араба къапусы артында, ёл кенарында — автозак, онынъ огюнде – «эмка».

Чобан-задени къапалы автозак ичине итедилер.

Артындан котерильген милис айдавджыгъа:

— Къара шеэрге эмир берильген! — деди.

Сумбатов ве Файтонджы отургъан «эмка» вызнен суръат алды.

– Генерал аркъадаш, авымыз пек яхшы, — чевирди Сумбатовгъа мемнюн бетини къырым векили.

— Агъымызгъа ири къатран балыгъы тюшти...

— Эбет, айтасыз, — Сумбатов Файтонджынынъ омузына достане яндырды.

— Къызыл фуртунада ав онъ олсун, деп, агъны Каспийден сизинъ Къара денъизинъизгедже яйдыкъ, эм де даа узакъ — Аралгъадже создыкъ... зекий, садыкъ капитан Сарымсакъовнен.

Бутюн авны агъгъа тюшюрсек, озыбекни мукафаткъа такъдим этермиз.

Ташкентте миллетчилик маразынынъ ювасыны — Абдулла Къадыри, Чулпан, Фитрат — даа сарсытмадыкъ.

Бойледже, Сарымсакъовнынъ огде иши чокъ...

— Агъзына папиросны алып, дудакъларынен анда-мында чекти.

Янында отургъан Файтонджы, ишмарны анълап, серник якъып, папироскъа узатты.

Сумбатов тютюнни ичине дадлы ве терен чекти, шапылдады, ве сесине ишанчлы аэнк берип, Файтонджыгъа мураджаат этти:

— Сиз арбий дегильсиз де, «къызыл профессор»?

Мен беллесем, семетдешинъизнен тездже анълашырсынъыз.

Биз бильгенимизге коре — якъалангъаннынъ табияты къаттыджа — инат, къоркъу бильмез, Парижде итирам этильгенлер эписи киби, кибир...

Чобан-заде иле чалышкъанынъызда сизинъ миллий зихниетинъизге зияде эмиет беринъ — къырымлар кучлю олгъан ерде оларнынъ зайыфлыгъы сакълана... ана шу зайыфлыгъына басынъыз.

Анджакъ, эбет, эр шей шахсиетке багълы...

Сизинъ устюнлигинъиз даа шунда ки, сиз онынъле бир тильде лакъырды эте билесиз, биз япамагъанымызны япынъ, онынъ джаныны ичтен тышкъа чевирина, ондан эписи къырымтатар эрбапларына, достларына ве зенаатдашларына — языджыларгъа, шаирлерге, алимлерге, Миллий Фиркъанынъ махв этиджи, гъаелери кенарындан тийген, даа башкъа ишлерде лекеленген кимселерге къызыл зынджыр созулыр...

«Акъыллы адам, оджа», — урьметнен тюшюнди Сумбатов акъкъында Файтонджы ве эминликнен:

— Не керек олса, япарым, Бакуда девлет парасыны бедава ашамам, — деди о.

Ибаренинъ сонъки сёзлерини ойле бир садыкъ аэнкнен айтты ки, генерал онъа ишанч дуйды.

II

Чобан-задени тахкъикъатчы одасына итеген незаретчи чыкъып, артындан гъыйчылдынен къапуны къапатты.

Шу гыйчылдыны эшиткен, маса башында раат отурышта ерлешкен сарышын лейтенант Омелия Карпонос башыны котерди, бу кьадыннын кабинетинден кечкен Къара шеэрнин мабюслери оны «кызыл явуз» деп адландыргъанлар.

Чобан-задеге бир козь ташлап, ишмарнен кьаршысына отурмагъа эмир этти ве огюне кягъыт япрагъыны кьойды.

— «Мабюснин анкетасы» анълайышлы язынен, кыскъа ве энъ эсас малюматлар иле толдурыла... — къара лак иле боялангъан тырнакъларына кузгю кетирип, оларгъа бакъмагъа девам этти.

«Даа кьадын сыфатыны джоймагъан», — кельди якъалангъаннын акълына ве о, анкетанын козенеклерини тюзгюн язынен толдурмагъа башлады.

Шу вакъытта «кызыл явуз» телефон чанъларына джевап бере, оданын кьапусыны ачыкъ кьалдырып, кыскъа вакъыткъа чыкып, кьайта эди.

Невбеттеки чыкышында Чобан-заде артындан истемезден бакъты ве о, коридордан юрип, бекленильмеген ерде, куфлю диварлары серс кьокъугъан ве корюнмеген моторнын токътамагъан даушы эшитильген тар аралыкълар лабиринтине бурулгъаныны абайлады.

Бойле кыскъа бир раатлыкъ муддетлернин биринде Чобан-заде пенджереге ынтылды: юксек, арасыз кьора иле кениш азбар, демир арабакъапу, кенарында — къаравул эвчиги ве копек ювасы.

Серслик, ириген кьар иле кьаплангъан азбардан дегиль де, Къара шеэрнин теренлигинден келе эди, чюнки бу дёрт кьатлы, торс бина — янъы вакъытнын талапларына уйдурылгъан, бир вакъытлары исе сюргюнлер ичюн чар тюремеси, топрагъында ермай ирмачыкълары ве ерасты сувлары якъын олгъан ерде кьурулгъан.

Чобан-заде ве онын незаретчиси яры къаранлыкъта, тайгъакъ демир басамакълардан энип ве ертоле коридорларда пенджереве кьапуларгъа ошатылып ясалгъан кыя терассалар бою, не исе тахкыкъатчынын кьапусына келип тирельгендже баягъы долангъан эдилер.

«Мабюснин анкетасы»нда Чобан-заденин кыскъадан омюр басамакълары кьайд этильген эди.

Энъ сонъунда, яшагъан ерини косьтемек керек олгъан козенекте мабюс токътады, коксюнде сыкынты дуйды...

Кисловодсккъа бармаздан, сонъки кунълери перделери къапалы кабинетининъ тынчлыгъында къальбини меланхолия сара тургъан - бойле вакъытлары аяткъа, ишке меракъ дуймайсынъ...

Атта Ругие ханымнынъ ятакъ одасындан эшитильген фортепиано давушы акъайынынъ къальбиндеки аджджыны къалдырмай эди.

Эв саибининъ къулакълары эшитмеге истеген екяне давуш — энди сийрек мусафир олгъан — кабинетнинъ босагъасындан адым аткъанда хырылтылы нефес тарлыгъындан чекишкен Осман Акъчокъракълы таягъынынъ агъыр тыпырдысы эди.

Чобан-заде киби, бир вакъытлары Акъмесджит педагогика институтындан къувулгъан ве Къырымдан кетмеге меджбур этильген Акъчокъракълы Бакуда, къардашы Хатидженинъ эвинде ерлешти.

Бу эв Роза Люксембург сокъагъында ве Кооперативнаядан олса-олса элли адым авлыкъта эди.

Бир кунъ, аман-аман эр кунъ киби, агъыргъан аякъларыны язмакъ истеп, Чобан-задеге бир аякъ кирди.

Субетни башламакъ ичюн аягъынынъ агърысыны алгъан, Хатидже ханым къырым шифалы отлардан озю ясагъан шифалы бальзамны макътады, коклерге котерди...

— Санъа да тевсие этем, Бекир, файдасыны корерсинъ... — эм бир кереден, янъ эсине тюшкен киби, незакетлик иле сорады: — Мен санъа кедер этмедимми?

Чобан-заде, Бакуда къалгъан достларындан екяне къалгъан Осман агъасы кельгенине пек къувангъаныны онъа айта-айта, ишандыргъан сонъ, Акъчокъракълы гуръ къашларыны окюнч иле котерип, оны чекиштирген суальни берген эди:

— Бекир, догъру да шу, чар заманларында, Исмаил Гаспралы иджат эткенде, рус чары йыкътырылгъаннынъ ильк йылларында да, алимлер, «Терджиман»нынъ газетчилери макъалелеринде шимди эр кесни къоркъузгъан «пантюркизм» ёкъ эди?

Шимди исе «сол мейиль», «сагъ къатмер миллетчилик» киби сёзлер...

Не дерсинъ?

Догъру айтам да мен?

Бойле яман ниетли, сахте кѡбаатлавлар, олса-олса он йыл эвель кѡырым институтындаки мен, сен киби оджаларнынъ китаплары, дюнья бакъышларына кѡыймет кесмек акъкъыны озюне алгъан «кѡызыл профессор»ларнынъ тюшюнип тапкъаны да... — девам этти о, агъыргъан тизини окъалап: — Гаспралы акъкъында меним ишим, зайыф хатырам мени алдатмаса, бинъ докъуз юз он сенеси дердж этильди... яш, Гаспралыны самимий севип...

Энди оны, Гаспралынынъ зарарлы апологетикасы, деп адландырып, озюни де шахыс оларакъ, маарифчи оларакъ махв этип, китапханелерден ёкъ эттилер... — ве, невбеттеки, оны эеджанландыргъан суали устюнден тюшюнип, Осман агъа тюсюз козьлерини тавангъа котерди, ельпазенинъ къанатлары айлангъаныны козетти.

Акъчокъракълы, анъаневий суальге озю джевап тапмагъанындан, китап долабы янына барды, яхшы корьмеген козьлеринен девамлы бакъты, бир китапны чыкъарып, саифеледи ве:

— Я мына бу китапны, Бекир, институтнынъ огретюв прогаммасындан чыкъардылар да?!
Не гунях ичюн?

Чобан-заде, диваннынъ кѡолтугъына кѡолунен таянып, отурды, башыны тебен алды.

— Сен халкъымызнынъ акъикъий шаирлерининъ адларыны — Номан Челебиджиханнынъ...

Амди Гирайбайнынъ анъгъанынъ, шимдики акимиетке хызмет эткен, къараманларыны янъы тертипке уйгъунлаштыргъанларны дегиль! — Ве апансыздан, къарт, дирильдевик сеснен айтты: "Кѡол котерип татар, татар, дегенде"

"Татар къаны сынъырларгъа кельгенде, мен дюньягъа бир джумурдыкъ урарман,
Душманымнынъ таджын, тахтын кырарман.
Татар ичюн дерьяларны тыярман,
Бир иненинъ тешигине сыярман"...

Чобан-заде мусафирининъ алына кирип, онынъ сеси аэнкине уйып, онынъ иле экевлешип:

— Татар ичюн инджерермен, азарман,

Татар сёзин башташыма язарман.

Заманнынъ чезильмез меселелери юкюнден кедерленген Акъчокъракълы кеткен сонъ Чобан-задени кене лякъайтсызлыкъ сарды — оны омюрнинъ сыджакъ къучагъында туткъан эр шей кечмишке дёнди, огде — кёю думанда — бельгисизлик беклей эди...

Онынъ бу алындан теляшлангъан Ругие ханым, онъа омюрге меракъны къайтармакъ макъсадынен, парккъа, денъиз ялысына, театрге темашалы спектакллерге чагъыра эди. Итибарлы танышларындан акъайы ичюн санаторийге ёлланма алып олды, о тедавийленип, тендюрист ве сагъламлашып къайтыр белледи...

Акъайыны Кисловодсккъа кеткен автобускъа отуртып, акъшам, спектакльге бармаздан Хатиджеге кирип чыкъты ве дешетли хаберни эшитти: агъасы Османны якъалагъанлар ве ич бир тюрю анълатувлар бермейип, кери, Къырымгъа алып кеткенлер...

III

Биревнинъ телефон чанъына кабинеттен мемнюн чырайынен кеткен Карпонос, сытыкъ чырайынен, бир шейден къасеветленип къайтты.

— Отурынъ!

Битирдинъизми? — огюне «Анкета»нынъ толдурылгъан япрагъыны чекип алды. — Бир шейни гизлемединъизми? — языларны козьден кечиргенде, мутехассыс бакъышы иле къайд этти: «язысы тюзгюн, синъирли дегиль, озюни кёлда тутмагъа беджере — къавий ирадели демек... Къыraryкъ»...

— Демек, «Анкета» толдурылгъан кунъ: Бинъ докъуз юз отуз секизинджи сенеси экинджи февраль... догъулгъан ери Къарасувбазар, Аргъын кою, яшы - къыркъ учъ, къырымтатар, эвли, — окъуй эди тахкъикъатчы сесини юксельтмейип, санки Чобан-заденинъ омрюни агъыр ювакънен тегизлеп кечти.

— Мусульман хайрие джемааты тарафындан Истанбулгъа окъумагъа ёлланды. — Онынъ сеси тюзгюн ве джан сыкъыджы эди.

— Бинъ докъуз юз он дёрт сенеси тюрк лицейини ве бунен берабер Истанбул университети янындаки арап ве френк тиллерини огреткен учъ йыллыкъ курсларны, бу тиллерни мектеплерде ве лицейлерде дерс бермек акъкъынен ёкюнледи.

Башыны котерип, папироскъа серник кетиргенде, мабюске козь ташлады, тютюнни ичине терен чекип, хырылдап оксюрмеге башлады.

Бутюн бу вакъыт Чобан-заде козюни алмай, онынъ эр бир сёзю, эр бир ишмарыны козетип турды ве лехджесинден, денъишмелер ели оны Бакугъа къайсы бир улькеден — Тамбов я да Воронежнинъ коюнден кетиргенини бельгилемеге тырышты...

— Демек, бинъ докъуз юз он дёрт сенесининъ сонъу...

Бизде не бар? — Тахкъыкъатчы сусып отурды, тюшюнджеге далды ве «Анкета»да бир шейни къайд этти: — Бекир Ваапович Чобан-заде бундан сонъ ненен мешгъуль олды?

Будапешт университетининъ тарихий-филология факультетинде окъуй...

Дёрт йылдан сонъ оны битире... — Тахкъыкъатчы «Анкета»да невбеттеки къайдны япты, бир шейден шубеленип, тюшюнджеге далды:

— Йигирми сенеси кене шу университетте диссертация къорчалады, — токътады ве эджалап окъумагъа башлады: — «Кодекс Куманикус»та сингармоник уйгъунсызлыкъ киби корюнген аллар ве тюрк тиллеринде артикуляция базасы меселелери” тюркшынаслыкъ боюнджа филология докторы унваны, ильмий ребери академик Игнац Гольдцигер, — кученип окъугъанындан кызаргъан козьлерини метинден алды ве хошнутсыз сеснен:

— Бу тарифлемелер де неге керек?!

Игнац ве башкъа шейлер?

Анълайым, филолог ве шаир оларакъ чокъ сёзлер къулланмагъа арекет этесиз - сизге юзь берсенъ — кечмиш ве Къара шеэрде кечеджек яшайышынъыз акъкъында дестан язарсынъыз. — Кулюмсиреди ве «Къызыл фуртуна» иши» адлы джюзданны ачып, ичинде къарандашнен нелердир къайд этти: — Тюрк тилини Будапештнинъ Шаркъ Академиясында окъуттынъыз, бойле, Академия киби эмиетсиз шейни къайд эттинъиз, лякин, не ичюндир, джиан

дженкинде австриялы маджарларнынъ тарафында олгъанынъызны гизлединъиз, — ве серт сеснен, Чобан-задени тахкъикъат ичюн муим бир делиль гизлегенинде туткъандай: — Дженкте иштирак эткенинъизни язып кирсетинъ.

Ондан сонъ — насыл тиллерни билесиз?

Козенегинде окъуймыз: немсе, тюрк, маджар, френк, арап, рус...

Совет Шаркънынъ эсас тиллери — озьбек, къазах, туркмен...

Эрмени тилини огренем, — Карпонос козьлерини «Анкета»дан бир аныге алды, Чобан-задеге ифадели бакъты: эрмени тили де даа неге керек?

Эндиден сонъ етиштиреджек экенми? - дегендай, кулюмсиреди. — Бугунъки кунъге зенаат боюнджа ильмий ишлернинъ умумий микъдары эки юзге якъын...

Олар арасында «Кодекс Куманикус»та сингармоник уйгъунсызлыкъ киби корюнген аллар", Будапешт, бинъ докъуз юз йигирми, «Къырымтатар тилининъ ильмий сарфы деневи», Акъмесджит, бинъ докъуз юз йигирми дёрт, «Тюрк тили ве эдебияты усулиети», эки томда, Баку, бинъ докъуз юз йигирми единджи... — Ве муреккеп серлевалардан болдуруп, окъувыны сессиз, тосат-тосат тек айры арифлерни айтаракъ: бу-бу, эбет-эбет, мына-мына, я? — окъумакъны девам этти, сонъ кене сесли окъумагъа башлады: — Рус, тюрк, озьбек, къырымтатар, маджар тиллеринде дердж этильген...

Мабюс акъкъында бу къадар чокъ малюматны алдырамайып, Карпонос апансыздан башыны къолларынен къапкъачлады, «Анкета» устюнден къыбырдамайып, эгилип отурды.

Бакъмайып, масада «Казбек» къутусыны къолунен тапты, якъмайып, пармакълары арасында папиросны эзгеледи.

Тахкъикъатчы вазифесинде секиз йыл чалышып, онъа чешит мабюслер расткельген эди — биревлери зарар кетиргенлеринде къабаатлангъан, дигерлери джинает акъкъында чакъмагъанлары ве дигер гуняхлар ичюн джинаий кодексте «сиясий» маддесине уйгъан тек бир дане бар эди.

О, геджелернен къораларда ве газет тюкянларынынъ джамларында чешит сыфатта гуръ мыйыкъларны сыза тургъан — сытыкъ чырай, ири бурун, инже дудакълар улени сыкъып тура ве тютюнден сараргъан мыйыкълар...

Карпоноснынъ хызметдешлери чыкъарылгъан фотоларны чешит шекиллерде Иосиф Виссарионовичнинъ суретлерине къойып бакътылар — эм гедже, невбеттеки ресим сызылгъанда, авескяр рессамны тутып, якъаладылар.

Чобан-задеге кельгенде исе, ильк сефер тахкыкъатчынынъ мийи китаплар ве умумий микъдары юз он докъуз том олгъан ишлернинъ джедвелини, мабюс бильген тиллернинъ чокълугъы иле Бабилон къуллесини йыкъмакъ чареси олгъаныны, четэль адлар ве шеэрлернинъ алышылмагъан номайлыгъыны къабул эталмай эди...

Апансыздан болдурув сыкъып кельген башы патлайджакъ киби олды.

Къоллары эски баш агърысындан липильдеп ургъан чекелерине озю узанды, башында исе санки мийнинъ эки ярысы айырылгъандай дуйгъу бар эди, - тамам Карпонос чекистлер мектебинде имтианладан эвель огренген «кипит наш разум возмущеный» тюркюсине ошады.

Къолу «Анкета»ны озю тапып, козю огюне кетирди ве устюне «Тройка»гъа.

Литер-А.

— Бугунъге — етер! — кирген незаретчиге кягъытны узаты: — Имза кьоюнъыз — мен тапшырдым, сиз — къабул эттинъиз. Къолдан къолгъа.

IV

Сычан тюсте мундир кийген алчакъбойлу, тыгъыз незаретчи чызмаларынен такъырдап, Чобан-задени алып кеткен бургъучлы мердивен Къара шеэрнинъ дёрт къатындан сармал шеклинде сарып ала.

Бир вакъытлары ермай къуллеси котерильген ерден къавий туттурылгъан пармакълыкълы арабакъапудан тар кечит бар эди.

Мабюслернинъ камераларындаки демир кемерлер чокълугъындан Чобан-заденинъ козьлери джырыкълана, оны козь иле озгъарып, нараларда яткъанларнынъ тек къаралтыларыны коре эди.

Незаретчи баягъы вакъыт, эринген киби, багъламдаки анахтарларны сайлады, сонъ демир къапугъа басты — яры къаранлыкъта пармакълыкълы пенджереге тирельген тар аралар иле эки къатлы наралар манзарасы ачылды.

Незаретчи джедвельге бакъты:

— Мабюс Чобан-заде — он дёртюджи ер.

Он дёртјонджи — ашагыдаки нараларда — кьатты, тер ве тютюн сасыгъан миндер.

Козьлери зайыф ярыккъа алышкъанынен Чобан-заде оданынъ манзарысына талгъын бакъты — маса, сув иле чапчачыкъ, кенефни айыргъан фанер дивар.

Юкъарыдаки кьатта отургъан кьомшусы янъы кельгенни къыркъылгъан башындан аягынадже козетти, агъаргъан тюрьме урбасындаки 715 номерасына дикъкъат этти ве тасдикълады:

— Литер А...

Чобан-заде бирден башыны къакъты, бу худжур сёзлерни о тахкъыкъатчынынъ кабинетинде, о биревнен телефондан лаф эткенде эшиткен эди.

— Сиясий мабюс, — саде, эр кимге белли шей киби, ачты тахкъыкъатчынынъ сырыны кьомшусы. — Бизде мында литер А хусусий кьорчалав астында...

Агъалар тиймезлер...

Хоразлар тийип башласалар исе, котлерине яндырарлар...

Анджакъ паханлар ерине соргъуларда тахкъыкъатчылар гъайрет иле чалыша... керекли къабаат танылмасына иришмек ичюн ичеклерни къарыш-къарыш созып чыкъарырлар...

Ана шай...

Мен олар иле кьонушмакъта буюк теджрибе саиби олам. — Ве апансыздан фысылдамагъа башлады: — Мени башта литер А боюнджа къабаатлайджакъ олдылар, санки мен Мангъышлакътаки ермай къазмаларында диверсия япаджакъ экеним.

Эр кунъ обир дюньягъа кетмеге азырладылар...

Мен де пенджереден бакъып, озюмни анда, энъсемде окъ иле яткъанымны тасавур эте башладым...

Лякин, насыл бильмем, араларына Москвадан кельген якъарлыкъ къарышмалар боюнджа мутехассыс тюшкен... меним ишимни бакъкъанда, янгъын олгъан ерден фотоны, ресимлерни дикъкъатнен огренип, мени къуртарыджы мелегим нетидже чыкъаргъан: кьулледе янгъын заводнынъ къайнакъ кьусурындан башлангъан...

Ишимни литер Б-ге денъиштирдилер — он экиден он бешкедже.

Мен исе бу куньлерде — аначыгъым! — алтмышны толдураджем. — хымылдады: — Нефакъагъа чыкъмакъ вакъты кельди...

Чобан-заде, келишкен ятышны тапамай, бир янындан дигер янына чевириле берип, оны яхшы эшитмей, къомшу нараларда яткъанларынынъ шамата ве шытырдысындан сеси узакътан кельген киби эди.

Биревлери, пирени басмакъ ичюн, миндерини шамарлай, кимдир анълашылмагъан бир шейлер сомурдана, къарыкъ давушнен оксюре эди.

Тёпедеки къаттан къомшусы исе бойнуны ашагъы созып, Чобан-задеден лаф арай, бесе-белли онъа ишанч дуя, я да къальбинде олгъан къасеветлерден, оны къыйнагъан тахминлерден къуртулмакъ ичюн лаф эте берди:

— Пенджере янында турсанъ, сыкъ-сыкъ азбардан кельген атыш давушларыны эшитмек мумкюн.

Бизни бу къатта къапагъанлары ичюн — бизге алий джеза чыкъарылмаз... ойле олур: тройка, тахкъикъат ишинен таныш олгъан сонъ, меним ишим киби, сизинъ ишинъиз де къарарнен он беш йылгъа чеккени акъкъында нетидже чыкъарыр, анджакъ, бу аныкъ дегиль...

Чобан-заде оны аман-аман эшитмей эди, онынъ дикъкъаты зайыфлашты, о, озъ адетине уйып, миндерге сагъ янагъынен басылды, чеккен къарсанбалардан къызышкъан къальбинден сыджакъ вуджудына авушты, эр бир уджейресини, эр синъирини бошаштырды...

Эм эр заман олгъаны киби, юкъугъа кеткенде талгъын мийи шу куню яшагъан теэссуратлардан чешит худжур, фантастик левхалар яратмагъа башлады.

Къалабалыкъ левхалар-тюшлер арасында, кескинлешкен насылдыр едиджи дуйгъу иле Чобан-заде камера ичинде наралар арасында, о якъалангъан танъда, санаторий палатасынынъ къапусы ачылгъанда, апансыздан пейда олгъан анавы къаралты олгъаныны сизди, зорнен танылгъан сымасындан, къалпакълы башынынъ колеткеси, къаранлыкъта йылтырагъан бакъыштан...

«Эбет, бу одыр... насыл эди?

Насыл эди шу?

Файтонджы Сервер...» — хатырламады, сизди о.

Чобан-заде козьлерини ачты ве теляшлы юрек урувы тюшни кьувгъаныны дуйды, отурды, топракъ тёшемеге табанларынен тийди.

Юкъарыда яткъан кьомшусы, юкъусызлыкътан чекишип, мындаки Къара шеэр, адлие акъкъында, кене озь къарыкъ сесинен тариф этмеге девам эте эди - анълатувларына кунь джедвелини кьошты: мабюслерни чалышмагъа меджбур этмейлер, кезинмеге чыкъармайлар, ашаладжакъ боткъаны наралар янында ерлештирилъген масачыкъларгъа кетирип бошаталар...

Машиналь тарзда, керек олмаса да, Чобан-заде кьолунен агъач таянгъычларны кьыдырып, ятакънынъ къайсы тарафындан шу ачылгъан аш масачыгъы ерлештирилъгенини анъламагъа тырышты...

Апансыздан, ич бир алякъасыз, Севиль деген адны хатырлады...

Севиль ве Сервер...

Сонъ фикيري болюнди...

V

Ачылгъан къапунынъ демир гъыйчылдысында Чобан-задеге юкъу серсеминден окоп устюнден учкъан топнынъ гурюльтиси эшитильди...

Онынъ бедени окопнынъ кенарлары эшилип, оны топракъ иле къаплагъаны киби дуйгъу пейда олды...

Анда, маджар джебесинде санитар олгъан студентнинъ кьолуны тесадуфий окъ якъып алгъан эди.

Шимди исе, чокъ йыллар кечкен сонъ бу яра, Чобан-заде эгилип, аякъларыны ерге тийдиргенде, кескин агърынен омузыны сыкъып хатырлатты.

— Еди юз он бешинджи — Чыкъышкъа! — незаретчининъ янъгъыравукъ давушы, аписте ильк геджеси пейда олгъан дуйгъулар къалабалыгъында апансыздан хатрысына тюшкен окоп иле левханы кьувды.

Агъач наралар гъыйчылдады, санки бир ятакътан дигер ятакъкъа, сафкъа тизильгенлернинъ ёкъламасыны анъдырып, хошнутсыз юкъудан серсемлеген сеслерни тыгъырлатты...

Чобан-заде агъыр юкъудан айынып оламай, кок леке киби корюнген пенджерере таба чевирилъгенини корип, юкъарыдаки кьомшусы онынъ омузына токъунды:

— Бу сизни, профессор, соргъугъа... — Ве онынъ сёзлерине уйгъан киби, незаретчи сабырсызлыкънен анахтарлар багъламыны шатырдатты, ашыкъынъыз, деменге истеди.

Чобан-заде, бу сефер озюни Карпонос иле насыл алып бараджагъыны тюшюнип, ашыкъмайып, тюрьме урбасыны кийди ве къапудан чыкъты.

Кене шу, оны шей киби къолдан къолгъа Карпонос теслим эткен, тавшандудакъ незаретчи Чобан-задени бургъулы мердивенден тёпеге, тахкъыкъат одасына дегиль де, тар коридор бою тюрьме азбарына чыкъкъан къапугъа алып барды.

Ачыкъ демир къапудан якъыджы сувукъ урып, Чобан-заденинъ бетини тазертти ве юкъусыны тамамиле айындырды.

Чобан-заде зорланып бакъты ве азбарнынъ ичинде онъа тараф, агъзындаки тютеген папироснынъ атешчиги иле озгъарылгъан, къыскъа пальтогъа сарылгъан къалпакълы къаралты якъынлашкъаныны коръди.

«Файтонджы» — ич де тааджиппленмеди Чобан-заде, санки Къырымдан кельген иле корюшеджегини эвельден биле, бу корюшювге азырлана эди.

— Селям алейкум, къардаш, — эшитти о янына кельгеннинъ агъзындан, адам ушюген къолларыны пальтосы джеплеринден чыкъарып, Чобан-задени къучакъламагъа истеди.

Чобан-заде истемеден бир адым кери чекильди, бу сеснинъ аэнки оны хатырлавлар далгъасынен къаплады, Къарасувбазарнынъ дженюбине таба ачылгъан чёльнинъ къокъусы иле якъты.

— Бекир... халкъымызда айталар: «Акъшам къаранлыгъы тюшкен сонъ, шейтанлар пенджеренъден бакъмасын деп, перделерни къапатмакъ керек» — деди Сервер, азбаргъа чыкъкъан пенджерелерге дикъкъатнен бакъып.

«Борюни анъсанъ, таягъынъны азыр тут», — тюшюнди Чобан-заде, Файтонджынынъ бетинден козьлерини алмайып.

Саба ярыгъы ашагъы, азбарнынъ энъ къаранлыкъ кошелерине эп эне, муляим кулюмсиреген Сервернинъ юзюни ярыкълата эди.

— Тааджипплендинъми?

Хызмет ишлерим мени Бакугъа кетирди...

Сен къайда олгъанынъны эшиткенимден сонъ Къара шеэрге ашыкътым... — тырышты лаф ачмагъа Файтонджы. — Севиль санъа селям айтты, эбет, бойле ерде бу акъта айтмакъ ерли дегиль.

Ве, субетдешининъ тирсегине токъунып, Файтонджы азбар бою айланып чыкъмагъа теклиф этти.

Лякин Чобан-заде инатлыкъле еринде туруп, кескин сувукътан къорчаланмакъ истегендай, къолларыны къапкъачлады.

— Бу урба — сабадаки кезинтилер ичюн дегиль... — Файтонджы онынъ тарафына къолуны узатты: — Огге, арекет къыздыра.

Э-ээ, яшлыкъ, — апансыздан денъиштирди о мевзуны. — Бизге рушдиедеки къызлар иле бираз шакъалашмагъа рухсет берильгенде, акълымда, меним Севилим ве Къыпчакълар задекян сулялесинден олгъан Дияра, дуйдурмаздан, озъара сенинъ дикъкъатынъ ичюн куреше эдилер.

Такъдирнинъ эмринен, эр шей къарышты — Севиль меним омюр аркъдашым олды, Дияра исе, мен бильгениме коре...

Апансыздан, инатлыкъ косътерип, бир ерде къыбырдамайып тургъан Чобан-заденинъ акълына фикир кельди: Файтонджы дегильми экен, Осман Акъчокъракълыны якъалап, эллерини къырчмалап, Къырымгъа, «тройка»нынъ махкемесине алып кеткен?

Энди исе оны, Чобан-задени алмагъа кельдими?..

Чобан-заденинъ ильк дакъкъаларындан туткъан торс сускъунлыгъыны Файтонджы мабюснинъ шашкъынлыгъы ве рухий тюшкюнлиги оларакъ къабул этти.

Эм де Чобан-заде онъа махсус, араларында дагъларнен ташлар олгъаныны косътермек ичюн, «сиз», деп лаф этмеге башлагъанда, баягъы юрекленди:

— Бу сизинъ Бакугъа экинджи келишинъизми? — субетдешининъ юзюне дикъкъатнен бакъып, сорады Чобан-заде.

— Ёкъ, ёкъ!

Биринджиси.

Инанасынъмы, Къара шеэр насыл сокъакъта ерлешкенини биле сорамадым.

Бир якъкъа чыкъмайып, чалышам, атта раатланмагъа ве юкъламагъа тахкъыкът одасында керек ола, — ашыкъты озюни акъламагъа Сервер.

Ашыкъчанлыкънен папирос къутусыны ачты ве субетдешине узатты:

— Буюр, профессор... халкъымыз бедава айтмагъан: генчлик достлары чёльде атеш якъкъанда, бутюн неджис янып кете... Бизим тюръмени якъмакъ ниетимиз ёкъ, онынъ ичюн тютюн иле эгленейик.

— Ичмейим, — деди Чобан-заде ушюген дудакъларыны зорнен ачып ве бутюн бу сонъки афта бою Зураб Константиновичнинъ тевсиеси иле тютюн ичмектен вазгечип, чекишкенини хатырлады.

Лякин бираздан къолу озю ачыкъ къутугъа узанды.

Файтонджы серникни чертти, атешчикни элинен къапатты, ве, бинанынъ пенджерелерине теляшнен бакъып, сыртыны чевирди.

Чобан-заде папиросны якъкъанда озю ичине тютюнни терен чекти.

Субетдешинден бир баш алчакъ олгъан Сервер бойнуны узатып, Чобан-заденинъ къулагъына:

— Шаир айткъандай: «Ватан тютюни бизчюн татлы ве хоштыр...», — деди достане тавырнен.

— Сен, Бекир, Къырымдан кетмеге меджбур этильгенинъден берли, сенинъ шириетте, ильмий фаалиетинъдеки мувафакъиетлеринъни козетип турдым ве джан-юректен ташкъын тендюристлигинъ, кавказ аулларына сыкъ-сыкъ зияретлеринъе, ильмий алемдеки шубесиз итибарынъа къувана эдим...

Эбет, башкъаджа олур эдими?!

Балалыкъ достум, мен киби чёллю чобан, берабер Къарасувбазар рушдиесинде окъудыкъ... озь эмегинъ ве акъылынънен, аркъанъ олмайып, дюньяджа белли севиеге чыкътынъ, — Сервер, айретины ифаде этмек ичюн, сесини де юксельте, де фысылдагъандже сакинлештире эди: — Эр шейни хатырлайым...

О! О кунни хатырламакъ эм къуванч багъышлай, эм агъыр ола, отуз йыл эвельси...

О заман чѣльде, къойларны отлаткъанда, йигитлигимни косътереджек олып, кийик, даа эгерге алыштырылмагъан айгъыргъа мингеним...

О! Аргъымакъ мени ташларгъа йыкътырды, туягъынен башымны ярды.

Омюрлик унутмам: Къарасувбазардаки хастаханенинъ экими: Аллагъа шукюр этинъ: эки кунъ сизни аркъасына алып кетирген эшинъиз — Бекир олмагъан олса, къан къокъусы къашкъырлар сюрюсини джелъп этер эди.

Эбет! — Агъыр-агъыр кокюс кечирди Файтонджы, семиз, шишкен бетинде агъры акс эттирмеге тырышып.

Бу арекеттен онынъ дудакълары боручыкъ киби узандылар.

Апансыздан серт ве джиддий сѣз къатты: — Энди исе, вакъыт джоймайып, ишинъе кечейик.

Бу сонъки кунълери, гедже-кунъдюз ишинъни огренип отурдым.

— Керекли сѣзлерни араштырып, бир саниеге сусты, сонъ азбарнынъ япышкъакъ сазындан ашыкъып адымлады.

Чобан-заде сескенди.

Оджалары институттан къувулгъандан сонъ, Къырымгъа къайтмагъа меджбур олгъан студентлер бири-биринден теляшлы хаберлер иле эеджанландыра тургъанлар: ерли НКВД «тройка»сында озъ якъалангъан ватандашларына даир энъ залым мунасебетте фиркъа кятиби олып янъы тайинленген «къызыл профессор» дипломы иле Москвадан къайткъан ве карьерасында юкъары котерильмеге пек истеген Сервер Файтонджы...

Субетдешининъ талапчан: — Мен айткъанларым арамызда къалыр, деген умюттем, — сѣзлери Чобан-заденинъ фикирлерини больди.

— Ич олмадым, азатлыкъкъа чыкъкъан кунюнъедже, — къошты Сервер: — Эм тааджиplenме, инан, сенде шанс бар, биз берабер Къырымгъа къайтып, догъмуш Къарасувбазарымызда адлиенинъ адалетлиги шерефине зияфет берирмиз...

Лякин Къара шеэрнинъ торс зинданларындан бу бахтлы азатланув саатынадже арамызда, яшлыгъымыздаки киби ишанч олмалы, тахкъикъатчы — мабюс багъламында эки тарафлама гъайрет керек, эбет, «багълам» сѣзю, бельки де, джеллят ве къурбан арасындаки мунасебетлер ичюн

келишмей, эгер институтта менимсельген рома укьукьына эсасланаджакь олсакь.

Лякин мен мында бу рольни ойнамакь ичюн кельмедим...

Ёкь!

Ёкь! — нуткьуны уйгьун ве кьандырыджы башлап, Файтонджы апансыздан кьарышып кьалды, санки онынъ тили акьыкьятны яландан айырып оламай эди...

— Ана шу даа, — деди Чобан-заде, анджакь Сервер о, не мана ойле айтканыны анъламады.

О, джеп саатына, корюшювге айырылгьан вакьытны бельгилеген киби, бакьты: — Вакьытны джоймайып, сенинъ тахкьыкьят ишинъе якьынджа...

Мен Кьырымдан Акьмесджитте бакьылгьан ишлернен Бакугьа чагьырылдым, оларны учьтен: НКВД — мындаки, бакьулы, озьбек ве кьырымдакини бир екяне «Кьызыл фуртуна» иши» ады берильген екяне ишке кьошмакь ичюн... бизим «тройка»ларгьа бойле ишлемек енгильдже олур, чюнки айны шахыслар: троцкист олсун, партюркист олсун, миллифиркьаджы олсун, душман тарафына джелъп этильген джасус-диверсант олсун — эписи бир тахкьыкьяттан дигерине кечелер...

Огьумде бунынъ джанлы ибрети тура — сен, Бекир.

Сенинъ, джинаий кодекснинъ маделерине уйгьан арекетлеринъни, деерли, ватанда, Кьырымда, я да Озьбекистанда чалышкьан йылларынъны, я да мында, Бакудакилерни, эм де даа кениш алсакь — Тюркиеде, Будапештте окьугьан вакьтынъ... дейджегим, бугуньки сенинъ окюнчли такьдиринъ сени тахкьыкьят астында булунгьан чокь такьдирлер иле багьлады, мисаль, эки озьбек-аспирант, не эди шу — Гулям-заде ве Абу Сайид Ходжаев - мантикьлымы?

Мантикьлы! — озь-озю иле разы олып, кьырым векили девам этти: — Ишан мангьа, мен, кабинетте кьапанып, бир кьач кунь ве гедже, юкьламайып, сенинъ ишинъ олгьан джюзданны огренгенимде, сенинъки иле бир сырада, ишинъе кьошулгьан дигер ишлерни саифелер экеним... козюм огюнде апансыздан бизим чёлюмиз джанланды: кьой сюрюлери, рушдие — тамам Номан Челебининъ «Кьарылгьачлар дуасы» икьесинде тарифленгени киби.

Акьлыма: «Ёкь, Бекир Чобан-заденинъ душманлары гьалебени эрте кьайд этелер, бу сен акькьында дегиль ки: Дженазе намазы вакьтында джемааттан рахметлининъ ал-и хаяты ве кемал-ы сиххаты», — деген фикир кельди...

Эрте, пек эрте, халкъымызнынъ дегери адландырылгъан инсаннынъ дженазесини къылмакъ, дедим.

Чокъсу къарасувбазарлылар буны даа анъламасалар да, Бекир Чобан-заденинъ ады якъын келеджекте Исмаил Гаспралы, Номан Челебиджихан янында олып, бу учъ киши бутюн дюнъягъа белли оладжакъ, анджакъ бугунъде бизим талелелеримизге — Гаспралы ве Челеби джеалетперест ве иблисининъ хызметчилери, деген фикир синъдириле.

Серс азбар бою айланып юргенинден Чобан-заденинъ аягъы агъырмагъа башлады ве онынъ акълына истиза кирди: «Аджеба, Файтонджы мени арыкъ ат екильген файтонда бу азбар ичинде юргюзген олса, къач кере оны айланып чыкъар эдик?»

Файтонджы яваш ве ишанчлы нуткъуны девам этип, баракларнынъ пенджерелерине тосат-тосат бакъа, оларда бири-бири артындан ярыкъ илиштириле эди.

— Гедже явашчыкътан сенинъ он еди томлыкъ ишинъ олгъан сейфни ача тургъаным.

Сенинъ акъкъында, яш чагъынъдан башлап, февральде апис этильгенинъе къадар эр шей тантиминен язылгъаныны, юрегим сызлагъандже, козьлерим яшлангъандже окъуй эдим. Эр саифеси козюм огюнде джанланды — сен йигирми йыл эвель омрюмден гъайып олдынъ да — бойле этип, Алла ойле аджайип назм истидаты ве ойле ираде берген семетдешимнинъ, сенинъ такъдиринънинъ умумий корюниши пейда олды.

Чобан-заде, гедже аязыны топлагъан, кунешнинъ зайыф шавлелери иле ярыкъландырылмагъан азбарнынъ таш къутусы ичинде ушюгенини сезерек, Сервернинъ къальп тѣкюнмелерине дикъкъат айырмады.

Апансыздан эшиткенлерини шакъагъа чевирди:

— Къулакъларым чынълай, мени бири анъа...

Файтонджы Чобан-заде айткъаныны эшитмегендай, исрарлыкънен девам этти:

— Ишинънинъ он еди томында — тек нелер ёкъ, эр шей — яланлар, сени кунълеген зенаатдашларынынъ чакъувлары... сени джелляткъа бермек ичюн... эр шей бир обагъа сюрюльген... атта сенинъ сабыкъ къарынъ, задекан

Къыпчакълар кърорантасындан олгъан Диляранынь шикъетлери...

Тек ташлангъан къадын яш союны — Ругие Абдулинаны кунълеп, бу къадар кир тѣке билир... — Сервер апансыздан хымылдады, — бундан мен де кечтим, Севиль иле айырылышкъанда.

Коресинъми, бизим романтик генчлик севгимизни маишет бозды... — сонъ кърошты: — озъ къроранта фаджиамны санъа башкъа шараит олгъанда икяе этерим... — ве, Чобан-заденинь он еди томында окъугъаны акъкъында фикирлерини девам этти: — Диляра сен насыл барбар олгъанынъны, озюнъни гуманист-шаир косьтерип, Къырымда ачлыкъ ат ойнаткъан девирде Мустафа огълунъны ташлагъанынъны тасвирлей.

Ташлангъан апайнынъ бутюн бу сафсаталары иш томларында «Енъи дюнья», «Яш кърует» газетлериндеки, «Большевик ёлу» меджмуасындаки ве мындаки, ерли «Баку ишчиси» газеттеки фитнелер иле кърарыштырылгъан — миллетчиликте, пантюркизмде къабаатлавлар сачма шекильни алалар.

Сен атта Лев Троцкий иле ишбирлик япкъан экенсинъ...

— Эбет, сачма, — сыкъты омузларыны Чобан-заде, насылдыр джевап бермек ниетинен.

Файтонджы ашыкъчанлыкънен сааткъа бакъты:

— Ярым сааттан, тамам секизде тахкъыкът одасында олмакъ кереким.

Кунни «тройка» авалелерден башлай: Къара шеърден кимни махкемеге чагъырмакъ ве джезасыны илян этмек.

Бу акълы махкеме ярым сааттан зияде девам этмей.

Эм кимни — Сумбатовнынъ тилинде — ярын кършунгъа тизмек... — ачылгъан къапу гыйчылдысыны эшитип, апансыздан сусты.

Чобан-задени сувукъ азбаргъа чыкъаргъан тавшан дудакълы незаретчи маналы башыны къакъты.

— Олды!

Мемед бизге корюшюв ичюн айыргъан вакъыт бите, — ве, даа эки дакъкъа дегендай, незаретчиге эки пармагъыны косьтерди.

— Ифтира акъымы иле протоколларны окъугъанымда козюм огюнде сен иле дост олгъан вакътымыз джанланды, сен о

заман къавий ирадели, сарсылмаз, акъикъат ве адалет ичюн сонъунадже турмагъа азыр инсан эдинъ.

Атта «Баку ишчиси» газетинде сенинъ тѣвбе мектюбинъни окъур экеним, Файтонджы джебинден экиге букюльген газетни чыкъарды. — Бинъ докъуз юз йигирми докъуз сенеси он сентябрьдеки саны «Къызыл къырым» газетинде, сени буржуа миллетчиси, деп акъаретлеген Ружнынъ ифтирасына джевап... сен онда яшайышынънынъ белли бир вакътында къырымтатар буржуазиясы ве миллетчи зиялыларынынъ тесирине тюшкенинъни биле таныйсынъ.

Мен бу ачыкъламаларынъа ич де инанмадым: къабаатны озюнъ устюнъе алып, Бекир Миллий Фиркъадаки озь достларындан беляны аткъармакъ истей, деп тюшюндим.

Чобан-заде бирден адымларыны явашлатты, ильк сефер чевирилип, Файтонджы иле юзьме-юзь туруп, козьлерине кескинликле бакъты.

— Шу сенеси сиз Къырымгъа къызыл профессор дипломы иле энди къайткъан эдинъиз ве Миллий фиркъанынъ ёлбашчысы эм де Къурултай башы олгъан саф юрекли инсан — Сеит-Джелил Хаттатовнынъ башына не къадар ифтира ягъдырылгъаныны бильмек борджлу эдинъиз.

Онынъ гъайретинен бизим халкъ Къырымда ачлыкътан бутюнлей къырылмасындан къуртулды. — Чобан-задени оксюрик тутты, санки о гъадабындан богъулмагъа башлады.

— Я аджайип шаир, ялынъыз Къарасувбазарнынъ дегиль, бутюн окъугъан Къырымнынъ гъуруры олгъан, шириетнинъ устасы ве янъылыкъчысы — Амди Гирайбайнынъ олюмине кетирген ашшаа ифтиралар?

— Ве окюнч иле башыны саллап, яваш айтты: — Эбет, меним бойле истегим бар эди — садедиль, пишкинлешмеген — олар ве дигер бизим ватанперверлер этрафында котерильген шаматаны озю устюме чевирме....

— Догъмуш Аргъындаки чобан баласыны таныйым — романтик, адалет рыцари.

- Чобан-заде субетдешининъ сесинде енгиль истиза эшитерек, девам этти: — Киббарлыкъ япып: меним Авропада, Москвада, Асиеде олгъан итибарым бир тѣвбе мектюбинден зарар коръмез, деп белледим, илимэтраф даиреде бироз ошек къайнатыр да, унутырлар.

Демир кѡапунынъ жанъгъырдысы эшитилип, артындан незаретчининъ кейфсиз юзю корюнгенде, Файтонджы онъа таба чевирильди ве ашыкъып, сагълыкълашмакъ ерине:

— Сѣз сырасы, Сеит-Джелил Хаттатов шимди Къырымда тахкъикъат астында булуна.

Тазе авада кезинтимизни исе эки кунъден сонъ девам этерик, незаретчи Мемед Айлислининъ невбетчилиги куню.

VI

Хаста аягъыны айланчыкъ мердивенге незаретчиден бираз эвель басып, Чобан-заде агъыр, нефеси-нефесине етмей, бир къач къаткъа котерильди.

«Мемед Айлисли... Файтонджы башлагъан оюнда о насыл роль ойнай экен?

Эр бир ара-тешикте бинъ дикъкъатлы козь ве къулакъ олгъан Къара шеэрде незаретчи тахкъикъатчы иле анълаша, онынъ ишмарынен азбаргъа кѡапуны ача эм анда мабюс ве тахкъикъатчыдан гъайры кимсе ёкъ, юкъары нарадан къомшусы айткъанына инансанъ, анда тек биревни атмакъ ичюн чыкъаралар...», тюшюнди о ёл бою.

Камерагъа кѡапуны ачмаздан эвель незаретчи Мемед ильк кере Чобан-задеге девамлы бакъты, санки онъа — нуфузлы, азбарда кезинмек акъкъындан файданлангъан мабюске не дереджеде ишанмакъ мумкюнлигини сынамакъ истеди.

Анахтар жынъгъырдысы иле озгъарылгъан Чобан-заде камерагъа кирди ве наралар арасындаки сырадан ерине барды.

Камерада отургъанлардан онынъ къайткъанына кимсе къулакъ асмады.

Тек къомшусы, Чобан-заде къыйналып, аягъыны котермеге ынтылгъаныны корип, ярдымгъа къолуны узатты.

715 номералы мабюс сес чыкъармай ятаркен, тобан толу миндери ушюген аркъасыны къыздырмагъа башлагъаныны сизди.

Башында, Файтонджы иле кезинтиден пейда олгъан къарышыкъ фикирлерден онъа хитап этильгенини бир кереден эшитмеди.

— Сонъ, бугунъ насыл?
Эль-аякълар сагълармы?

— Эр шей еринде, — Чобан-заде, юкъарыдан кельген мырылдыны аз да олса, эшитмек ичюн, башыны бираз котерди.

— Энъ эсасы бу, джесюр баш исе къолларгъа озю къошулур, профессор, яшамакъ ве беклемек ичюн — сонъуны...

Къомшусы сускъанынен Чобан-заденинъ мийини досту ве устазы Сеит-Джелил Хаттатовнынъ якъаланмасы акъкъында фикир ярды: «Сеит Джелилнинъ апис этильмеси акъкъында хабернен къальбимде яра ачмакъ ерине... бареме, къолларыма ургъай эди Файтонджы».

Чобан-заде сувукъ къолларынен козьлерини къапатты ве эр даим, юкъугъа кеткенде олгъаны киби — тюрьме азбары левхасыны эвининъ манзарасы денъиштирди — кабинет, ятакъ одасы... ве андан, Къара шеэрнинъ казематларындан кечип, эшитмек галлюцинациясы киби, пьесанынъ муэллифи Асан Рефатов ве Ругие фортепианода дёрт къол олып чалгъан ве эки сеснен йырлагъан «Арзы къыз»нынъ чая макъам давушлары кельди...

Лякин бир кереден бу давушларны, дигер достлары киби Къырымгъа къайткъан Асаннынъ такъдири акъкъында теляшлы фикир къувды.

Бираз сукюнеттен сонъ давушлар къайтты, лякин бу энди трампете тапырдысы ве боразан чагъырувы эди, олар мындаки тюрьме азбарына узакъта къалгъан маджар окопларындан эшитильген киби олды.

Чобан-заде сескенди, отурды ве юкъарыдаки къомшусы тарафындан къагъытта язгъан къарандаш шытырдысыны эшитти.

Къомшусы, къарандашны агъзында сылатып, нараларда ятаракъ, бир шейлер яза эди.

Чобан-заде, боразан давушына сесленген киби, пенджере янына барды.

Къар иле къарышкъан бурчакъ данелери пенджереге сонъки аккорд иле тапылдатып, четке чекильди ве булутларнынъ кенарыны ярыкъландыргъан кунеш нурларына ер бердилер.

Къолларынен пенджере туюне тирелип, табиятнынъ къуйпа оюныны сейир этти: къар иле бурчакъны кунеш денъиштирип, онынъ шавлеси яваш-яваш уфукъкъа таба догърулгъан булутны ичтен ярыкълата эди.

Юрегини асрет сарды, мийинде, Будапештте кечкен узакъ студентлик чагъында пейда олгъан ве шимди сатырларгъа чевирильген фикирлер, хатырлавлар айланып турдылар.

«Булутлар, булутлар,
Къаерден келесиз?
Коюмден, анамдан не хабер билесиз?
Айтынъыз, барабар, туйдурмай джылайыкъ,
Ёлларгъа тюшийик, сарарып солайыкъ
Булутлар, булутлар,
Яйлагъа кетинъиз,
Эсмамны корьсенъиз,
Селямлар этинъиз.
Йыкъанъыз анамнынъ яшлы козьлерин.
Къолларын опюнъиз, унутсын кедерин»

Къальби аджыныкъ агъырлыгъындан бираз бошанып, Чобан-заде даа текаран пенджере янында турды, санки муджзие бекледи, сонъ яваштан озъ ятагъына къайтты ве къомшусы къаршысында туруп сорады:

— Эвге хабер язасынъызмы?

— Э! — шу арада джевапланды юкъарыдаки къомшусы. — Учъ сёз: сагъ-селяметим, севем. — Марфа Петровна... — ве анълатты Марфа меним апайым.

Къара шеэрде эвдекилернен язышмакъ ясакъ этильген... мында не оляйткъаныны сычан биле бильмесин, деп.

Язмагъа яздым ама, бир мераметли незаретчи тапсанъ да, ёлласанъ... казематнынъ арабакъапусындан чыкъкъан сонъ пошта къутусына ташласын...

Ана къайда меселе!

Истейсизми? — юкъарыдан къарандаш ве талебе дефтеринден къопарып алынгъан кягъытны узатты. — Иште, профессор, энъ саде, амма терен маналы: сагъ-селяметим, севем сёзлери иле гонълюнъизни раатлатынъ...

— Сагъ олунъ, тырышырым, — разы олды Чобан-заде, апис этильгенининъ ильк кунюнден о, зенаатдашлары арасында

язма сёзнинъ устасы сайылып, чешит къабиле ве халкъларнынъ миллионнен сёзлерининъ дадыны бакъкъан ве иште къуллангъан олса да, шимди чекише, апайы, эви акъкъында хабер насыл этип алмалы... ве кери мензильни — Ичери-шехер Къара шеэр олгъаныны насыл косътермели, деген фикирден азап чеке эди...

Сонъ къарар алды — ёкъ, Ругие бойле мутхиш дарбеге даянамаз.

Кягъытны тизинде тегизлер экен, озъ дуйгъуларыны, къасеветлерини шиир вастасынен ифаделемек истеди.

Лякин къальби ильхамлы сатырлар иле сесленмеди, аз да олса, арынмакъ, тазермек истемеди.

Къоллары озю-озюнден Алла берген ильхамындан марум къалгъан мабюснинъ тюшюнгенлерини, дуйгъанларыны серт несир сатырлар иле ифаделедилер:

«Меним языларым ич бир шей косътермесе де, къырылгъан, чайпалгъан, бельки бугунъ-ярын олип, ёкъ болуп кетеджек къырымтатарны, онынъ минлерини, дуйгъуларыны бек яхшы косътере; бир кунъ келип, тарих Къырымман огърашса, къырымтатар къырымтатарны къыдырса, меним языларым ортагъа чыкъар.

Эгер булай олмаса да, зарары ёкъ, манъа, бу сатырларымны язгъаным да етер...».

VII

— Еди юз он бешинджи — чыкъышкъа!

Мемеднинъ пешинден бургъулы мердивенден энерек, Чобан-заденинъ арекетсизликтен къатып къалгъан аякълары эр бир адымдан агъырта, коксюнде исе нефес тарлыгъы пейда ола эди.

Файтонджы оны эски ерде, азбаргъа чыкъышта эллерини кенъ ачып, къучакъламагъа истеп къаршылады.

Лякин Чобан-заденинъ торс, сувукъ бакъышыны корип, бир кезинтини къачыргъаны ичюн озюни акъламагъа башлады:

— Мемеднинъ бир невбетчилигини кечирмек керек олды...

Иш богъурдакътан.

Генерал Сумбатов Къырымдакилернинъ къабаатыны косътерген эп янъы делиллерни талап эте.

Аджеле этип, санъа да къысмен аит олгъан тахкъыкът иши иле Къырымгъа барып кельмек керек олды.

Чобан-заде Мемеднинъ невбетчилиги акъкъында сёзлерни тек шимди анълады...

Йылышкъан вакъытнынъ думанында о, айтылгъан эки кунъ ерине дёрт кунъ къапалы тюрьме азбарынынъ авасындан нефес алмагъаныны абайламай къалды.

— Санъа къырым достларынъ селям сёйледи, — девам этти сабысызлыкънен Файтонджы.

Сени сорадылар, Бакуда озъ институтынъда илим саасында мувафакъиетлеринъ иле меракъландылар.

Олар даа крават иле цивиль френк костюминъни тюрьме урбасына денъиштиргенинъни бильмейлер.

Чобан-задеге козь атты, онынъ айтылгъан сёзлерге мунасебетини кореджек олды, лякин тек азбар бою долангъан лякъайд назарыны коръди, козьлери къум ве чакъыл иле толдурылгъан ерге тюшти — бу ерде Абу Сайид ве Хабиб бузлы топракъта озьлерине къабир къаздылар.

Мында атып ольдюрмек левхасы ойналгъаныны тек таш диварда барот къалдыргъан къара орьнеклер анъдыра эди...

Чобан-заденинъ бираз гонълюни котермек ичюн сесинде рухланув иле Файтонджы:

— Не де олса, айтылгъаны киби, Бизим Къарасувбазардаки сокъагъымызда да байрам олур, эбет, шеэримизге къайткъанынъдан сонъ.

Лякин сен меним самимий эйи мерамларымны къабул этмелисинъ.

Анджакъ, мен анълайым: иджадий, сен киби интеллектуал адамларда мен киби — погонлы, пальтосы тюбюнде белиндеки кынында наган сакълангъан адамларгъа инамсызлыкъ пейда олды, — ве озюнинъ джеплерине ифадели урды, санки пыштав кыныны хызмет борджу иле сакълагъаныны косътермеге истеди.

Бу итирафлары янында лякъайд чере иле адымлагъан Чобан-задени авеслендирмегенини корип, сорады:

— Сагълыгъынъ зайыфлашты, гъалиба?

Биз меним кабинетимде кѡапалып, ачыкѡтан-ачыкѡ субетимизни бирер фильджан кѡаве башында девам этер эдик, лякин мында, авада, хавфсызджа. Козь ве кѡулакѡлардан узакѡча.

— Ёкѡ, эр шей еринде, — сесленди Чобан-заде. — Динѡлейим...

Субетдешининѡ мерагѡыны кѡозгѡалтмакѡ ичюн Файтонджы кене итираф этти:

– Меним Кѡырымгѡа барып кельмем Асан Рефатовнынѡ иши иле багѡлы.

Рефатовнынѡ адыны анѡмасы Чобан-заденинѡ юрегинде агѡры иле сесленди ве тахкѡикѡатчыны сонѡуна кѡадар динѡлемейип, о: “Мен буны сездим де...”, деп тюшюнди.

Файтонджы джиддий сесини бир кереден ишанчлыгѡа денѡиштирип: — Сен Асанны пек яхшы билесинѡ де, кѡоранталарынѡыз иле барды-кельдинѡиз бар эди.

Апай-акѡай сизинѡ эвинѡизде гедже-кунѡдюз ола эдилер...

Асаннынѡ ич бир эсери, «Лейли ве Меджнун» драмасы олсун, «Чора батыр» яки «Той девам эте» олсун, сенинѡ ве Ругие ханымнынѡ рагѡбетлендириджи сѡзлери олмагѡандже, дюнѡя юзю корѡмей тургѡан.

Мен буны Рефатовнынѡ ишинден билем.

Кѡырым акѡкѡында лафлар апансыздан Чобан-заденинѡ кѡальбиндеки бузларны иритти, о денѡиз авасындан нефес алгѡан киби олды:

— Биз апайымнен Асан иле достлугѡымыздан гѡурурлана эдик, саф юрекли адам.

— Не исе, агѡзынѡдан бир лаф алдым, — йымшады Файтонджы.

О, Абу Сайид иле берабер Хабиб кѡазгѡан чукѡурларгѡа бармаздан, чевирильдѡи ве кери кѡайтты: — Эбет, инсан оларакѡ мен сенинѡ Асан иле достлугѡынѡны анѡлайым — экинѡиз де ватандан кѡувулдынѡыз.

Лякин сиз ичюн ябанджы Бакуда да, эр биринѡиз озь саанѡызда, аджайип мувафакѡиетлерге ириштинѡиз.

Атта, Баку драмтеатрининѡ баш дирижѡры оларакѡ, Асан истидатлы Кара Караевни эслеп олгѡаны ве оны котергенини

козь огюне кетирсенъ, бунынъ иле Рефатов азербайджан музыкасында из къалдырды, демене эсас бере...

Чобан-заде сабанынъ сувугъы онынъ аркетлерини агъырлаштыргъаныны дуйып, бинагъа киришке якъын токътады:

— Бу сизинъ Асан Рефатов, Осман Акъчокъракълы акъкъында тахкъикъатчынынъ юрек тѣкюнмелери манъа неге керек? Къальбиме къоркъу кирсетеджек оласызмы?

Файтонджы оксюрикке ошагъан кулькю ичинде богъулаязды:

— Сен джесюрсинъ, узакъ кечмиштеки достлугъымыздан билем, инан манъа, озъ тахкъикъат ишлерим акъкъында, сенинъ адынъ иле сунбий багълы олгъан криминаль адамларнынъ къусур даиресинден чыкъармакъ ичюн айтам. Сонъ исе Сумбатов ве «тройка»ны сенинъ гуняхсызлыгъынъда ишандырмакъ ичюн, делиллер, тек делиллер ве тешкерильген хулясалар иле.

Бу меселе, догърусыны айтам, енгиль дегиль, анджакъ енъишли.

Ялынъыз Асан Рефатов дегиль, «Къырым иши» боюнджа Кефенинъ аписханесинде озъ такъдири даа йигирми мабюс беклемекте.

Оларнынъ эписини сен билесинъ.

Шимди оларнынъ адларыны ве унванларыны айтмагъа истемейим, амма инан манъа, оларнынъ эписининъ ишлеринде сенинъ адынъ анъыла.

Бираз сонъ мен санъа бу, «Къырым тройка»сынынъ серт агъзындан къарарны беклеген, оларнынъ такъдири исе, инан манъа, пахылладжакъ киби дегиль, йигирми адамнынъ адларыны айтырым... — Файтонджы сусты, огге адымлады, онынъ чызмалары топракънынъ бузлу къабугъына урулып, сесли давуш чыкъарды.

Топракътан чыкъкъан давуш Чобан-заденинъ къулакъларыны чынълатты ве о, гъайры ихтиярий шааты олгъан, талелелери устюнден экзекуцияны хатырлады.

— Бу азбарда атып ольдюрмекнен къоркъузып, адамларны япмагъан шейлерини танымагъа меджбур эткенлернинъ истемезден шааты олдым.

Эминим, сиз бегенген бойле усулны Рефаткѡа нисбетен де кѡулланырлар... ве сиз гизли-гизли анѡган «йигирми»ге де...

Файтонджы бир шейлер хатырлагѡан киби боз козьлерини кокке котерди:

— А!

Сен ана шу эки аспирант озѡбек акѡкѡында айтасынѡ...

Оларнынѡ ишлерини капитан Сарымсакѡов бакѡа.

Бакугѡа командировкасы бите ята, генерал Сумбатов оны иш этмегенинде, бедава отѡмек ашагѡанында опѡкелей.

Атта гѡадапланып, айтты, эгер оларнынѡ кѡальплерини терсине чыкѡармагѡа чаре тапып оламасанѡ, мундиринѡни маскѡара этме — озѡ-озюнѡни атып ольдюр!

Иште, шай!

Сумбатовгѡа, «Кѡызыл фуртуна» иши»не бирлештирильген бутюн учѡ «тройка»нынѡ башы олмакѡ авале этильген.

Генерал ишнинѡ масштабыны ве кѡаплагѡан фезаны — Каспийден, Кѡара денѡизден — Арал денѡизинедже – учѡ денѡиз иши, – деп айры кѡайд этмеге севе.

Чобан-заде кескин джевап берди:

— Оларнынѡ кѡальплерини терсине чыкѡармакѡ неге керек, эгер сиз оларны энди кѡангѡа булгѡаладынѡыз?!

Файтонджы онынѡ сѡзлерини, илимде даа кереги киби котерильмеге етиштирмейип, кѡанатлары кѡырылгѡан талебелери ичюн джан агѡыртув киби анѡлады ве озюни акѡламагѡа истеп, Сумбатов ве Сарымсакѡов киби НКВД хадимлерининѡ ве озюнинѡ ишинде фаркѡны анѡлатмагѡа башлады.

— Капитан Сарымсакѡов ве бизим генерал даа граждан дженкинде иштирак эткен эски гвардиядан.

Чапайлар, махнолар киби иш тутмагѡа алышкѡанлар, кѡанун ве кѡаидеге риает этмейлер, екяне делили — кѡылыч агѡызы ве наган окѡу, — ишни беджермек ве Москвагѡа эсабат бермек: белѡгиленген вакѡыткѡа ольдюрип джезаламагѡа авале этильген микѡдарны намус иле беджердик.

Бу биз, кѡызыл профессура дженк заманынынѡ низамнамелерине коре огретильмедик де, Вышинскийнинѡ, Плевако киби прогрессив инкѡиляптан эвельки адлиеджилернинѡ ишлерини огрендик.

Бизни тильшынаслыкъ саасындаки Марр аркъадашнынъ энъ янъы ишлеринен таныш эттилер.

Сёз сырасы, — апансыздан денъиштирди о субет мевзусыны, — тахкъыкъат ишинъде сенинъ институтынъдаки профессор Макъсуд Рустам-заденинъ сесленюви козюме илинди.

О, сени озъ ишлеринъде Маррнынъ янъы теткъыкъатларына ич де таянмагъанынъда, анъмагъанынъда къабаатлай ве санъа нисбетен сиясий уджюм япа, сен тюркшынаслыкъта сынфий янашманы танымайсынъ, деп, мен беллесем, сенинъ адынъ Марргъа багъланмасы къанаатлендирмей.

Сааткъа бакъып, Файтонджы апансыздан сорады:

— Бекир, сен сокъакътан юргенде козетильгенинъни сезмей эдинъми?

Я да сизинъ эвинъизни козеткенлерини?

Бойле догърудан-догъру берильген суальден Чобан-заде бираз шашмалады.

Тюшюнип бакъты:

— Гъалиба, ёкъ, сезмедим.

Апайым да, эвимизге кельген достларымыз да.

Анджакъ, ким бильсин, шимдики заманларда...

Файтонджы субетдешине, юзюни огренген киби, бакъты ве манълайына тюше берген, тазыны ачкъан къалпагъыны тюзетти.

Гуръ сачлы Чобан-заде янында тахкъыкъатчы озюни алчакъ бойлу киби ис эте эди.

— Сени эр кунъ козете эдилер, бу, та бинъ докъуз юз йигирми секиз сенесинден башлап, докъуз йыл девамында япылды.

Кене де ялварам санъа, Бекир, арамызда олгъан лаф бу ерде къалсын, бильселер, меним де бойнум уруладжакъ.

Чобан-заде адымларыны сакинлештирди, Файтонджынынъ юзюне бакъып, онынъ не дереджеде самимий олгъаныны коръмек истеди.

— Сенинъ тахкъыкъат ишинъден апансыздан нарком Сумбадзенинъ Москвадан соравгъа джевап оларакъ рапорты да чыкъты. — Ве, фысылдап девам этти, бекленильмеген янъылыкъны хабер этти:

— Олгъаны киби айтам: «Чобан-заде тарафындан ич бир тюрлю акиссовет арекетлер олмады, сабыкъ миллифиркъаджылар ве дигер контринкъиляпчылар иле алякъасы белли этильмеди»...

Чобан-заде, эшиткенини сонъунъа къадар анъламагъан киби, тааджипнен омузларыны сыкъты:

— Козетильгеним мен ичюн янъылыкъ олды.

О къадар вакъыт мени такъип эткенсиз...

Еди йыл...

Файтонджы Чобан-заденинъ козьлеринде къоркъу я да къорчаланув арекетни беклеп, буларны корьмеген сонъ, асабийленип джевапланды:

— Мында анълашылмагъан не бар?!

Мен ичюн генералнынъ рапорты — тахкъикъатчы Карпонос бирлештирген иште къусурлар, анълашылмамазлыкълар, чектирип багълангъан ерлерни тапмакъ ичюн илери де оны огренмек ичюн... даа бир кучлю делиль.

О къадын ашыкъа, мына ким озюни атып ольдюрмек керек! — Бирден токътады: — Шимди исе олды.

Келеджек корюшювимизгедже.

Мемед энди къапудан бакъа...

Чобан-заде тюшюнджеге далып, ачыкъ къапугъа догърулды.

Апансыздан Файтонджы онынъ аркъасына айткъанларыны эшитти:

— Сёз сырасы, сен санаторийде якъалангъан куню Кооперативныйдеки эвинъе генерал Сумбатов озь командасынен келип, тинтюв кечирди...

Лякин бу сефер де, рапорткъа коре, сени ве Ругие ханымны акъаретлеген ич бир шей тапылмады.

VIII

Эвинде олып кечкен тинтюв Чобан-заденинъ кейфини о къадар бозды ки, ашагъыдаки къатта озь ятагъыны къармалагъанда, бездириджи къомшусынынъ суалини биле эшитмеди:

— Элинъиз-аягъынъызны къырмадылармы?

Чобан-задени, онынъ ишине ич бир зарар кетириджи шей кьошмагъан тинтювнинъ озю дегиль де, «тез тесирленген апайы бесе-белли шашмалагъандыр», деген фикир эеджанланды, хаста юреги де агъры иле сесленди.

Онынъ козю огюнде ябанджылар тарафындан рефикъасы эвленгенлерининъ ильк йыллары яраткъан къынтавлы шараитни бозгъанлары, ятакъханеде, ашханеде тертипни бозып, Чобан-заде, иште болдуруп къайткъанда тынчлыкъ, тескин тапкъан бу джыллы эвнинъ муитини ёкъ эткенлери джанланды...

Сумбатов ве компаниясы эвни асть-усть эткенинден Ругие ханым озъ хатагъа ёл бермеген къадын сезгирлиги иле акъайы Кисловодскта олмагъаныны — санаторий тедавийлевининъ он дёрт куню энди чокътан кечти — о энди Бакуда, Къара шеэрнинъ зинданында азап чеккенини анълагъандыр, деген фикир Чобан-задени зияде азаплады.

Бу кунълери, акъайы ичюн къасеветтен олеязгъан къадын чапып-чапкъалап, генерал Сумбатовнынъ, я да Бакуда энъ итибарлы адам сайылгъан — Багировнынъ кабинети къапусына сокъулып, акъайы иле корюшмеге изин бермелери ичюн ялварадыр...

Ругие ханымны эписинден зияде яралагъан — даа якъында онынъ санадаки чыкъышларына эльчыркъанларнынъ лякъайд сусмасы оладжакъ, бойле этип, бир анъ ичинде дургъун корюнген омрю бутюнлей денъишти, онынъ шерефи, унванлары, мукъфатлары бир капик фиятындалар...

Къомшусы башыны эгильтип, Чобан-заденинъ кейфсиз алда урбасына де сарылгъаны, де шишкен тизини сыйпагъаныны козетти.

Онъа, тёпеден бакъкъангъа, профессор бу сефер, тахъикъатчы Карпоноснынъ соргъусында инатлыкъ япып сускъаны ичюн незаретчиден сопа ашагъаны киби корюнди.

Чобан-заде исе, къомшусы онъа бакъкъаныны абайлап, апансыздан онъа сёз къатты.

Онынъ адыны бильмесе де, урбасында язылгъан номерасыны эм де Мемед Айлисли: «Он едінджи, чыкъышкъа!», деп кычыргъаныны хатырлады.

— Айтсангъыз, муэндис, Къара шеэрде сой-акърабанен корюшмеге изин берилеми?

— Изин бериле, лякин тек мен киби, ана-мына, лагерьде отурмакъ ичюн узакъ ёлгъа азырлангъан частлы адамларгъа...

Къара шеэрнинъ дженубий арабакъапусундан чыкъышта бир-эки сёз къатмагъа имкян берелер...

Сизни телашландырмагъа истемейим, лякин Литер А киби бельгиленгенлернинъ сой-сопундан атта олар комюльген ерни гизлейлер.

Сахте мензильни бильдире ве «Олюм акъкъында шеадетнаме»де биле догъру вакъытны косътермейлер... джезалангъан куню, йылы башкъа ола...

Месея, феялча адам, дейик, бинъ докъуз юз отуз докъуз сенеси он экинджи июльде вефат этти, Азербайджан Эс-Эс-Джнинъ Хачмаз коюнде дефин этильген, я да Къырымда Коккозъ коюнде...

Сонъ тап, бакъайым.

Сой-сопундан комюльген ери гизленильген адамларны террорист я да джасуслар сырасына къошалар ве мезарында не православ хачы, не мусульман айыны къоймагъа изин берелер.

Иште, кедерли, лякин акъыкъат ойле...

Бедавадан бу ерге Къара шеэр демегенлер. — Ве башыны эгильтип, Чобан-заденинъ къулагъына фысылдады: — Анъла, бакъайым: не ичюн биз, къанымыз къайнап, диване киби къызыл байракъны беязлар байрагъына къаршы саллап юрдик...

Агъа къардашыны танымады, огъул бабасыны...

Миллионлар эляк олды...

Чобан-задени эфкъяр сарды, о, богъазында айтылмагъан сёзлер тыкъалып къалгъаныны дуйды.

— Олар къальбимни къырдылар, — апансыздан айтты о хырылдап.

— Олар умют яшагъан къальплерни къыралар. — Сесленди къомшусы ве юкъламагъа истегенини косътереджек олып, козьлерини къолларынен къапатты.

Бир янындан дигер янына айланды, дуа киби бир шейлер фысылдады ве апансыздан айтты:

— Профессор, меним апайым Лизавета мен иле чыкъышта манасы олмагъан — чыдамлы ол, акъайчыгъым киби

олмайджакъ къадын лафлары айткъаныны истемейим, мени кунешли Бакудан терс, сувукъ Нарьян-Маргъа йибергенлеринде...

Меним азгъан, хорлангъан, гъарип алымны корип, бу энди яшамайджакъ, деген хуляса чыкъарыр.

Лизавета лабораторияда ермайнынъ ачыкъ союны кьою тюстекинден айырмакъ устюнде чалышкъан Сары Володькагъа акъайгъа барыр.

Бойле олгъаныны истемейим!

Сарыгъа акъайгъа чыкъа берсин, амма мангъа дуйдурмасын, онынъ арсыз козьлерине бакъып, онынъ гизли фикирлерини дуймагъа вакътым ёкъ, — ве Чобан-задеге ичип битирмеген, тютюни чыкъкъан папиросны узатты.

Чобан-заде тютюнни бирден ичине терен чекти ве коксюнде пейда олгъан джыллылыкъ юрегининъ сызламасыны ятыштыргъаныны дуйды...

IX

Незаретчи Мемед Айлисли, Чобан-заде ве Файтонджы арасында къаиделерден тыш корюшювлерини гизлейджек олса да, эписи хавфларны козь огюне кетирип оламады.

Шу джумледен, ашагъы къатларда отургъан ве профессорны таныгъан мабюслерден бириси пенджереден оны насылдыр белли олмагъан инсан иле азбарда кезингенини корип, эндамындан таныйджагъыны тюшюнмеди.

Ойле ачыкъкозь инсан исе тапылды ве бу, незаретчи камеранынъ къапусындан башыны сокъып чагъыргъанда, 54 сангъа сесленген Хабиб Гулям-заде эди.

Хабиб бундан чокъ кечмеден Абу Сайид иле берабер корьгезмели атып ольдюрмек вакъиасындан даа озюне келялмай эди.

Шу, кирли, къар иримеге башлагъан тюрьме азбарында андамында къалгъан куню уйле маалинде сакъчылар оларнынъ башларыны зораки ерге эгильтип: «Къабир къазынъыз!» — деген эдилер.

Абу Сайид топракъкъа ургъан сайын къызгъын къальби сыкъылгъаныны — яни, бойле вакъытта «юреги къан къусты» дегенлерине ошагъан шейлер дуйса да, курекни тендюристлик иле ерге саплады.

Къоллары курек тутмагъан Хабиб исе апансыздан къартбабасы — Сайфуллохаджини Бухаранынъ Хазрат-и-Имом мезарлыгъында комъгенлерини хатырлады.

Бу онынъ омрюнде догъмуш инсаннынъ озгъармакъ боюнджа ильк пек тесирли ве кедерли теджрибеси олгъан эди.

Лякин къальбине олюмнинъ аджджысы дегиль де, сагълыкълашув анъаненинъ озю сапланып къалды: мевтагъа багъышлангъан дуа — дженазе намазы, вуджудыны ювмакъ, беяз кефинге сарып, къадынларнынъ яйгъарасы иле чыкъармакъ эснасы ве Алладан, къычырып, рахмет сорагъан, табутны ашыкъчанлыкъле алып кеткен адамлар...

— Тездже!

Тездже! — Хабиб аркъасы артында тургъан сакъчынынъ даушындан сескенди.

Ипрангъан потиклери, чамурда батып, аякъларындан тюше эдилер...

Бекленильмеген сонъу ашыкъып япылгъан ве къыскъа олды...

Къоллары аркъасы артында багълангъан.

Атыш даушы — биринджиси, экинджиси...

Сукюнет.

Къомшу къабирден чамургъа бетинен сокъулгъан Хабибге бакъкъан тааджиптен къыйышкъан Абу Сайиднинъ юзю...

— Фу, гъалиба, баллар яхшы козьлеп оламадылар...

"Тур!" эмири яшларны яваштан, къоркъунч тюш коръгенинден сонъ киби, анъларына кетирди:"Сагъмыз!".

Бу вакъианынъ тесадуфий шааты, камерасынынъ пенджересинден бакъкъан Чобан-заде олды.

Файтонджы иле корюшкенде исе талебелери чеккен азап себебинден къыскъа ве ифадели айтып ташлады:

— Мабюслернинъ къальплерини терсине чыкъармакъ неге керек, эгер сиз оларны энди къангъа булгъаладынъыз?

Кене камерада къапалы Хабибнинъ, яшап кечирген шоктан дуйгъулары кескин агъры иле къайтмагъа башлады.

Бу вакъиа еди кунъ ве гедже аписте кечирген эм де Къара шеэрде къоркъу иле яшамагъа алышаяткъан мабюснинъ тертибини бутюнлей бозды.

Оны даима пенджереге бармакъ истеги кыйнай эди.
О, саналаштырма атып ольдюрювнинъ излерини гизлемек
ичюн топракъны агъыр чызмаларнен таптагъанларыны
коръди.
Ильк эки кунъ ве гедже Хабиб пенджерен сийрек чекиле,
кыргызлангъан ай озъ кыя шавлелери иле Асиенинъ
юзюни джанландыргъаныны коръди.
Бирден озюни арткъа алды, Асие оны шашкын ве гъарип
алда кореджегинден кюркъты.

Пенджере янында яткъан ве юкъусызлыкътан чекишкен
къомшусынынъ акълына чая фикир кельди: бельки Хабибни
54-джи дегиль де, «Лунатик», деп чагъырмалы.
— Лунатик...

Эй, Лунатик, кыйнагъан сув ич...

Лунатик — чыкышкъа!

Хабиб зайыф тебессюм иле сеслене тургъан.

О, йигirmi дёрт йыл яшагъан омрю шавлесиз бир
къаранлыкъкъа баткъаныны, тек пенджере черчивесинде
ярыкъ къалгъаныны тасавур эте эди.

Шу саба кыш кунешининъ акъ нурлары пенджеренинъ
черчивесини корюмли бир левхагъадже кенишлеттилер.
Онъа бакъып, Хабиб аз къалды, кычыраязды.
Тюрьме азбары бою алкъалап, яваштан кезинген эки
эндамдан биринде Чобан-задени таныды.

Ильк фикри: оджасыны да ашалайыджы, залым мыскыл
олгъан саналаштырылгъан атып ольдюрмекке
огъратаджакълар.

Анъыны агъыртып санчыгъан фикир догъды: тырышып, бар
кучюнен пенджере первазыны сыкып чыкъармакъ ве онынъ
иле берабер азбаргъа атылып чыкмакъ.

Пенджере первазы гыйчылдады, амма биринджи ынтылувы
нетидже бермеди.

Даа бир кере басты, амма бу сефер оны айныкъ фикир
токътатты.

Эндамлар, алкъаны кесип, якъынлаштылар.

Оларнынъ сакин адымлагъанларына бакъып, экиси де бир
шейлер акъкъында субетлешкени анълашылды.

Бильмеген адамнынъ башында къалпакъны абайлап, Хабиб
анълады, о Кырымдан кельген...

Узакътан насыл хабер кетирген экен — оджасынынъ кедерли
такъдирини енгиллештирген я да умют берген союнымы?

Не акъкъында субетлеше экенлер?

Чобан-заде иле Файтонджы исе энди кечкен гизли корюшювлеринде башлангъан субетни девам эте эдилер.

Шу джумледен, «къызыл профессура» сырасындан олгъан тахкъыкъатчынынъ тирнекли назары профессорнынъ ишинде бир джинаий вакъианынъ дигер вакъианен зайыф багъланмасыны тапкъаны акъкъында.

— Билесинъми, Бекир, гизлиден геджелернен "Къызыл фуртуна" ишине эп даларкен, сенинъ алынъны енгиллештирмеге ярдым этеджек делиллерни къыдыраркен, — къайд этти о истизанен ве эрте тазлангъан башына има этерек, къалпагъыны тюзетти.

Чобан-заде, онынъ къыркъ дереден сув кетирип лаф эткенлерини динълерек, базада о бефтан умютлер беслегенинде озюни опыкелей тургъан.

Чюнки олар ялан, иллюзия олып чыкъа биледжеги анълашылып тура эди.

Шимди де, субетдешининъ оюнына уйгъан киби, Файтонджыгъа.

Файтонджы, онынъ гуръ, къарышып къалгъан сачларына тек самайларында чал тюшкеннини абайлап, кулюмсиреди.

– Сенинъ сачынъ, тамам рушдиеде къызлар бакъып къалгъан, яшлар исе пахыллагъан замандаки киби... — ве, бугунъ бир саат тапып, аязда бузлап, эсас макъсадындан четленгенине, комплиментке вакъыт джойгъанына элесленди.

— Велякин, ишке кечейик, Бекир!

Сантиментлерни сонъуна, Къырымгъа къайтаджакъ заманларгъа къалдырайыкъ...

Сумбатовнынъ сенинъ артынъдан незаретлери ве эвинъдеки тинтюв акъкъында Москвагъа эсабаты ишинъе криминаль ич бир шей къошмадылар.

Буны билип, сенинъ этрафынъдаки дубараны эки къат гъайретнен чезмеге къарар эттим.

Тек мутехассыс оларакъ дегиль де, зиядесинен инсаниетлик, сенинъ такъдиринъе достане мунесебетим ичюн.

Нетиджеде, менден багълы эр шейни япып, Сумбатов ве «тройка»ны сенинъ къабаатсыз олгъанынъа кетирмек ичюн...

Анълайым, бу агъыр, гъает агъыр, сенинъ тахкъикъат ишинъни ойле бир къуветнен юмрукъкъа сыкъмакъ керек ки, кягъыт тозу киби сепилип кетсин...

Геджелернен, санъа япылгъан чакъувлар, къабаатлавлар иле кягъыт обалардан, аз олса да, раатланмакъ ичюн талгъан козьлеримни сюртерек ве папиросны думанлатаракъ... хаялымда, сени Къара шеэрнинъ зинданларындан чыкъарып ве бу юкни къамбурыма юклеп, Каспий ялысындан тар ёлчукъларнен сени, Бекир, сербест адамны, образлы айткъанда, озь омузларымда Къара денъизимизнинъ ялысына алып кеткенимни тасавур этем...

Сен, Бекир, кичкене чобан баласы, мени, олеязгъан алымда Дешт-и-Къыпчакънынъ къумларындан алып кеткенинъ киби — эйилигинъ ичюн эйилик.

Догърусыны айт, мени чокъ йыллар кечтикче чобан баласы дегиль де, Бакугъа сенинъ къарышыкъ ишинъ иле ёллангъан Къырым «тройка»сынынъ тахкъикъатчысыны расткетиргенинъе пешман этмейсинъми?!

Файтонджынынъ девамлы нуткъунынъ манасыны сонъуна къадар анъламагъан Чобан-заде тюшюнджели алда сесленди:

— Чобан балалары...

Биз пак ве садедиль эдик...

Лякин шимди бизим ишлеримиз, насыл олсалар да — догъру я да хаталы, Алланынъ махкъумине берильген... онынъ ичюн бир шейден пешман этмейим, бу яшайышта, не къадар хаталы олсалар да, ич бир адымымдан ред эттем.

Файтонджы Чобан-заденинъ сёзлеринден бираз шашмалады, лякин озюни тез элине алды:

— Белоусов — ОГПУ коменданты, камерада дуа эткенлерни коръсе, къылынмагъа севе: «Аллагъа умют эт де, озюнъ де агъызынъ ачып отурма...», — дей.

Сабыкъ чар хорунжийлерден...

Казак...

Къаравулхане янында сув чыбыргъаныны эшитип, экиси де токътадылар.

Сакъчы, оларнынъ тарафына биле бакъмайып, къопкъадан кирли сувны азбаргъа септи ве арабакъапу артында сакъланды.

Файтонджы, саатына бакъып, адымларыны тезлештирди:

— Эбет, кечкен яшлыкъны хатырлап, асрет чекмек яхшы, Алланынъ рахметине инанып...

Лякин бугунъки куннинъ серт барлыгъына къайтайыкъ.

Сенинъ ишинъдеки эписи уймагъан ерлерине коре, сучсызлыгъынъны исбатламакъ ичюн энъ реаль корюнгени шу ки, эгер Бекир Ваап огълу Чобан-задеге такъдим этильген къатты къабаатлав айры бакъылса, юзлернен бакулылар, кырымтатарлар, озыбеклернинъ ишлеринен багъламайып.

Сен ве олар иле багълы «Къызыл фуртуна»дан айры.

Догърусыны айтсам, сенинъ яптыкъларынь ве сен иле багълангъан адамлар иле алякъанъны кыдыргъанда, базада мен акълымны алдыраяздым.

Шу адамлар иле сен Миллий фиркъада, Мусаватта, Социалистик Туркестан фиркъасында, Тюркологик съездлернинъ ишинде, мында Бакуда, Самаркъандда ишлегенсинъ...

Сонъ бу насыл олды я?! — театрдеки киби джайды къолларыны Файтонджы. — Сумбатовнынъ Москвагъа япкъан рапортында сенинъ артынъдан чокъыйлыкъ незарет, буны къайд этем — чокъыйлыкъ! — сенинъ фиркъада аза олгъанында, Тюркологик съездлерде, сен язгъан китапларда, назмиетинъде — санъа къабаат киби къошулгъан акиссовет арекетлер тапылмады.

Мен бильгениме коре, Сумбатов пек тирнекли генерал, Москвагъа рапорт бермектен эвель эр бир сёзни, эр бир виргульни учъ кере тешкерир.

Шереф къулу бир ерде хата япкъандже, озы-озюни атар.

— Аджджы-аджджы кулюмсиреди: — Бизни, тахкъикъатчыларны да, эгер бир шейни бегенмесе, айындыра: «Резиль олма — озюньни ат!»...

Иште, Чобан-заде ишини пек эдинип огренген сонъ, тек бир нетидже чыкъардым: «Къызыл фуртуна» уюримине сен тесадюфен тюштинъ, ич бир къабаатсыз ерде эки бакулы фиркъа къабилесининъ — Джафар Багиров ве маариф наркомы Рухулла Али Ахундов арасында явуз дёгюшининъ къурбаны олдынъ.

Образлы айткъанда, демирджининъ апрачлыгъына бола чёкюч ве орьсю арасына тюшкен демир ёнгъа киби.

Бу эки къабиленинъ курешинде чёкюч ургъан дёгюджи оларакъ де Багиров ола, де, онынъ къолундан тюшкен чёкючни Ахундов ала эди.

Тесадюфен араларына тюшкен демир ёнгъалар исе, агъаргъандже кызып, эзильди.

Курешнинъ сонъунда сонъки уджюм ве дарбени шанслы, аллякъ, эм де Москванынъ ярдымы иле — Багиров япты...

Мына санъа, достум, сенинъ къалеминъе ляйыкъ олгъан кадрлар демирджиханесининъ левхасы.

«Онынъ демирджилер цехиндеки тутушув акъкъында сёзлеринде акъыкъат бар», — тюшюнди Чобан-заде, оны демир ёнгъанен тенъештиргенлери ичюн джаны агъырткъаныны бастырып.

Багиров ве Ахундов арасында куреш олаяткъаны акъкъында Чобан-заде тахмин эте эди.

Рухулла Ахундовнен олар дост эдилер.

Озю ичюн агъыр, ишсизлик кунълери Ахундов достуна, профессоргъа къоранта бакъмагъа бир эки капик тюшсюн деп, Баку газетлеринде макъалелерини нешир этмеге ярдым эте тургъан.

— Ошлу, — хымылдады Файтонджы. — Ахундов иле сенинъ чокъйыллыкъ — иш иле, я да достане алякъанъ незарет астында кечти.

Сенинъ ишинъде атта тырач арифметика мевджут — Рухулла иле сиз бири-биринъизге къач кере мусафирликке бардынъыз, джыллы, къоранта даиресинде умумий ишлеринъизни музакере этмек ичюн байрамлар ве догъгъан кунълерде къач кере корюштинъиз...

Сонъки, бу сененинъ январь айынен бельгиленген эсабатта Ругие ханым Рухулла санъа санаторийге ёлланма иле ярдым этмесине ялварды.

— Эбет, Рухулла дост... ярдым этти, — далгъынлыкъле айтты Чобан-заде, эшиткени устюнден тюшюнерек, башы думанлы олгъаны ичюн эр шейни тантиминен хатырлап оламаса да.

— Сёз сырасы, сени якъалагъан сонъ бир къач кунъден Ахундовны да мындаки зинданларнынъ биринде къападылар, озь имаеджинъни коридорлар сыкъышлыгъында я да тахкъыкъатчыда тесадюфен корерсинъ бельки.

Рухулланы якъын арада конвойнен Москвагъа ёллайджакълар.

Андаки «тройка» онынъ ве рефикъасы — Фрида Наумовна Шлемованынъ такъдирини бельгилейджек: ойле къаиде бар — эгер акъайлары «халкъ душманы» эбедий лекесини

къазанса, къадынларыны да лагерьлерге он эки тире он беш йылгъа ёллайлар...

Чобан-заде апансыздан, козюне перде тюшкени себебинден огюнде бир шей корьмеген киби, токътады.

Ругие акъкъында тюшюндже онынъ мийини кескин фикир оларакъ чертип алды.

Далгъынлыкъ иле текрарлады:

— Он экиден он бешкедже?

— Эбет!

Сен, Бекир, Фрида Наумовнаны хатырламакъ керексинъ – Ругие ханым иле дюгене эдилер, эвинъизге бир фильджан къавеге, я да партноменклатура тюкянында алынган мот шляпачыкъ, чантачыкъ иле макътанмагъа кире турган...

Бу шейлер биле сен ве Ахундовнынъ тахкъыкъат ишлеринъизде къайд этильген, иште, шляпачыкъ мот, онынъле театрге бармакъ хош келе. — Файтонджы, авучыны агъыр ченгесине тиреп, бираз вакъыт тюшюнди:

— Багъышла, Бекир, эки дев — Багиров ве Ахундов арасындаки тутушувда санъа демир ёнгъа ролюни берип, ойле образлы къыяслав япкъаным ичюн.

Багъышла, мен авеслигиме берильдим.

Эгер хатырласанъ, мен яшлыгъымда масал токъуй эдим...

Биз, къырымтатарлар ичюн, сен, эвельдеки киби, шаир, алим, антик къыйметиндеки фельсефеджи къаласынъ...

Юнанлар ичюн Сократ киби...

Тылсымлы сёзлер дюньясына далган, оларнынъ гизли маналарыны аджайип назмиетте ачмагъа тырышкан...

Эркин, терс, базыда исе мукъайтсыз олгъанынъда, сенинъ аркъанъ артында мемурларгъа чевирильген сабыкъ инкъиляпчылар олюм-къалым куреши алып барганлары акълынъа келип ола эдими, озъ укюмдарлыкъ ичюн курешинде, бильдирмеден, сени озъ дубарасы боранына джелъп этип.

Даа зиядесини айтайым: Ахундов — Чобан-заде тахкъыкъат ишинден филис киби мустакъиль ишлер айырылып чыкъты.

Месея, озъбеклер Абу Сайид Ходжаев ве Хабиб Гулям-заде — сенинъ аспирантларынкы.

Оларнынъ такъдири, мен бильгениме коре, энди чезильди, Ахундов ве Фрида Наумовнанынкы киби.

Капитан Сарымсакъов Ходжаевнинъ ишини алий джезагъа, Гулям-заденинъкини колонияда он алты йылгъа кетирди...

Чобан-заде аякълары къалтырагъаныны дуйып, токътады, теренден кокюс кечирди, Файтонджы онынъ агърыдан къыйышкъан юзюни абайламасын, деп, башыны тѣбен алып, бираз турды.

Файтонджы ичтен ярыкъландырылгъан пенджерелерге бакъы, лафыны девам эткенини узакътан киби эшите эди:

— Генерал Сумбатов «Къызыл фуртуна» иши»ни алып баргъан группаны бири-бирине уйгъун чалышмагъа чагъыра — делильге делиль, шубе олса — даа бир кере тешкермек — гъарезкяр джинаетте шекленген кимсенинъ эписи исбатларынынъ эсасы бармы...

Эбет, Сарымсакъов иле арамызда зихний фаркълар бар — Асиенинъ узакъ дженюбинден кельген озъбек, эр дженюбий инсан киби чаман, ишине бутюнлей берильмей, анджакъ амбициялары бар, озюни котермеге севе.

Озь ишлерини битирсе де, Бакуда энди эки афтадан берли отура.

Ватанында оны рутбедже котерилюв, орден ве янъы «Къызыл-къумларда самум» иши беклей.

Бу иште — Абдулла Къадыри, Чулпан ве даа эки данеси, оларнынъ сойадлары хатырамда къалмады — олар да биз, къырымлар киби, сюляле сырасы тизильмеси ичюн тюрклештирильген Алишер Темир огълу я да Севиль Нариман къызы киби адларны кочюрп алмагъа тырышалар — ерли миллетчилерге къаршы къабаатлавлар топлангъан...

— Сааткъа ифадели бакъып, сагълыкълашмагъа вакъты кельгенини косътерди:

— Олды, Мемед къапуны къырмалай... санъа ишинъ ве азатлыккъа чыкъманънынъ толу корюнишини такъдим этмем ичюн даа бир-эки кунъ сабыр этмелисинъ...

Алла сабыр берсин.

X

Чобан-заде ве таныш олмагъан адамнынъ бу, дѣртюнджи ве сонъки, азбарны адым-адым, екюнленмеген тѣгерек бою кезинтисини де Хабибге коръмек къысмет олды.

Теляшлы юкъудан зорнен айынып, бирден пенджереге япышты.

Азбарнынъ корюниши але даа эеджанландыра эди: ким экен о кесментик, юргенде къолларыны гъайретнен саллагъан беллисиз адам?

Сааткъа сыкъ-сыкъ бакъа.

Бесе-белли сувукъ азбарда юкъарыдан биревлери изин берген вакъыттан арткъач къалмагъа истемей.

Тизинедже къара пальтосы, къулакъларынадже бастырылгъан къалпакъ.

Къырымдан ёлланылгъанмы?

Не кетирди?

Чобан-заде онынъле тюрме азбарында тынч кезине.

Башкъаларына исе, тазе авада кезинмек четте турсын, камералардан чыкъмакъ ясакъ.

Бири-биринден анълашылмагъан суаллер бухаралыны шашырта, якъаланувдан олгъан шоккъа даа зияде айрет къоша эдилер...

Миндерде созулып яткъанда исе козю огюнде Асиенинъ сымасы джанлана тургъан...

Онъа чокъ шейлер ишандырды, энди булар эписи ич бир заман омюрге кечмейджек киби корюне: Бакудаки экинджи татилинден сонъ къызыны Бухарагъа алып бармакъ...

Оны догъмушларынен таныштырмакъ ве оларнынъ разылыгъыны алмакъ.

Эр Алланынъ куню догъмуш шеэрининъ сокъакъларындан кок козлю, ачыкъ тебессюмли, тюзгюн эндамлы, Хабибден ярым баш юксек къырым къызынен кезмек ве къаршыларына кельген огълан ве къызларнынъ мерагъыны сезмек...

...Чобан-заде Мемеднинъ чагъырувына бир кереден сесленмеди.

Козетиджи белине илиштирилген кырчмаларны жанъгъырдатып, къапуда тургъан вакъытта, саллана-саллана, босагъадан атлады ве коридоргъа чыкъты.

Мабюс аякъларыны зорнен алмаштыргъаныны корьген Мемед, тосат-тосат оны тирсегинден тутып кетти.

Файтонджы папиросны агъзына алып, энди азбар бою юре эди.

Ачылгъан къапунынъ гъыйчылдысына айланып, Чобан-заденинъ чырайы къачкъаныны корьди: бети агъаргъан, козь къапакълары шишкен, мердивеннинъ пармакълыгъына тирельген къолу къалтырай.

Чобан-заде Ругиени къасевет этип, гедже юкъламады.
Онынъ мийинде Файтонджынынъ «халкъ душманларынынъ
апайлары» акъкъында сёзлери мыхланып къалды.
Оларнынъ ич бир къабааты олмаса да, акъайлары
япкъанлары ичюн чокъ йылларгъа лагерьлерге
ёлланылгъаныны тюшюнди.

Танъ алды къаранлыкъны кесип, Чобан-заденинъ юзюне
ургъан къаравулхане устюндеки прожекторнынъ ярыгъындан
мабюс айынды.

Файтонджыгъа ильк сёзлери исе талап киби янъгъырады:

— Сервер манъа абулкъат керек!

Файтонджынынъ козьлеринде мемнюнлик къыгъылчымлары
йылтырады, санки айтаджакъ олдылар: не исе, сен манъа
ишандынъ.

Чобан-заде онынъ тебессюмини коръмесин деп, къалпагъыны
манълайына бастырды.

Мабюске папирослар иле къутуны узатаракъ, хымылдады:

— Абулкъат?!

«Тройка» махкемесинден кечкен камерадашларынъ санъа
айтмадылар ёкъса: махкеме суръатлы кече, йигирми-отуз
дакъкъа...

Адынъ-сойадынъ... ве махкюм...

Абулкъаткъа натыкъа косътермек вакъыт бармы?

Чобан-заде къутугъа элинен узанды, Файтонджы
азырлыкънен юзюне янъган серникни якъынлаштырды.

— Бизим узун субетлеримизден анъламадынъмы: сенинъ
тахкъыкъат ишинъни дикъкъатлы окъугъанда, мен буны,
яшлыкъта сеннен къан къардаш олгъан инсан оларакъ
меракълангъаным ичюн япмадым.

Къырымгъа къайткъан сонъ исе, къарасувбазарлыларгъа сен
Къара шеэрнинъ зинданында озюнъни насыл дуйгъанынъны,
андан исе сийрек адам сагъ чыкъа, икяе этмек ичюнми?

Сен сонъуна къадар джесюране тургъанынъны!

Эльбет де, ёкъ!

Мен санъа бу тюрме азбарында анълаткъан шейлерге
инанмадынъмы?

Меним азиз макъсадым — Къырымгъа бир озюм дегиль де,
сен иле къайтмакъ...

Эдждатларынъ, ананъ-бабанънынъ къабирлерине теменна этмеге, къардашынъ Зулейханы къучакъламагъа, сен къундакътан бакъкъан, янъы догъгъан къозуны киби къолунъда ташыгъан огълунъ Мустафанынъ къуванчлы тебессюмини корьгенинъни истедим.

Чобан-заде сувукъ белькемигини бузлатмагъа башлагъаныны дуйып, сорады:

— Айса, Сиз махкемеде чыкъыш япаджакъсынъызмы?
Мен къабаатсыз олгъанымны исбатлайджакъсынъызмы.
Курек ве орьсю арасына тесадюфен тюшкен демир ёнгъа киби!
Сизинъ образлы къыясламанъызны махкеме бегенир.
Сумбатов сизинъ агъзынъызны къапатмаз ве махкеме тез ве адалетли олгъаныны хатырлатып, къапу артына къувмаз!

— Кх! — чыкъарды сес субетдеши, тюшюнджеге далып. —
Сен меним амелимде энъ къыйын вазифе бердинъ.
Енгиль джевапны беклеме...
Бу суальге мусбет джевап екаяне адам — генерал Сумбатов — бир шахыста ве баш къабаатлайыджы...
Анджакъ, сонъки вакъытлары генерал, не ичюн дир, мени севмей къалды, меним делиллеримни динълемей...
Атта, меним делиллерим онынъ, Сумбатовнынъ, Къырымгъа айт о я да бу иш боюнджа делиллерине кесен-кес олмагъанда. — Синъирленип, ичине тютюн чекти ве къошты: —
Булар эписи капитан Сарымсакъовнынъ кучук фитнелери, айттым да — зихниетимиз, тасиль севиемиз фаркълы.
Сарымсакъовда «Къызыл фуртуна»да олгъаны эки иш — озъбеклернинъ — сенинъ аспирантларынънынъ, Дубараджы Сарымсакъов генералны, мен Бакугъа кетирген «Къырым йигирмиси»нинъ ишинде къабааты бутюнлей тасдикъланмагъан адамларнынъ сойадлары расткельгенинде, Къырым «тройка»сы оларгъа ишлерни Москвагъа план арткъачынен беджерильгени акъкъында рапорт ёлламакъ ичюн ачкъанында къандырды.
Гогольдеки киби «Ольген джанлар»...
Сёз сырасы, бугунъки кунъге мабюслернинъ микъдары йигирми дегиль де, он секиз, эки данеси Москва джедвелине кечти — Рефат Рефатов, сен бильген Асан Рефатовнынъ агъасы... ве актёр Джелал Меинов.
Сенинъ ишинъ иле мураджаат этмеге чарем олгъан екаяне инсан — Сумбатов...

Эбет, эгер тахкыкыятчы Карпонос иле ишбирликте олсанъ.
Баштаки соргъуда бутюн къабаатларны инкяр эткен эдинъ...
Разы олсанъ, генерал сенинъ ишинъни янъыдан
бакъылмасына ёллайджакъ — Сумбатов иле бойле
анълашкъан эдик.

Сен екаяне дегильсинъ — бойле этип, сенинъ институтынъдан
бир къач профессор озъ ве якъынларынынъ омюрилерини
къуртардылар.

Тек ойле сен озюнъки ве Ругие ханымнынъ омрюни
къуртарырсынъ.

Бунен берабер исе, ачыкъ айтам, меним — Сервер
Файтонджы, Къырымда энъ яхшы тахкыкыятчынынъ ад-
саныны.

Бойле де Сумбатовнынъ маньяк сесини даима эшитип турам:
«Исбатлап оламасанъ — озюнъни ат!». - Апансыздан
пальтосынынъ ян джебинден экиге букюльген кягъытларны
чыкъарды. — Вакъыт тапып, таныш олурсынъ...

Джедвельнинъ сонъунда сен Сумбатовгъа айтаджакъ бир
къач сёз бар...

Иште, бутюн бу къырым мабюслерини билем...

Эр бирине къаршы шаатлыкъ япмагъа азырым, бирисинен
чалыштым, дигеринен дост олдым, учюнджисинен Миллий
фиркъада аза олдым, дёртюнджисининъ миллетчи назмиети
акъкъында макътав къасидеси яздым ве иляхре...

Мемед ишмар этти. — ве ашыкъмагъа башлады. — Тез арада
корюшкендже...

XI

Камерагъа къайткъан сонъ Чобан-заде чокъ вакъыт озюне
келип оламады.

Топаллап, озъ тёшегини тапмагъан киби, сыкъ наралар
арасындан къасеветли чырайынен юрди.

Башыны котерип 715-нджи мабюс де омузларындан
тюшеяткъан робасынынъ якъасыны синъирли тюзеткенини,
де Мемеднинъ чагъыргъанындан сонъ элинде кетирген экиге
букюльген кягъытны ачкъаныны козетти.

Кягъытны тегизлемек истеди, лякин пармакъларыны идаре
этип оламады.

Не исе, Чобан-заде озъ тёшегини тапты.

Лякин онда бир кереден, аркъасынен миндерге басылып,
созулып ятмады.

Эгилип отурды, чевре-четке, биревни кыдыргандай, бакъты.

Файтонджы иле субет ильк кере онынъ кыальбини кыозгалтты ве ойле тесир этти ки, мийи кыарышмагъа башлады.

Абулкыат, баш кыабаатлайджы Сумбатов, ярым саатан зияде девам этмеген махкеме акъкында фикирлер кыарышып кыалдылар ве ярыгъы корюнмеген бир чыккылмаз вазиятке тюшкени дуйгъусы оны синъирлендире эди.

Файтонджы онъа берген такъдири белли олгъанларнынъ джедвели эллерини якъкъан киби олды.

Кыгъытны ачмагъа джесаретленди.

Джедвельде басма машинкасында тырачлыкънен сутунгъа тизильген Кефе тюрьмесинде озъ такъдирини беклегенлернинъ адлары ве сойадлары бар эди.

Элифбе боюнджа кыоюлгъан адлар кыаршысында тантиминен оларнынъ якъаланувдан эвель ким олып чалышкъанлары, ненен огърашкъаны, кыоранта азалары язылгъан: Аблямит Якъуб — алим-кимияджы, Кырым кой ходжалыгъы институтынынъ оджасы...

Азизов Якъуб — алим-фельсефеджи, Кырым педагогика институтынынъ доценти...

Айвазов Асан Сабри — языджы, алим-тильшынас ве этнограф, 1917-1918 сенелери Кырултай реиси...

Акъчокъракълы Осман — языджы, терджиман, алим-улькешынас, археолог, этнограф, фольклорджы, Кырым педагогика институтынынъ оджасы...

Чобан-заде козю ярамай корыгени ичюн пенджере ярыгъына якъынджа адымлады...

Осман Акъчокъракълы...

Кырымдаки достларындан Кысловодсккыа кетмезден эвель корюшкен сонъкиси...

Онынъ ады «он секизлер» джедвелинде ойле такъдим этильген ки, санки о, Чобан-задеден сонъ Кырымдан кыувулмады да, бугунгъе кыадар педагогика институтында чалыша...

Анъы Османнынъ кечмиши ве бугунъки куню арасында вакъыт йипини узатып оламады.

Анджакъ, козю огюнде сойадлары олгъан къалгъанларнынъ да: Александрович Рамазан — оджа, Къырым АССР-де 1934-1937 сенелери Маариф наркомы...

Боданинский Усеин — рессам, санатшынас, Багъчасарай сарай-музейининъ директоры...

Тархан Ильяс — языджы, Къырым АССР Меркезий Комитетининъ реиси...

Недим Мамут...

Хаттатов Сеит-Джелил — 1917-1918 сенелери Къурултай укюметининъ азасы, Миллий Фиркъанынъ етекчиси...

Кефе тюръмесининъ мабюслери джедвелини окъуркен, Чобан-заде онынъ фикирлерини ве арекетлерини сыкъ бугъумлагъан ве сонъки куньлерде, айларда омузларында яткъан агъыр юк тюшкенини сизди... ве о бильген, дост олгъан оларнынъ назмиет, театр, илимлер — археология, химия, этнография сааларында къазангъан мувафакъиетлерине самимий къувангъан адамларнынъ такъдирине хатырасынен узанды... къырым халкъы озь улулыгъы, истидатлары, тарихы, озь топрагъы, эждатлар топрагъы акъкъында толусынен бильген ренесанснынъ о ярыкъ, эеджанландыргъан йылларына хаялынен далды...

Канцелярия тилинен ифаде этильген тюзсюз «Файтонджы джедвели»ндеки инсанларнынъ такъдири Чобан-заденинъ къальбинде къыгъылчым якъып кечти, рухуны, анъыны фикир къаплады: эбет, эгер яшайышта бойле истидатлы семетдеш-ватанперверлернен расткельмек сыра кельген олса, бу яшайыш бефтан кечмедиди...

Чобан-заде миндери тюбюнде талебе дефтеринден япракъны къармалап чыкъарды ве къомшусына мураджаат этти:

— Лютфен, къарандашны бираз вакъыткъа берип оламазсызми...

Юкъарыда къатты юкъугъа далгъан къомшусы бир кереден сесленмедиди.

— Апайынъызгъа мектюпке даа бир шейлер къошмагъа истейсизми?

Ишинъизде бир шейлер денъиштимиди?

Энди алий джеза дегиль де, белли бир муддет ола билеми?

Сизни Къара шеэрден аякъларынъыз иле огге чыкъармазлар да, аязлы Сибирьге ёлланылгъан гъариплер сафында чыкъмагъа умют этесизми?

Алла берсин, Алла берсин, — ве устюне хач къойды...

Чобан-заде тизлерине энди яры-ярыгъа язы толдурылгъан дефтер япрагъыны къойды.

Къолу озю, ильхамлы яшлыгъында шиирлер озю-озюнден, ильхамнынъ тылсымлы ярыгъынынъ шавлелеринде сепильген киби, енгильден сёзге сёз, сатыргъа сатыр тизмеге башлады...

«Меним языларым ич бир шей косътермесе де, къырылгъан, чайпалгъан, бельки бугунъ-ярын олюп, ёкъ болуп кетеджек къырымтатарны, онынъ минлерини, дуйгъуларыны бек яхшы косътере; бир кунъ келип, тарих Къырымман огърашса, къырымтатар къырымтатарны къыдырса, меним языларым ортагъа чыкъар.

Эгер булай олмаса да, зарары ёкъ.

Къырымтатарнынъ бу къадар байрагъы, шаны, топрагъы гъайып болды; барсын, меним де бир къач юкъусыз геджем, думанлы, кедерли кунюм джойтулсын.

Магъа бу сатырларны язгъандаки леззет, онъгъанлыкъ джетишир...

Татар тили, ич кимсе айтмаса да, кене буюк, кене озыгюн...

Чюнки онда меним джигит халкъымнынъ бинълердже джыллыкъ къайгъылары, къайгъылы джигит сеси бар».

XII

Камеранынъ къапусында анахтар гъыйчылдысы, Мемеднинъ сеси де, эр сеферки киби, янъгъыравукъ ве эмир бериджи дегиль:

— Еди юз он бешинджи...

Коридорнынъ яры къаранлыгъында, Мемед белинден къырчмаларны чезгенини эшитип, Чобан-заде онъа эки элини де узатты.

Мемед шашмалады: бу кунълер ве афталар девамында, Чобан-задени чагъырыр экен, мабюсининъ бети агъаргъан олса да, о теляшсыз, озюни догъру туткъаныны, санки, бутюн юкъусыз геджелерини тамамлап, не де исе, юкъусына тойгъаны киби олгъаныны коръди.

Мемед кырчмаларны кийдиргенде, Чобан-заденинъ кьолундан кягъыт япрагъы тюшип кетти.

Козетиджи эгильди, кягъытны кьаталакълады ве мабюснинъ пармакълары арасына сокъты.

Даа бир кере Чобан-заденинъ бетине бакъты.

Онынъ серт, кысыкъ козьлеринде шеффат киби бир шей дуолды, анджакъ, озь кьурбанларыны камералардан чыкъаргъанда ве олар озь нараларына энди кьайтмайджагъыны, оларнынъ ерине, токътамагъан олюм конвейерине тюшкен, башкълары ерлешеджегини бильген джеллятлар насыл дуйгъулар яшагъаныны, не тюшюнгенини ким бильсин...

Незаретчи Чобан-задени тёпеге, таныш маршрутнен азбаргъа дегиль де, ашагъы, тайгъакъ демирден адымлагъан сайын мердивен къаранлыкъкъа кеткен тарафкъа алып кетти.

Апансыздан оглеринде зайыф ярыкъ ачылды, мында кырчмалы мабюслер невбетининъ сонъу эди, олар, бесе-белли махкеме бельгиленген вакътыны беклеп, бири-бирине таянып, сусып тура эдилер.

Мемед Айлисли, невбет Чобан-задеге кечмеге берсин, деп, оларны сопанен мердивеннинъ пармакълыгъына итеди.

Апансыздан Чобан-заде невбетте, огдеки мабюсни омузындан сыкъып туткъан Абу Сайидни корьди.

О, арыкълагъан, атта эвельки гьурурлы эндамыны джойып, бою алчакъча корюнди.

Чобан-заде адымларыны явашлатты ве онынъ кьолуны сыкъты.

Абу Сайид абдырады, кьоркьусындан бираз чёкти ве оджасына диване козьлернен бакъып, текрарламагъа башлады:

— Оджам, агърыдан кьоркьмайым...

Кьоркьмайым...

Мемед сабырсызлыкънен юмругъына оксюрди.

— Бу яхшы, акъайджасына, — етиштирди айтмагъа тынчландырыджы сеснен Чобан-заде: — Агъры такъатсызларны ашалай...

Амма сен ойле бир кьуветке кирдинъ ки, санки сен севген Махмуд Къашгъарининъ озю санъа учь кере зияде кучьлю севгинен кьайтарды...

Бунен сен озыбеклерге ве азербайджанлыларгъа
тюрклернинъ шанлы заманларыны ачыкъладыкъ... бу оларгъа
къувет ве мердлик берир...

Абу Сайид, огюнде тургъан таныш олмагъан адамнынъ
аркъасына бетинен комюлип, бала киби, аджджы-аджджы
агълады.

Мемед, оджа ве талебе бири-бирине сонъки сагълыкълашув
сёзлери айткъанда, адымларыны явашлатты.

Апансыздан онынъ, тюръме эмирлери, къаиделери, бугъавлар
ве къырчмалар жанъгъырдысы толугъа джайль башында зайыф
бир къыгъылчым липильдеди:

«Мен де тюркюм... тюркюм...» — амма, оны нумюнели
козетиджи япкъан идманлар ве огретювнинъ сагъыр юкю
зеинининъ теренлигинедже — о да инсан сюлялесине
менсюп олгъаныны хатырлатаджакъ киби, дуйдураджакъ
киби олмады...

Аягъынен мердивеннинъ невбеттеки басамагъыны
мукъайтлыкънен тийип бакъып, незаретчи къапунынъ
босагъасында токътады.

Мемед, Чобан-задеге къапу артында махкеме олгъаныны
анълатаджакъ олып, къырчманынъ зынджырыны бираз
тартты.

Къырчманынъ жанъгъырдысыны эшитип, алчакъ бойлу,
альбинос юзлю махкеме кятиби чыкъты.

Чобан-задеге бош ерге киби бакъып, тюзсюз козълерини
джедвельге тикти:

Невбеттеки!

Чобан-заде Бекир Ваапович, — ве, маса башында озь ерине
отурмакъ ичюн, чевикликнен ачыкъ къапугъа кирип кетти.

Мемед Айлисли апансыздан Чобан-задеге узанды, тез-тез оны
къучакъланды ве:

— Профессор...

Меним огълум Рустем сизинъ китапларынъыздан окъуды ве
мектепте оджа олды.., — деди ве биринджи олып босагъадан
атлады.

Эки пенджереси олгъан ярыкъ одада Чобан-заденинъ козю огюнде манзара ачылды: узун маса башында ортадан — къадылар «тройка»сы — генерал Сумбатов, генералдан сагъда ве солда — капитан Сарымсакъов ве кырымлы «кызыл профессор» — Сервер Файтонджы...

Буны беклемегенинден Чобан-заде кюолундан он секиз кырым мабюси адлары олгъан къаталакълангъан кягъытны тюшюрди.

Мемед кене мукъайтлыкънен оны котерди ве Чобан-заденинъ къатып къалгъан пармакълары арасына сокъты.

Мабюсининъ кырчмалар иле сыйкъылгъан кюолларына таныш кягъытчыкъны сокъмагъа тырышкъан незаретчининъ аракетлерини кергинликнен сейир эткен Файтонджы, отургъычнынъ аркъасына таянып, енгилликнен нефес чекти. Бир шейден мемнюн олып, Сумбатовгъа эгильди ве бир шейлер фысылдады.

Кятип язмагъа азырланды:

— Адынъыз, сойадынъыз, миллетинъиз...

— Кырымтатарым...

Чобан-заде... — эшитильди сагъыр сес.

Эвельден анълашкъанлары киби, «тройка» сусып отурды...

Файтонджы Чобан-задени юреклендирип, баш къакъты ве Сумбатовгъа кене бир шейлер фысылдап айтты...

Файтонджынынъ рухландырыджы ишаретини джесаретленмек киби анълагъан Чобан-заде къаталакълангъан кягъытны пармакълары арасында фырландырды ве къатты, сакин сеснен айтмагъа башлады:

— Генерал Сумбатов... сизден солда отургъан кырым тахъикъатчысы Сервер Файтонджы манъа азатлыкъны ишандырды, эгер мен махкеме иле келишме япсам ве берген шаатлыгъымда Кефе тюрьмесинде отургъан он секиз мабюсининъ къабаатлавларыны тасдикъласам.

Файтонджы кене онъа юрек берип, баш къакъкъаныны корип,
Чобан-заде сувукъ ве дуйгъусыз олды. — эбет, мен буларнынъ
эр биринен чокъ йыл шахсен таныш эдим.

Акъикъат ве тек акъикъатны айтып олурым.

Олар эписи — къырымтатарларнынъ энъ парлакъ инсанлары,
гъуруры, халкъымызнынъ чокъ асырлыкъ, фаджиалы ёлунда
мания олгъан къаранлыкътан чыкъараджакъ
озгъарыджылар...

Файтонджы, онынъ «он секиз»ни къабаатлав сценарийси
бозулгъаныны корип, башыны тёбен алды, къолларынен
янакъларыны тутып, махкюм этильген киби, айкъырды:

— Мабюс хаста... рухий...

Мен буны бир кереден, бизим ильк субетимизде анъладым...

Сумбатов кятипке ишмар этти.

Обири Чобан-задеге якъынлашып, онынъ пармакъларындан
«он секиз»нинъ джедвелини чекип алды.

Сумбатов кягъытны ачты:

— Аблямитов Якъуб...

Байрашевский Яхъя...

Недим Мамут...

Чобан-заде, оны токътатаджакъларындан къоркъып, девам
этти, ве онынъ сеси де серт, де джошкъун эди: —
къырымтатарларнынъ не байрагъы, не шурети, не топрагъы
къалды...

Мустемлекеджилер заманы кельген сонъ, чар олсун,
большевиклер олсун — халкъны ашаламагъа, чайпамагъа,
онинъ ирадесини букмеге тырышалар, онынъ аджайип
тилини сессизлик ве сускъунлыкъ къырдапында иритмек,
язмакъ истейлер.

- Тархан Ильяс, — девам этти торс козьлерини джедвельден
алмагъан Сумбатов, - О, Чобан-задени эшитмеген киби
косътереджек олды. — Чагъар Билял...

Абибулла Бакъкъал...

Кятип шашкъынлыкънен де генералгъа, де Чобан-задеге
бакъа, стенограмманы алып бармакъ керекми-ёкъмы,
бильмей эди.

— Гузель, сербестлик заманларында биз, кырымтатарлар миллионларнен Кырымда яшадык, оларны ябанджылар чызмалары эмегендже, озь тограмыз ве байрагымызнен гурурландык...

Къалгъанларны — беш юз бинь меним семетдешимни — етекчисиз къалдырмагъа истеп, сиз озь чокътан акълынъызгъа алгъан хайырсыз мерамынъызны ерине кетиресиз... бир дане къалдырмай, бизни ватандан къувмак, дюньягъа тары киби сепмек... озь етекчилеримиз — языджылар, алимлер, оджаларсыз...

Миллетнинь айдынлары олмайып, къувулгъан халкъ къаранлыкъта быралкъылансын, кери, озь оджакъларына, эждатларынынь къабирлерине... мутешем тарлалары, дагълары, озь денъизине ёлуны тапмасын... — Ве юзю агъаргъан, шашмалагъан Файтонджыгъа бакъаракъ, онынь бетине тюкюргендай, айтты: — Шейтаннынь къулу.

Эгер акъай олсань — озюнъни ат!

Сумбатов къаба арекетнен Файтонджынынь огюне джедвельни быракъты, козьлерини котерди, Чобан-задеге басиретли бакъты:

— Етер!

Сиз мында нелер айткъан олсанъыз, ич бирининь бугуньки махкемеге алякъасы ёкъ, сиз — къабаатлайдыгъы дегильсиз, агъыр джинаетлерде къабаатландырылгъан инсансыз.

Кятип енгилликнен кокюс кечирди, къарандашнен къулагъыны къашып, язмагъа азырланды.

— Чобан-заде Бекир Ваапович, — девам этти Сумбатов, наразылыккъа чыдамагъан сеснен: — Сизге къаршы топлангъан исбатлар, чокътан-чокъ шаатларнынь айткъанларына эсасланаракъ, сиз махкюм этильген Рухулла Ахундов иле берабер... омюр аркъадашынынь — Баку опера театрининь сабыкъ артисткасы Ругие Гиреевна Абдулинанынь изини ве макъуллеви иле (онъа нисбетен тахкъыкъат ишлери даа алып барылмакъта), азербайджан институтында акиссовет миллетчи тешкилят тизип, онъа студентлер ве аспирантларны джелъп эткенинъизде къабаатланасыз...

Чокътан-чокъ шаатлыкълар ве тинтюв вакътында сизде тапылгъан весикълалар боюнджа, сиз, Бухара, Ташкент, Фергана алий окъув юртларында чалышкъанынынъызда

студент яшлардан, тюрк бозкѳуртларыны нумюне оларакъ алып, «Туркестан бозкѳуртлары» акиссовет, террористик тешикият тизгенсиз.

Тюркиеде окѳугъанда британия хафиеси тарафындан джелъп этильдинъиз, чокъ йыл Тюркие, Маджаристан, Френкистан, Британия файдасына джасуслыкъ яптынъыз.

Сумбатов, ич бир дуйгъу косътермейип, окѳугъан шеэрлер, мемлекетлернинъ адлары ялынъыз топракъларнынъ кениш джогърафиясынен дегиль де, акъылгъа сыгъмагъан, фитнели къайдлар, фикирэтювлер, тасдикъланувлар сагъанагъы иле шашыртты, амма Чобан-заденинъ къулагъына бутюн бу къабаатлавлар узакътан, фысылдав киби эшитильди.

Ругие...

Къабаатлав ичинден къулагъына илишкен омюр аркъадашынынъ ады Чобан-заденинъ юрегини ойле бир сыкъты ки, о, йыкъылаязды.

Тек Мемед туткъан къырчмалар оны аякъта къалдырды.

Сумбатовнынъ кучълю даушы къыскъа бир вакъыткъа Чобан-задени махкеме барлыгъына къайтарды:

— Чобан-заде Бекир Ваапович, агъыр джинаетлер япкъанынъызда озъ къабаатынъызны таныйсызмы?

— Ёкъ, танымайым, — зорнен ачты япышкъан, къансыз дудакъларыны Чобан-заде. — Кефе зинданында отургъан он секизининъ къабаатыны да танымайым...

Сонъ исе, кене думанда киби, сѳзлер узакътан, санки Файтонджы иле кезген тюръме азбарынынъ диварлары артындан эшитильди.

— «Тройка» махкеме коллегиясы къарар чыкъарды: анъылгъан джинаетлер къошулып, махкъом этильген Чобан-заде Бекир Ваапович Азербайджан Эс-Эс-Дж Джинаий кодексининъ алтмыш учюнджи, алтмыш дѳртюнжи ве етмиш дѳртюнджи мадделери боюнджа алий — атып ольдюрильмек джезасына махкъом этиле...

Укъом деръал эда этильмели.

Чыкъышкъа чевирильгенде Мемед босагъадан атлагъанда къыйыш басты ве къырчмаларны баштакине коре кучълюдже тартты.

Махкюм этильгенни тюрюме азбарына таба алып кетеркен, шашмалагъан алда эп текрарлады:

– Мен де тюркюм, профессор, тюркюм... — Ве, махкеме кятиби: — Невбеттеки Абу Сайид Ходжаев, — деп кычыргъанда, агъзыны къапатты.

ИКЯЕНИНЪ СОНЪУ

(Алты йыл кечкен сонъ)

Асие, къаверенки картон джемидан онынъ джансыз эллеринде тюшеятаджакъ сайын, адымларыны де тезлештирип, де сакинлештирип, тозлу кой ёлу бою талгъын-талгъын кете эди.

Эвельки, Бакуда окъугъан Асие Акимованы бильгенлер, онъа бакъып, о замандаки нарин, юксек бойлу дюльбер, Бекир Чобан-заденинъ Кооперативная сокъагъындаки эвинде бекленильген мусафир олгъан кызыны зорнен таныр эдилер.

Гъурбет кокую тюбюнде дженюпнинъ ич бир вакъыт сёнюкмеген кунеши ве сыджакъ еллер онынъ вуджудыны къуруткъан, бетинден табанынадже къарарткъанлар.

Мавы козьлерининъ кыгъылчымлы бакъышы, дудакъларындан тюшмеген ве Хабиб Гулям-задени иситкен тебессюми кетип, онынъ, къорантасынынъ ве семетдешлерининъ башына тюшкен фаджиа бетинде солгъун янакъларындан сакъалынадже узангъан эрте бурюшиклер иле акс олунгъан.

Бу, эки ай незарет астында булунып, комендатура сынъырындан ильк чыкъышы эди, кузь башынынъ уйле кунеши онынъ эр бир адымыны излеген киби, кыя кольгеси де сагъдан, де солдан пейда олып, сюргюнлилерни баракларда ерлешкен оба-тёпели Ромитаннынъ дживарындаки Сардор кышлагъындан озгъарып кельди.

Уфукъкъадже баргъан памукъ тарлаларыны больген кой ёлунынъ кенарларында, эр бир бурулышта ёл косътергичлери турып, апансыздан «Ромитан — Бухара. 19 км» деген косътергич пейда олды.

Япракълары сувсузлыкътан бурулгъан дут тереклерининъ талдасында Асие тосат-тосат адымларыны сакинлештире,

кимерде токътай ве будюрли кевделерине таянып, нефес ала эди.

Козьлери талгъандже памукъ тарлаларынынъ узакъларына бакъа.

Сийрек корюнген адам эндамлары, сыкъ толдурылгъан чуваллар иле чалыдан чалыгъа кече.

Оларнынъ къолайсыз арекетлеринден Асие, анда, узакъта онынъ семетдешлери янъы ве агъыр памукъчы зенаатыны менимсегенлерини анълай эди.

Бу эсирликте кечкен эки ай девамында о да эр кунъ памукъ тарлаларына чыккып чалышты ве тек бугунъ, комендантнынъ изининен, Бухарагъа алып баргъан тозлу ёлгъа ялынаякъ басты.

Чокъ олмаса да, бир къач сааткъа, озюни эсаретте олмагъаныны дуйып, кесильген терекнинъ кутюгинде раатланмагъа отурды.

Чевик къушчыкъ — чибис, башы тёпесинден учып, чалылар арасына синъип кетти ве апансыздан богъаз сеснен отъмеге башлады.

Къомшу чалыларда сакъланып, къуш чивильдиси башлагъаныны беклеген киби, чибиске девамлы сызгъырманен авдотка сесленди, ансамбльде давушларнынъ диссонансыны ятыштырып, оларгъа травник къошулды...

Ерли къушларнынъ бири-бирине сесленмеси Асиенинъ хаялыны узакъ къалгъан Бакугъа алып барды.

Бу сеслерге уйгъан киби, онынъ пармакълары тизлери арасына къыстырылгъан джемиданнынъ къапагъында ойнап башлады.

Санки къушларнынъ чивильдиси яваштан фортепианоннынъ ойнакъ давушларына чевирильди.

Хатырасы оны, Асан Рефатовнынъ дирижёр таячыгъы ишаретлерине бойсунып, Ругие ханым иле экевлешип, «Арзы къыз» пьесасындан парчаны огренген заманларгъа къайтарды...

Чёль къушларынынъ музыка аккорды, озюне аш къыдыргъан къырмавы къанатлы чайлакънынъ чалылар тёпесинде учушы себебинден, апансыздан кесильди.

Торс сукюнетте Асиенинъ хаялында кене Ругие ханым джанланды, «джан авджысы» Сумбатов оны якъаламагъа кельген куню Асиенен сагълыкълашкъанда, къучакълап агълагъаныны хатырлады.

Ёлуны девам этмек ичюн энди турайым деген Асие, кене отурып къалды — агълап йиберди.

Чюнки эр сефер гъурбетте Ругие ханым акъкъында тюшюнгенде, онынъ козю огюнде къырчмалар кийдирип, квартирада тинтюв кечиререк, эр шейни асть-усть этип, кеткенде, эписи къапуларны муурьлегенлерини хатырлай тургъан, къальби исе Чобан-заденинъ эши такъдири иле багълы асреттен сыкъыла эди.

Ругие ханым, милислернинъ къычырыкълары алтында коридордан кечейткъанда, Асиеге чевирилип бакъты, санки, къызны ве онынъ къорантасыны да ватанындан къувулгъанда айны такъдир беклегинини бильди.

Ягъланмагъан копчеклерини гъыйчылдатып кеткен араба токътады.

Асие чечек орьнекли явлугъынынъ кенарынен козъ яшларыны сюрткенини корьген арабаджы тельбевлерни ойле бир тартты ки, эки копчекли арабагъа екильген эшек итаат этип, башыны ерге таба басып, агъыр-агъыр ичине ёл тозуны чекти.

— Къызым, Бухарагъа кетесинъми?

Отур, алып барайым...

Экевлешип кетмек зевкълыджадыр, — къычырды Асиеге сагъыр сес иле арабаджы, къолундаки джемидангъа кыймет кесип.

Асие башыны котерди: къарт бир кереден онъа ишанчлы корюнди.

Айдавджы джемидангъа къуру къолуны узатты, юкни согъан толу чуваллар устюне къойды.

Асиеге минмеге ярдым этип, тельбевини тартып, инат эшекке эмир бермезден эвель къойнундан торбачыкъны чыкъарып, тантаналы тарзда авучына ешилъ насвай топузчыкъаларыны тёлти, эзди ве тили тюбюне атты.

— Мындаки дегильсинъ...

Къырым? — сорады о агъзы насвай толу олгъанындан фысылдап.

Асие джуръатсызлыкъ иле башыны къакъты, чюнки, узун ёлдан джанлары сыкъылгъан айдавджылар, адет узьре

япкъанлары киби, агъзындан ешилъ эмени тюкюрген сонъ, сюргюнлилернинъ яшайышы акъкъында сораштырмагъа башлайджагъындан къоркъты.

Лякин къарт апансыздан: – Къоркъма, сиз, къувулгъанлар мында, биз, ерлилер киби, рахман ве рахим Алланынъ козю алтындасыз...», деген сонъ, тынчланды.

Арабаджы исе кирза чызмасынен тенбель эшекни тепип, копчеклер гъыйчылдысы везинине уяракъ яваштан йырламагъа башлады:

Асие, онынъ чая тюркюсинден озюни тынч дуяракъ, болдургъан вуджудыны бошаштырды ве башыны чувалгъа къойды.

Онынъ бурнуна кескин согъан къокъусы урды ве Кезлевдеки эвини, анасы, базарда сатмакъ ичюн, ашханеде пиширген аджайип чибереклерни хатырлатты...

Чиберек къокъусы артындан, узакъ балалыгъындан анасынынъ тынчландырыджы сеси, о, кызынынъ бешигине эгилип.

Татлы юкъусырав ичинде булунгъан Асие апансыздан арабаджынынъ сесини эшитти:

— Калян... Калян минареси... уфукъта парылдагъан тадж киби корюне...

Асие котерильди, онынъ юреги дукюльдеп башлады: кунеш сагъынына сарылгъан минаре эп юкселе берди...

Бакуда акъшамки кезинтилер вакътында минарени, бутюн гузелликлери ве инджеликлери иле, эеджанланып, Хабиб Гулям-заде тариф эте тургъан, эм бу ифаделер бир-эки кере дегиль, чокъ ве тесирли олып, Асие шимди Калянын онынъ севинч толу козьлеринен корьген киби корьди.

Къачып кеткен Бухара эмирининъ сарайы огюндеки мейданны айланып, араба юксек пахса диварлары янында токътады.

— Кельдик! — деди арабаджы, бельбагъыны чезип ве онен манълайындаки терни сюртип.

Онынъ кельгенини беклеген киби, арабагъа эки акъай чапып кельди ве Асиеге къулакъ асмай, омузларына чувалларны юклеп, базарнынъ ешилъ арабакъапуларына ашыкътылар.

Алыш-веришке далгъан арабаджы, гъалиба, Асие онъа миннетдарлыкъ бильдирип, сагълыкълашкъаныны биле эшитмеди.

Асие чинарлар оськен буюк сквер янындан кечкенде, олар артында сагъдан мермер сутунлар арасында эки оймалы къапусы олгъан театр биначасыны коръди.

Мындан, афишаларгъа бакъа-бакъа, Чобан-заденинъ лекцияларына, институткъа Хабиб ашыкъып кече тургъан.

Акъшам кезинтилердеки Хабибнинъ ифадели икяелерини хатырлап, Асие хаялында онынъ эвине тар аралыкътан кечкен ёлны сызды.

Къыз арабакъапу огюнде токътады, эеджанлангъанындан ичине аваны терен чекти.

Эбет, бу тамам шу оймалы, сом, къанатларында агъыр бакъыр алкъалары олгъан арабакъапу...

«Алкъаларны бири-бирине урмакъ керек» — Хабибнинъ къаранесини эшиткен киби олды о.

Джуръатсыз такъылдыгъа арабакъапу агъыр, гъыйчылдап ачылды.

Чал сачлары чыбалып чыкъкъан къара явлукъта Марьям-бону — Хабибнинъ анасы мусафирге тааджипнен бакъты, лякин шу арада:

— Асие?

Сизинъ берабер чыкъкъан фоторесиминъизни Бакудан огълум йиберген эди. — Ве Асиенинъ къолунда, огълу Бакугъа алып кеткен джемиданны корип, чар-чар сес этти:

— Онъа не олды?!

Сонъки мектюби Соликамск лагеринден эки йыл эвельси кельди...

Кунълерни саям... хабер-тебер ёкъ. — ве джемидангъа узанды, санки онда огълунунъ девамлы сесленмегенининъ сыры бар эди. — Лютфен, кинъиз...

— Кимнен лаф этесинъ анда?! — Азбар ичинден талапкъар акъай сеси эшитильди.

— Бабасы, бизим мусафиримиз Асие, — сесленди Марьям-бону, Асиенинъ огюнде джемидан иле адымларакъ.

Акбар Саидович апайынынъ аркъасы артындан узанып бакъкъан мусафирге тааджипнен бакъты, бир шейни хатырлап, козьлерини къысты.

Бу энди бам-башкъа, Чобан-задени Бакугъа къайтмаздан огюне Хабибнинъ эвинде мусафир оларакъ къабул эткен адам дегиль эди.

Къамбурайгъан, юргенде, огге хаста аягъыны чеккен ве таякъкъа таянгъан.

— Асие...

Къырымдан Асие Акимова, — тез-тез текрарлай эди о, мусафирни, къаршыдаки оданынъ сыджакъ диварларындан къорчалагъан юзюм тюбюндеки тёшемеге давет этерек.

Асие килимге къынтавлыджа ерлешти ве Акбар Саидович, огюни алып, къыз бираз раатлыджа отурсын деп, онынъ аякълары тюбюне куръсючикни чекти.

Сонъ апайынынъ къолундан ашыкъчанлыкъле джеמידанны тутып алды.

Онынъ къолайсыз арекетинден шалтакъ килит шакълады ве картон дёрткоше ичинден ерге салмакълы джюздан айланып тюшти, устюнде къара боянен «Хабиб Гулям-заде.

Абдулла Къадырининъ земаневий озъбек тилинде янъылыкъчы арамаляры.

Бухара — Баку.

Февраль, 1937 сенеси».

Анасы, джеמידандан чыкъкъан огълу урбасынынъ таныш къокъусыны сезди.

Кольмегини чыкъарды ве оны юзюне басып, яваштан агъламагъа башлады.

Акбар Саидович апайыны омузларындан къучакълады, тынчландырып, одагъа алып кетти.

Оларгъа бакъып, Асие: бабасы, Хабиб тариф эткени киби, серт, итираз этмелерине даянмагъан дегиль экен, деп тюшюнди.

Бесе-белли йыллар тек онынъ тыш къыяфетини дегиль де, къуюны да денъиштирген, йымшаткъанлар.

О хатырлады: шимди отургъан еринде, Хабиб айткъанына коре, дигер мусафир — Чобан-заде раатлангъан эди.

Бу фикир онынъ синъирлерини ятыштырды, санки оджасы онъа озъ оптимизмининъ бир парчасыны синъдирди...

Апай-акъай азбаргъа къайттылар — экиси де кевшеген, тынчлангъан.

Акбар Саидович апансыздан суаль берди:

— Асие, бу насыл олды?

Суальни сонъунадже анъламагъан Асие, Чобан-заде эляк олгъанындан эртеси куню онынъ апайыны — Ругие ханымны якъалагъанларыны, эвини муурьлегенлерини ве о Кезлевге къайтмагъа меджбур олгъаныны икяе этмеге башлады.

Айткъан сайын, икяеси фаджиалы аэнкке бояланды.

Къырымда оджалыкъкъа окъувыны девам этмеге истегени, лякин Чобан-заденинъ талебесини институткъа алмагъанларыны...

О, айткъан вакъытта Акбар Саидович джюзданны ачып, сесли окъуды:

— Диссертация юксек профессиональ ве ильмий севиеде язылгъан.

Муэллиф Баку педагогика институтынынъ тильшынаслыкъ къафедрасында бошагъан доцент ерини алмагъа ляйыкътыр.

Профессор Бекир Чобан-заде... — ве озь тефсирини къошты: — меним огълум акъыллы...

Эгер техник саасына кеткен олса, памукъ джыйгъанларнынъ эмегини енгиллештирген машина тюшюнип тапар эди...

Лякин оладжакъ шей олды...

Асие, онынъ сонъки сёзлери насыл эди?!

Къанаатлендириджими?

Асие бу сефер де суалининъ манасыны анъламады, гъайрыдан сорамакъ истеди, амма ярдымгъа, акъайыны яры сёзден анълагъан Марьям-бону кельди:

— Бабасы, огълунынъ сен иле ведалашкъанда не дегенини сорады, балам.

Асие пек чекинди:

— Хабибни дигерлери иле, машиналаргъа миндирмек ичюн Къара шеэрнинъ арабакъапусындан чыкъаргъанда, о менден: Сен мени беклерсинъми?

Бекле, ялварам..., деди, — ве козьяш толу козьлерини төбен алды:

— Сёз бердим...

Онъа лагерьге, бизимкилери энди Кырымда олмагъанларыны яздым...

Акбар Саидович, озь фикирлерине далып, онъа баягъы тикилип отурды, апансыздан:

— Пек яхшы...

Сёз бергенинъ яхшы яптынъ...

Огълума эсирлик агъырлыкъларына даянмакъ енгильдже олур...

Той япарыкъ...

Карнай ве сурнайлар бутюн Бухарагъа янъгъырар.

Сиз яшсынъыз...

Вакъыт тез кечер...

Меним эки догъмуш агъам Абдулло-Махсум элли докъуз яшында эвленди...

Эки баласы, дёрт торну бар... — деди ве төшеменинъ кенарына агъыр энип, субет мевзусыны денъиштирди:

— Кене шу йылы Абдулла Кыадырининъ де башына беля тюшти...

Учъ такъдир озъара багъланды — меним огълум, Чобан-заде ве Кыадыри...

Бойле бакъсанъ, чешит-чешит адамлар, лякин не ичюн Алла оларны багълады?

Бедавадан дегиль, эбет, бедавадан дегиль... — Ве апансыздан апайыны омузындан самимиетле къучакълады: — Икмет саиплери айталар: талебе ичюн оджасы бабадан устюн...

Хабибнинъ исе эки оджасы бар — Чобан-заде ве Абдулла Кыадыри, оларнынъ бильгиси, икмети ичюн устюне азапларны алды... — Ве эдасыны денъиштирип, ашыкъмагъа башлады. — Я биз, зынджыргъа багълангъан киби, не отурамыз...

Келинге дастарханны донат...

Пиалаларнен чайникни кетир...

Шимди «хусайни» юзюминден бир-эки салкъым кесерим.

Асие бегенир...

Асие сескенди, эсини топлагъандай, сытыкъ кокке бакъты:

— Багъышланъыз... Саат едигедже Ромитангъа къайтмакъ ве комендантта корюнмек кереким... — Ве джуръатланып, турды. — Багъышланъыз...

Марьям-бону Асиени эпкин къучакълады, коксюне басты ве козьаш иле:

— Биль, сен биз ичюн ябанджы дегильсинъ...
Сени эвимизде къабул этмеге шад олурмыз, бизим екяне огълумызнынъ апайыны севеджекмиз...

Асие шашмалап, арабакъапу тарафына теляшлы бакъкъан вакъытта, талгъын аякъларынен къыскъа-къыскъа басып, одагъа догърулды.

Марьям-бону къолунда ренкли-чечекли антерлернен къайтты, тёшемеде яйып къойды, къолунен йипекни сыйпады.

— Устюнъдеки урбалар ипрангъан...
Ал, озюнъе ве якъынларынгъа келиштирип, антерлер ве шалварлар уйдур.
Алла тёпемде бар, бир кере биле киймедим...
Огълумызнен сизинъ тоюнъызда киерим, деп сакъладым...

— Ал, ал...
Меним кампириме сизинъ тоюнъызгъа янгъы антерлер алмагъа етиштиримиз, — къолтутты апайына Акбар Саидович.

Асие, бойле дикъкъаттан пек утанды, Марьям-бону янгъы шейлерни огълунунъ джемиданына тырачлыкънен дестелеп къойгъанда, не айтаджагъыны бильмейип, сусып турды.

— Бу санъа Хабибден, деп сай...

Гъалиба, тек шимди бабанынъ къулагъына «комендант» сёзю илинди.

— Коменданткъа вакътында къайтмакъ керексинъми?!
Билем мен о, сенинъ бабанъ ве мен киби барот къокъламагъан пезевенк комендантларны!
Джанынъны агъырттырса, орденлерим иле кителимни киерим ве сизинъ Ромитан къаравулынъызгъа барырым.

Эгер гедже-куньдюз эсли башлылар, къартлар ве яш балаларны — эсирлерни незарет этмеге къоюлгъан олса, не тюрлю акъай олгъан о, не тюрлю субай? — Ве мевзуны денъиштирди: истейсинъми, кызым, мындаки тикиш фабриканынъ директорынен лаф этейим, тикиджи-мотористликке огренирсинъ...

Бизни, къартларны сыкъча ёкълап олурсынъ...

Хабибнинъ эвинде оны ойле керимане къабул эткенлеринден тесирленип, Асие:

— Сагъ олунъ...

Ромитанда — хаста анам, эки кичкене огълан къардашым бар...

Бабам даа джебеден къайтмады...

Бутюн акъай ишлери меним бойнумда...

— Анавы даа! — котерди ишарет пармагыны Акбар Саидович: — Джебеден даа къайтмады!

Бу бизим джаиль, пропаганда иле толдурылгъан адамлар сен, сенинъ хаста ананъ, энъ ошлусы — атта сенинъ кичкене огълан къардашларынъ немселерге хызмет эткенине инана!

Мен де къыркъ бир сенесинден къыркъ дёрт сенесине къадар сиясий ребер олып...

Ватан ичюн!

Сталин ичюн!

Эм биринджи уджюмге ким чапты — бизим озыбеклер, кырымлар, гурджилер, къалмыкъ баллар...

Асие туруп, джемидангъа узанды...

Марьям-бону оны къучакъламагъа ашыкъты:

— Ромитангъа сизни ёкълап барармыз...

Сен де ятсырама, бизим эвде даима бекленильген мусафирсинъ...

Акбар Саидович онынъ пешинден арабакъапугъадже барды. Асие кеткенине бакъып, артындан къолуны салады.

— Комендант исе...

Бир шей олса, барырым ве бетине бакъып, эр шейни айтырым!

Асие «Суфиен» мааллесининъ тар сокъагъындан,
къаршысына кельгенлерден козьяштан шишкен юзюни
сакълап, кечти...

2020 сенеси.

</doc>